


Liahona

**Pagtubag sa Panawagan sa Manluluwas
sa Pagserbisyo, pp. 4, 14, 20**

**Si Kristo nga Atong Gibalaan Pagtahud:
Ang Mensahe ni Elder Holland sa
Tanang mga Kristiyano, p. 24**

**Alang sa Kalig-on sa mga Kabatan-onan
Karon, p. 54**

**Gikan sa Joplin hangtud sa Japan—Pagkaplag og
Kaisug diha sa Natural nga mga Kalamidad, p. 60**





Ang Lima nga Malaamon,
ni Rose Datoc Dall

Ang napulo ka birhen misugat sa pamanhunon. "Ang lima kanila mga boang-boang, ug ang lima mga but-an." Ang mga but-an "nanagdalag mga prasko nga sinudlan og lana uban sa ilang lamparahan. Ang boang-boang "wala magdalag lana" sa ilang lamparahan. Sa dihang may misinggit nga "tan-awa, ang pamanhunon," ang mga boang-boang namalit pa og lana. "Miabut ang pamanhunon; ug silang mga andam misulod uban kaniya ngadto sa kombira sa kasal: ug unya ang pulitahan gitakpan." (Tan-awa sa Mateo 25:1-13.)



MGA MENSAHE

- 4 Mensahe sa Unang Kapanguluhan: Ang Panawagan sa Manluluwas sa Pagserbisyo**
Ni Presidente Thomas S. Monson
- 7 Mensahe sa Visiting Teaching: Paglihok Agi og Tubag sa Panahon sa Panginahanglan**

LABING IMPORTANTING MGA ARTIKULO

- 14 Thomas S. Monson: Pagtubag sa Tawag sa Katungdanan**
Ni Heidi S. Swinton
Mga kasinatian gikan sa kinabuhi ni Presidente Thomas S. Monson nagdasig kanato sa pagsunod sa iyang ehemplo.
- 20 Pagsaulog sa Adlaw sa Pagserbisyo**
Ni Kathryn H. Olson

- 24 Panaghiusa alang sa Kawsa ni Kristo**
Ni Elder Jeffrey R. Holland
Usa ka panawagan sa mga Kristiyano nga maghiusa sa konbiksyon, kalooy, ug pagsinabtanay.

- 34 Pagkakaplag og Hugot nga Pagtuo diha sa mga Kinatumyan sa Yuta**
Ni Michael R. Morris

- 78 Pagtubag sa mga Pangutana mahitungod sa Atong Relihiyon**
Ni Michael Otterson
Lima ka mga ideya nga inyong hunahunaon sa kanunay samtang inyong tubagon ang mga pangutana sa uban.

MGA DEPARTAMENTO

- 8 Notebook alang sa Komperensya sa Abril**
- 10 Unsa ang Atong Gituohan: Ang**

Sakrament—Paghinumdom sa Manluluwas

- 12 Walay Paglubad nga mga Istorya sa Ebanghelyo: Pagkat-on sa Inyong Katungdanan**
Ni Elder Joseph B. Wirthlin
- 19 Pagserbisyo diha sa Simbahan: Pagserbisyo sa Nanginahanglan**
Ni Al VanLeeuwen
- 30 Atong mga Panimalay, Atong mga Pamilya: Natural nga mga Kalamidad—Dili Kita Kinahanglang Mahadlok**
Ni Elder Stanley G. Ellis
- 38 Mga Tingog sa mga Santos sa Ulahing mga Adlaw**
- 74 Mga Balita sa Simbahan**
- 77 Mga Ideya sa Family Home Evening**


NAA SA HAPIN
Mga Mangingisda sa Katawhan,
ni Simon Dewey.



42 Padayon sa Hugot nga Pagtuo sa Makalibug nga Kalibutan

Ni Bishop Gérald Caussé

Lima ka mga baruganan nga makatabang kanato nga padayong malig-on ang atong pagtuo ug pagpamatuod.



Tan-awa kon imo bang makit-an ang Liahona nga gitago dinhi niini nga isyu.
Timaan: anaa sa fale.



54

46 Mga Pangutana ug mga Tubag

Naadik ako sa pornograpiya. Giguba niini ang akong kinabuhi. Unsay akong mahimo aron mahunong ang pagkaadik?

48 Unsaon Nako sa Pagkahibalo nga Ako Napasaylo?

Ni Elder Tad R. Callister

Kon ako napasaylo, nganong mobati gihapon ko og kahasol sa konsensya?

51 Atong Luna

52 Usa ka Sakripisyo apan Hingpit ang Kalipay

Ni Edward M. Akosah

Ang pagserbisyo sa Ginoo mas importante pa ba kaysa akong sweldo?

53 Paghunahuna sa Akong Kaugalingon nga didto sa Templo

Ni Adriane Franca Leao

Nasayud ko nga gustong kong maminyo sa templo, apan kina-hanglan kong mohimo una og eksaktong mga pagpili.

54 Alang sa Kalig-on sa mga Kabatan-onan: Usa ka Angkla alang sa Karon

Ni David L. Beck ug Elaine S. Dalton

Sa unsang paagi ang bag-ong Alang sa Kalig-on sa mga Kabatan-onan makatabang kaninyo? Basaha unsa ang ikasulti sa kinatibuk-ang presidente sa Young Men ug Young Women.

58 Ang Ehempla sa Akong Mama

Ni Erin Barker

Bisan tuod nag-kasakit ang akong inahan, nakatudlo gihapon siya nako kabahin sa gugma ug serbisyo.



68

59 Linain nga Saksi: Ang mga Kababayan-an Importante sa Simbahan!

Ni Elder Quentin L. Cook

60 Mga Pag-ampo, Mubo nga mga Sulat, ug Natural nga mga Kalamidad

Ni Marissa Widdison

Bisan tuod liboan ka milya ang kalay-on, sila si Honoka ug Maggie nakakat-on nga ang Dios nagbantay kanato panahon sa kalisud.

62 Maayo nga Ideya

63 Atong Pahina

64 Pagdala sa Primary ngadto sa Panimalay: Ako Mipili sa Pagpuno sa Akong Kinabuhi sa mga Butang Nga Nagdapit sa Espiritu

66 Sunda ang Propeta: Pagkat-on sa Pagserbisyo sa Uban

Ni Heidi S. Swinton

68 Ang Panimalay ni Leute

Ni Adam C. Olson

Bisan asa pa kita nagpuyo, atong mahimo ang atong panimalay usa ka sagradong dapit alang sa atong pamilya.

70 Para sa Gagmayng mga Bata

81 Mga Tawo sa Kasulatan diha sa Basahon ni Mormon

Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

Ang Unang Kapangulohan: Thomas S. Monson, Henry B. Eyring, Dieter F. Uchtdorf

Korum sa Napulog Duha ka mga Apostoles:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Editor: Paul B. Pieper

Mga Adviser: Keith R. Edwards, Christoffel Golden Jr., Per G. Malm

Tigdumalang Direktor: David L. Frischknecht

Direktor sa Editorial: Vincent A. Vaughn

Direktor sa Grapiks: Allan R. Loyborg

Tigdumalang Editor: R. Val Johnson

Mga Luyo-luyo sa Tigdumalang Editor:

Jenifer L. Greenwood, Adam C. Olson

Kauban mga Editor: Susan Barrett, Ryan Carr

Mga Kawani sa Editorial: Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Lia McClanahan, Melissa Merrill, Michael R. Morris, Sally J. Odekirk, Joshua J. Perkey, Chad E. Phares, Jan Pinborough, Paul VanDenBerghe, Marissa A. Widdison, Melissa Zenteno

Tigdumalang Direktor sa Art: J. Scott Knudsen

Direktor sa Art: Scott Van Kampen

Tigdumalang Produksyon: Jane Ann Peters

Mga Senior nga Tigdesinyo: C. Kimball Bott, Colleen

Hinckley, Eric P. Johnsen, Scott M. Mooy

Mga Kawani sa Desinyo ug Produksyon: Collette Nebeker

Aune, Connie Bowthorpe Bridge, Howard G. Brown, Julie

Burdett, Bryan W. Gygi, Kathleen Howard, Denise Kirby,

Ginny J. Nilson, Gayle Tate Rafferty

Prepress: Jeff L. Martin

Direktor sa Pag-imprinta: Craig K. Sedgwick

Direktor sa Pagpang-apud-apod: Evan Larsen

Paghubad: Francisco M. dela Cruz

Ipadala ang subskripsyon, mga pangutana, ug mga taho ngadto sa *Dateline Philippines* sa *Liahona*, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P86.40 matag tuig, P4.00 matag gula, gawas sa mga espesyal nga isyu.

Isumiter ang mga manuskrito ug mga pangutana online sa liahona.lds.org; kon ipadala ngadto sa *Liahona*, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@ldschurch.org

Ang *Liahona* (usa ka termino sa Basahon ni Mormon nga nagpasabut nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2012 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. GI-imprinta sa Tinipong Bansa sa Amerika.

Ang teksto ug biswal nga materyal diha sa *Liahona* mahimong kopyahan alang sa sulagma, dili pangkomersyo nga paggamit sa simbahan o panimalay. Ang biswal nga materyal dili mahimong kopyahan kon kini adunay mga pagdili diha sa linya sa kredito sa maong artwork. Ang mga pangutana kinahanglan ipadala ngadto sa Intellectual Property Office, 50 East North Temple Street, Salt Lake City, UT 84150, USA; e-mail: cor-intellectualproperty@ldschurch.org.

For Readers in the United States and Canada:

August 2012 Vol. 15 No. 8. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.



PARA SA MGA HAMTONG

"Pagkakaplag og Hugot nga Pagtuo diha sa mga Kinatumyan sa Yuta" (pahina 34) naghulagway sa mga istorya sa pagkakabig sa pipila ka mga miyembro sa kinahabagatang siyudad sa Argentina. Tan-awa ang uban pa nilang mga litrato sa liahona.lds.org.

PARA SA MGA KABATAN-ONAN

Ang mga kabatan-onan nagtanyag og pipila ka mga tambag sa pagbuntog sa pornograpiya (tan-awa sa pahina 46). Laing makatabang nga kapanguhaan mao ang workbook sa Simbahan sa pagkaayo gikan sa pagkaadik, nga anaa sa internet sa pipila ka mga pinulongan sa recoveryworkbook.lds.org.

SA INYONG PINULONGAN

Ang *Liahona* ug ubang mga materyal sa Simbahan anaa sa daghang pinulongan sa languages.lds.org.

MGA HILISGUTAN NIINI NGA ISYU

Mga numero sa pahina nagepresentar sa unang pahina sa artikulo.

Alang sa Kalig-on sa mga Kabatan-onan, 54

Babaye, mga, 59

Basahon ni Mormon, 34, 40

Buhat sa templo, 53

Calling sa Simbahan, mga, 4, 19

Ehemplo, 14, 58, 63, 66

Espiritu Santo, 19, 30, 34, 42, 48, 64

Family history, 38

Hugot nga Pagtuo, 42, 48

Jesukristo, 10, 24, 48

Kalisdanan, 30, 51, 60

Kalooy, 7, 19, 24, 58

Kaminyoon, 53

Katungdanan, 4, 12, 14, 51, 73

Katungdanan ngadto sa Dios, 51

Kristiyanismo, 24

Media, 46

Misyonaryo nga buhat, 34, 52, 78

Natural nga mga Kalamidad, 30, 60

Paghinulsol, 46, 48

Pagkaadik, 46

Pagkakabig, 34

Pagkamasulundon, 52

Paglaum, 38

Pagpadayag, 38, 40, 41

Pagpakig-date, 53

Pagpamatuod, 34, 42, 51

Pagpangandam, 30

Pagpasaylo, 48

Pag-ula, 48

Pakigsaad, mga, 10

Pamilya, 30, 54, 58, 59, 63

Panaghigala, 64

Panaghiusa, 20, 24

Panalangin, mga, 54

Personal nga Kauswagan, 51

Pornograpiya, 46

Programa sa Hugot nga Pagtuo diha sa Dios, 63

Sakrament, 10


Sakripisyo, 52

Serbisyo, 4, 7, 14, 20, 58, 66, 70

Sumbanan, mga, 54

Visiting teaching, 7

Ni Presidente
Thomas S. Monson



Ang Panawagan sa Manluluwas sa Pagserbisyo

Kadtong nagtuon og mathematics nasayud kon unsa ang common denominator. Alang sa Santos sa Ulahing mga Adlaw, adunay common denominator nga naghiusa kanatong tanan. Ang common denominator mao ang indibidwal nga call nga madawat natong tanan sa pagbuhat sa buluhaton sa gingharian sa Dios dinhi sa kalibutan.

Kamo ba nagbagulbul sa dihang kamo gihatagan og calling? O inyo bang gidawat uban sa pasalamat ang matag oportunidad sa pagserbisyo sa inyong mga kaigsoonan, nasayud nga ang atong Langitnong Amahan mopanalangin niadtong Iyang gitawag?

Naglaum ko nga dili mawala kanato ang tinuod nga tumong sa atong kinasingkasing nga pagserbisyo. Kana nga tumong, kana nga mahangturong tumong, mao ang gipamulong sa Ginoo ug makita sa Perlas nga Labing Bililhon: “Kay tan-awa, mao kini ang akong buhat ug ang akong himaya—ang pagpahinabo sa pagka-imortal ug sa kinabuhi nga dayon sa tawo.”¹

Hinaut kanunay natong hinumdoman nga ang atong pagkamiyembro sa Ang Simbahan ni Jesukristo sa mga Santos sa Ulahing mga Adlaw dili pagpahayahay apan

usa ka responsibilidad. Ang atong katungdanan, dugang sa pagluwas sa atong kaugalingon, mao ang paggiya sa uban ngadto sa celestial nga gingharian sa Dios.

Pinaagi sa andam nga paglakaw sa dalan sa pagserbisyo sa Dios, kita dili mahisama sa Cardinal Wolsey ni Shakespeare. Nakuhaan og gahum human sa dugayng pagserbisyo sa iyang hari, siya nagbakho sa kaguol:

*Kon giserbisyoan lang unta nako ang akong Dios bisan gamay Miserbisyo ako sa akong hari, Siya dili sa akong katigulangon Makahimo sa pagbiya kanako nga hubo sa akong mga kaaway.*²

Unsa nga matang sa pagserbisyo ang gikinahanglan sa langit? “Ang Ginoo nagkinahanglan sa kasingkasing ug sa usa ka andam nga hunahuna; ug ang andam ug ang masulundon mokaon sa kaayo yuta sa Zion niining katapusan nga mga adlaw.”³

Mohunong ko kadiyot kon maghunahuna sa mga pulong ni Presidente John Taylor (1808–87): “Kon kamo dili mopalambo sa inyong balaang mga tawag, ang Dios mohimo kaninyo nga responsable alang niadtong kinsa mahimong inyo untang maluwas kon kamo naghimo pa sa inyong katungdanan.”⁴

Sama sa nagbanwag nga kahayag sa kamaayo ang kinabuhi ni Jesus samtang Siya nangalagad sa katawhan. “Ako ania kaninyo ingon nga mag-aalagad,”⁵ Si Jesus mideklarar samtang Iyang napalakaw ang bakol, nag-ayo sa buta, sa bungol, ug nagbuhi sa mga patay.

Sa samingay sa maayong Samarianhon, ang Agalon nagtudlo kanato sa paghigugma sa atong silangan sama sa atong kaugalingon.⁶ Sa Iyang tubag sa datu nga batanong tigmando, Siya nagtudlo kanato sa pagwagtang sa atong pagkahakog.⁷ Sa pagpakaon sa 5,000, Siya nagtudlo kanato sa pag-atiman sa panginahanglan sa uban.⁸ Ug sa





Wali sa Bukid, Siya nagtudlo kanato nga unahon ang gingharian sa Dios.⁹

Sa Bag-ong Kalibutan, ang nabanhaw nga Manluluwas mideklarar, “Kamo nasayud sa mga butang nga kamo kinahanglan gayud nga mobuhat diha sa akong simbahan; kay ang mga buhat nga kamo nakakita nga Ako mihimo kana kamo mobuhat usab.”¹⁰

Kita nagpanalangin sa uban samtang kita nagsunod sa serbisyo ni “Jesus nga taga-Nazaret . . . nga nagpangadto-ngadto sa paghimog mga kaayohan.”¹¹ Ang Dios mopanalangin kanato nga makakaplag og hingpit nga kalipay sa pagserbisyo sa atong Amahan sa Langit samtang kita nagserbisyo sa Iyang mga anak dinhi sa yuta. ■

MUBO NGA MGA SULAT

1. Moises 1:39.
2. William Shakespeare, *King Henry the Eighth*, act 3, scene 2, mga linya 456–58.
3. Doktrina ug mga Pakigsaad 64:34.
4. *Mga Pagtulun-an sa mga Presidente sa Simbahan: John Taylor* (2001), 201.
5. Lucas 22:27.
6. Tan-awa sa Lucas 10:30–37; tan-awa usab sa Mateo 22:39.
7. Tan-awa sa Mateo 19:16–24; Marcos 10:17–25; Lucas 18:18–25.
8. Tan-awa sa Mateo 14:15–21; Marcos 6:31–44; Lucas 9:10–17; Juan 6:5–13.
9. Tan-awa sa Mateo 6:33.
10. 3 Nephi 27:21.
11. Mga Buhat 10:38.

PAGTUDLO NIINI NGA MENSAHE

“[Ang Ginoo] dili motugot nga kita mapakyas kon buhaton nato ang atong bahin. Iya kitang mapalambo bisan labaw pa sa atong kaugalingong mga talento ug mga abilidad. . . . Usa kini sa pinakataam-is nga mga kasinatian nga moabut sa tawo” (Ezra Taft Benson, sa *Pagtudlo, Walay Labaw Ka Mahinungdanon nga Tawag* [1999], 20). Ikonsiderar ang pagpakigbahin og kasinatian sa dihang kamo o inyong kaila mibati nga ang Ginoo mipalambo sa iyang mga talento ug abilidad. Dapita ang pamilya sa pagpakigbahin sa pipila sa ilang positibong mga kasinatian samtang sila mitubag sa “panawagan sa Manluluwas sa pagserbisyo.”



Pagserbisyo diha sa Templo

Ni Benjamin A.

Sa dihang 17 anyos na ko, nagsugod ko sa paghunahuna pag-ayo sa akong kaugmaon, ug nag-ampo ko sa Langitnong Amahan kon unsa ang akong buhaton sa pagpangandam sa pagmisyon ug pagdawat sa Melchizedek Priesthood. Mibati ko nga kinahanglan kong kanunayng moadto sa templo tungod kay kini ang balay sa Ginoo ug ang lugar diin mabati nako nga mas maduol sa akong Langitnong Amahan.

Busa naghimo ko og tumong nga mobunyag og 1,000 diha sa templo sa usa ka tuig. Nabati gyud nako nga mohimo niining tumong; nagpuasa ko aron masayran kon kini kinahanglan ba nakong buhaton. Ang atong Langitnong Amahan mitubag nako, ug nagsugod ko sa pag-adto sa Templo sa Tampico Mexico kada Sabado.

Human nga nakabunyag ko og 500, naghimo ko og tumong sa pagbuhat og family history research sa akong mga katigulangan, ug naganahan kaayo sa pagsiksik nga dili nako makatulog tungod kay nangita ko og mga ngalan. Nakakita ko og 50 ka ngalan ug walo ka henerasyon sa akong family history; nakatabang ko sa paghimo sa mga ordinansa sa templo alang kanila.

Sa katapusan nakabuhat ko og sobra sa 1,300 ka bunyag, ug nakagradwar ko sa seminary, nakadawat sa Melchizedek Priesthood, ug karon nagserbisyo isip full-time missionary, nga usa sa akong pinakatumong sa kinabuhi.

Ako Adunay Mabuhat para sa Uban

Ang matag usa kanato adunay matabang sa uban. Si Presidente Monson nagtudlo kanato nga kita kinahanglang mohigugma sa tanan ug magkat-on unsaon sa pagtabang kanila.

Tan-awa ang batang lalaki naglingkod ilalum sa punoan. Nakakita ba mo sa uban diha sa iyang palibut nga iyang matabangan?

Kon kamo manihapon uban sa inyong pamilya, isugyot sa matag sakop sa pamilya sa pagpakigbahin sa ilang gibuhay nga sila nakaserbisyo nianang adlaw. Isulat ang inyong mga kasinatian sa pagserbisyo sa inyong journal matag adlaw.





Tun-i kini nga materyal sa mainampuon nga paagi ug, kon angay, hisguti kini uban sa mga sister nga inyong bisitahan. Gamita ang mga pangutana sa pagtabang kaninyo sa paglig-on sa inyong mga sister ug sa paghimo sa Relief Society isip aktibong bahin sa inyong kaugalingon nga kinabuhi.

Paglihok Agi og Tubag sa Panahon sa Panginahanglan

Isip mga visiting teacher, usa sa atong katuyoan mao ang pagtabang sa paglig-on sa mga pamilya ug panimalay. Ang mga sister nga atong gibisitahan kinahanglan nga makasulti, “Kon ako adunay mga problema, nasayud ko nga ang akong mga visiting teacher motabang nga dili na sultihan.” Aron maka-serbisyo, kita kinahanglan nga masayud sa mga panginahanglan sa mga sister nga atong gibisita. Kon kita magtinguha og inspirasyon, kita masayud unsaon sa pagtubag sa espirital ug temporal nga mga panginahanglan sa matag sister nga gi-assign kanato. Dayon, gamit sa atong panahon, mga kahanas, mga talento, mga pag-ampo sa hugot nga pagtuo, ug espirital ug emosyonal nga tabang, kita makahatag og mapuanguron nga serbisyo panahon nga dunay nagmasakiton, kamatayon, ug uban pang espesyal nga mga sirkumstansya.¹

Pinaagi sa report sa mga visiting teacher, ang kapangulohan sa Relief Society moila niadtong may espesyal nga mga panginahanglan tungod sa pisikal o emosyonal nga balatian, emerhensya, pagpanganak, kamatayon, may kakulangan, kamingaw o uban pang mga hagit. Ang Relief Society president mo-report dayon sa iyang nahibaloan ngadto sa bishop. Ubos sa direksyon sa bishop, siya mopahigayun sa tabang.²

Isip mga visiting teacher kita adunay “dako nga katarungan . . . nga maglipay” tungod sa “panalangin nga gitugyan ngari kanato, nga kita nahimo nga mga himan diha sa mga kamot sa Dios aron sa pagpahinabo niining dako nga buluhaton” (Alma 26:1, 3).



Gikan sa mga Kasulatan

Mateo 22:37–40; Lucas 10:29–37; Alma 26:1–4; Doktrina ug mga Pakigsaad 82:18–19

MUBO NGA MGA SULAT

1. Tan-awa sa *Handbook 2: Administering the Church* (2010), 9.5.1; 9.6.2.
2. Tan-awa sa *Handbook 2*, 9.6.2.
3. Henry B. Eyring, sa *Anak nga mga Babaye sa Akong Ginghamian: Ang Kasaysayan ug Buhat sa Relief Society* (2011), 131.

Unsa Ang Akong Mahimo?

1. Gigamit ba nako ang akong mga gasa ug talento sa pagpanalangin sa uban?
2. Ang mga sister nga akong giumahan nasayud ba nga andam kong motabang kanila kon sila nanginahanglan?

Hugot nga Pagtuo, Pamilya, Kahupayan

Gikan sa Atong Kasaysayan

Sa bag-o pa lang ang Simbahan, gamay pa lang ug dug-ol ra ang mga miyembro. Ang mga miyembro makatabang dayon kon adunay nanginahanglan. Karon ang gidaghanon sa mga miyembro labaw na sa 14 ka milyon ug mikatap sa tibuok kalibutan. Ang visiting teaching kabahin sa plano sa Dios aron sa pagtabang sa iyang mga anak.

“Ang bugtong sistema nga makahatag og tabang ug kahupayan tadlas sa usa ka simbahan nga dako kaayo diha sa kalibutan nga nagkadaiya mao ang pinaagi sa tagsa tagsa ka sulugoon duol sa mga tawo nga nanginahanglan,” miingon si Presidente Henry B. Eyring, Unang Magtatambag sa Unang Kapangulohan.

“. . . Ang matag bishop ug branch president dunay usa ka presidente sa Relief Society nga saligan,” mi-padayon siya. “Siya adunay mga visiting teacher, nga nasayud sa mga pagsulay ug sa panginahanglan sa matag sister. Siya makahimo, pinaagi kanila, nga masayud sa kasingkasing sa tagsa-tagsa ka mga tawo ug sa pamilya. Makatabang siya sa mga panginahanglan ug makatabang sa bishop sa iyang tawag sa pag-amuma sa tagsa-tagsa nga mga tawo ug sa pamilya.”³

Alang sa dugang nga impormasyon, adto sa reliefsociety.lds.org.

Notebook alang sa **Komperensya sa Abril**

“Unsa nga Ako ang Ginoo namulong, Ako namulong; . . . bisan pinaagi sa akong kaugalingon nga tingog o pinaagi sa tingog sa akong mga sulugoon, kini managsama ra” (D&P 1:38).

Samtang kamo magribyu sa kinatibuk-ang komperensya sa Abril 2012, inyong magamit kining mga pahina (ug mga Notebook sa Komperensya sa umaabut nga mga isyu) aron sa pagtabang kaninyo ug paggamit sa bag-o nga mga pagtulun-an sa buhi nga mga propeta ug mga apostoles ug ubang mga lider sa Simbahan.

MGA ISTORYA GIKAN SA KOMPERENSYA

Pagtukod og Malungtarong Pundasyon

I sip batan-on nagtrabaho ko sa pagbutang og mga footing ug pundasyon sa bag-ong mga balay. Sa ting-init lisud ang pagbugkal sa yuta alang sa hulmahan nga pagabubu-an og semento para sa footing. Walay mga makina. Piko ug pala ra ang among gigamit. Ang pagtukod og lig-ong pundasyon sa mga building lisud niadtong mga adlawa.

Nanginahanglan usab kini og pailub. Human og bu-bu para sa footing, kami magpaabut nga mouga. Bisang gusto namong magpadayon sa trabaho, maghulat na usab kami human sa pagbu-bu sa pundasyon usa namo kuhaon ang mga hulmahan.

Ug ang mas makapadayeg sa usa ka bag-ong tigtukod mao ang makuti ug dugayng proseso sa mabinantayong pagbutang sa mga metal bar sulod sa hulmahan aron malig-on ang pundasyon.

Sa samang paagi, ang sukaranan kinahanglan ayohon pag-andam alang sa pundasyon sa atong pagtuo aron makalahutay sa unos nga moabut sa kinabuhi. Ang lig-ong pundasyon sa pagtuo mao ang personal nga integridad.

Ang makanunayong pagpili sa matarung makamugna og lig-ong pundasyon sa atong pagtuo. Magsugod kini sa bata pa, kay ang matag kalag natawo nga may gasa sa Espiritu ni Kristo. Tungod sa Espiritu kita masayud kon kita nakahimo og saktong o sayop diha sa atubangan sa Dios.

Kining mga pagpili, kadaghan mahitabo, makaandam og lig-ong sukaranan diin matukod ang atong pagtuo. Ang metal nga hulmahan asa ibubu ang mga kinahanglanon sa atong pagtuo mao ang ebanghelyo ni Jesukristo, lakip ang

tanang pakigsaad, ordinansa ug mga baruganan niini.

Usa sa mga yawe sa malungtarong pagtuo mao ang eksaktong paghukom nga igo na ang panahon aron sa paglig-on. . . .

Ang pagpalig-on dili awtomatik mahitabo tungod sa dagan sa panahon, apan kini nanginahanglan og panahon. Ang pagkatigulang lang dili makahimo niini. Pinaagi lang sa makanunayong kinasingkasing nga pagserbisyo sa Dios ug sa uban nga ang pagpamatuod sa kamatuoran dili mabugto ang kalig-on sa pagkaespirituhanon.

Presidente Henry B. Eyring, Unang Magtatambag sa Unang Kapangulohan, “Mga Hagit nga Buntugon,” *Liahona*, Mayo 2012, 24.

Mga Pangutana nga angay Palandongon:

- Makahinumdom ba kamo og panahon sa dihang gitestingan ang inyong personal nga integridad? Giunsa ninyo pagtubag?
- Sa unang paagi nga ang pagserbisyo sa Dios ug sa uban pinaagi sa pagtuon nakapalig-on sa inyong espirituhanon nga pundasyon?

Ikonsiderar sa pagsulat sa inyong mga hunahuna sa inyong journal o hisguti kini ngadto sa uban.

Dugang mga kapanguhaan niini nga hillisgutan: “Faith” sa Study by Topic at LDS.org; Richard G. Scott, “Ang Makapausab nga Gahum sa Hugot nga Pagtuo ug Maligdong nga Kinaiya,” *Liahona*, Nob. 2010, 43–46.



SULATI ANG BLANKO



1. “Maluwas kita gikan sa pamaagi sa dautan pinaagi sa pagsunod sa mga pagtulun-an sa _____”

(L. Tom Perry, “Ang Gahum sa Pagluwas,” *Liahona*, Mayo 2012, 97).

2. “Dili kita makuhaan kon ang uban _____”

(Jeffrey R. Holland, “Mga Mamumuo sa Ubasan,” *Liahona*, Mayo 2012, 31).



4. “Kini nga kinabuhi mao ang pagbansay sa mahangturong kahi-mayaan, ug kana nga paagi nagpasabut nga _____”

(Ronald A. Rasband, “Espesyal nga mga Leksyon,” *Liahona*, Mayo 2012, 80).

3. “Ang mga kama-tuoran ug doktrina nga atong nadawat nga naa na ug may moabut pa pinaagi sa _____”

(D. Todd Christofferson, “Ang Doktrina ni Kristo,” *Liahona*, Mayo 2012, 86).



Mga tubag: 1. balaan nga kasulatan; 2. gidugang; 3. pagpadayag; 4. mga pagtulun-an.

DUHA KA PULONG NGA SERMON

IKAW BA:

1. Maghambin og pagdumot?
2. Tsismis?
3. Mobaliwala sa uban?
4. Masina sa uban?
5. Gustong mopasakit sa uban?

HINOON:

1. Pagmabination.
2. Pagmapasayloon.
3. Pakigsulti sa malinawon.
4. Pasudla ang gugma sa Dios sa imong kasingkasing.
5. Pagbuhat og maayo ngadto sa uban.

Kinuha gikan sa Dieter F. Uchtdorf, “Ang Maloloy-on Magadawat og Kalooy,” *Liahona*, Mayo 2012, 75, 76.

**HUNUNGA
KANA!**



Propetikanhon nga Saad



“Ang Espiritu Santo mipamatuod sa kama-tuoran niining komperensya. Mousab samtang

kamo nagtinguha, sa pagpaminaw, ug pagtuon sa mga mensahe sa awtorisadong sulugoon sa Ginoo.”

Presidente Henry B. Eyring, Unang Magtatambag sa Unang Kapangulohan, “Mga Hagit nga Buntugon,” *Liahona*, Mayo 2012, 26.

Sa pagbasa, pagtan-aw, o pagpaminaw sa pakigpulong sa kinatibuk-ang komperensya, bisitaha ang conference.lds.org.

Ang Sakrament

PAGHINUMDOM SA MANLULUWAS

Ang sakrament sagrado nga ordinansa sa priesthood nga ipahigayon matag Dominggo. Si Jesukristo mipasiugda niining ordinansa sa dihang anaa Siya sa yuta ug gipahiuli kini sa atong panahon pinaagi ni Propetang Joseph Smith. “Ang ordinansa sa sakrament,” miingon si Elder Dallin H. Oaks sa Korum sa Napulog Duha ka mga Apostoles, “naghimo sa miting sa sakrament nga labing sagrado ug importante nga miting sa Simbahan.”¹

Ang Ginoo nagsugo kanato nga magpundok ug moambit sa sakrament matag Dominggo (tan-awa sa D&P 20:75). Ang mga tighupot sa Aaronic Priesthood mopanalangin ug mo-pass sa tinapay ug tubig ngadto sa kongregasyon, kinsa moambit sa sakrament isip pahinumdom sa lawas ug dugo ni Jesukristo. Sa pagbuhat niini, sila mipasalig pag-usab sa pagtuman sa mga pakigsaad ngadto sa Ginoo sa dihang sila nabunyagan. Sa pihong paagi, sila nagsaad sa kanunay nga mohinumdom ni Jesukristo, sa pagdala sa Iyang ngalan, ug pagsunod sa Iyang mga sugo. (tan-awa sa D&P 20:77).


Ang husto nga pagpangandam sa pag-ambit sa sakrament naglakip sa paghinulsol, pagtinguha sa pagsunod sa Manluluwas, ug pagbaton og

“masulub-on nga kasingkasing ug usa ka mahinulsulon nga espiritu” (3 Nephi 9:20). Ang pag-ambit sa sakrament usa ka senemanang oportunidad sa pagpamalandong ug pagpahinungod og usab. Ang balaan nga pagtahud ug pag-ampo makapabalaan sa kasinatian. Ang mga indibidwal kinsa seryosong nakasala dili gayud moambit sa sakrament hangtud sila maghinulsol, lakip ang pagkumpisal ngadto sa ilang bishop o branch president (tan-awa sa 3 Nephi 18:28–30).

Ang takus nga pag-ambit sa sakrament makahatag og talagsaong mga panalangin, sama sa kapasayloan sa mga sala, ang pagpakig-uban sa Espiritu Santo, ug pagkabalaan—mabalaan—pinaagi sa Pag-ula. ■

MUBO NGA SULAT

1. Dallin H. Oaks, “Ang Miting sa Sakrament ug ang Sakrament,” *Liahona*, Nob. 2008, 17.



SA UBOS: ANG KATAPUSANG PANIHAPON, NI SIMON DEWEY; SA TUO: ANG KATAPUSANG PANIHAPON, NI CARL HEINRICH BLOCH, GIGAMIT NGA MAY PAGTUGOT SA NATIONAL HISTORIC MUSEUM SA FREDERIKSBORG SA HILLERØD, DENMARK; DILI MAHIWONG PAKOPYAHAN; PAINTING PINAAGI NI DEL PARSON; PAGHULAGWAY SA MGA LITRATO PINAAGI NI EDWIN REDRINO, ROBERT MILNE, UG CHRISTINA SMITH

Alang sa dugang impormasyon, tan-awa sa 1 Mga Taga-Corinto 11:23–30; Doktrina ug mga Pakigsaad 27:2.

1. *Gipasiugdahan ni Jesukristo ang sakrament diha sa Iyang Napulog Duha ka mga Apostoles nianang gabhiuna sa wala pa Siya Gilansang sa Krus (tan-awa sa Lucas 22:19–20).*




2. *Human sa Iyang Pagkabanhaw, gipasiugdahan sa Manluluwas ang sakrament sa Amerika (tan-awa sa 3 Nephi 18:1–11).*



3. *Ang mga tighupot sa Aaronic Priesthood moandam, mopanalangin, ug mo-pass sa sakrament ubos sa direksyon sa bishop o branch president.*



4. *Atol sa sakrament, kita mag-focus sa pagsimba ug maglikay sa mga lihok nga makapasamok sa uban.*



5. *Hinumduman nato ang kinabuhi, ehemplo, mga pagtulun-an, ug Pag-ula sa Manluluwas samtang moambit sa sakrament uban sa balaan nga pagtahud.*

“Atong gidawat nga tanan kita masayop. Ang matag usa kanato may panginahanglan sa pagkumpisal ug sa pagbiya sa atong mga sala ug kasaypanan ngadto sa atong Langitnong Amahan ug sa uban nga tingali atong napasakitan. Ang Adlaw nga Igpapahulay naghatag kanato og bililhong oportunidad sa paghalad niining—atong mga sakrament—ngadto sa Ginoo.”

Elder L. Tom Perry sa Korum sa Napulog Duha ka mga Apostoles, “Ang Adlaw nga Igpapahulay ug ang Sakrament,” *Liahona*, Mayo 2011, 8.

PAGTUBAG SA MGA PANGUTANA

Kadtong dili pamilyar sa atong mga miting sa Dominggo tingali maghunahuna kon kadtong dili mga miyembro makatambong ug makaambit ba sa sakrament. Ang tanan welcome nga mosimba uban kanato. Ang sakrament gituyo sa pagtabang sa mga miyembro sa pagbag-o sa ilang mga pakigsaad, apan kon ang pag-ambit sa sakrament makatabang sa bisita sa pagsimba, mahimo nila kining buhaton.

PAGKAT-ON SA INYONG Katungdanan

Ang katungdanan nagpahinumdang kanato nga kita mga tinugyanan sa tanang gisalik kanato sa atong Tiglalang.



**Ni Elder
Joseph B. Wirthlin
(1917–2008)**

Sa Korum sa Napulog
Duha ka mga Apostoles

Si Joseph B. Wirthlin natawo niadtong Hunyo 11, 1917, sa Siyudad sa Salt Lake, Utah. Siya gipaluyohan ngadto sa Korum sa Napulog Duha ka mga Apostoles niadtong 1986. Ang mosunod nga kinutlo gikan sa iyang pamulong nga gihatag sa kinatibuk-ang komperensya niadtong Oktubre 5, 1980, isip sakop sa First Quorum of the Seventy. Alang sa kompleto nga teksto sa Iningles, tan-awa sa Ensign, Nob. 1980, sa ensign.lds.org.

Kadaghanan kanato mobuhat sa unsa ang *angay* natong buhaton kon kini dili makasamok sa *gusto* natong buhaton, apan nagkinahanglan og disiplina ug kahingkod aron buhaton nato ang angay buhaton gusto man nato o dili. Sa kanunay ang katungdanan mao ang gipaabut sa usa ka tawo gikan sa uban ug dili ang iyang gibuhat. Ang gihunahuna ug gituohan ug giplano sa mga tawo importante kaayo, apan ang ilang *gibuhat* mao ang labing mahinungdanon. Kini usa ka hangyo nga isalikway ang pagkahakog ug hunahunaon ang ikaayo sa tanan.

Kinahanglan nga hinumduman nato kanunay nga ang katungdanan nagpahinumdang kanato nga kita mga tinugyanan sa tanang gisalik kanato sa atong Tiglalang. Kon dawaton nato ang mga katungdanan nga andam ug matinuoron, kita makakaplag og kalipay. Kadtong giuna lang ang kalipay sa kinabuhi gidahaman nga mapakyas, kay, ang kalipay mao ang bunga ug dili ang tumong mismo. Ang kalipay naggikan sa pagbuhat sa katungdanan ug

pagkasayud nga ang iyang kinabuhi nahuyon sa Dios ug sa Iyang mga sugo. . . .

Ang tanang malampuson nga mga tawo sa kasaysayan sa kalibutan nasayud sa ilang katungdanan ug adunay lig-ong tinguha sa pagtuman niini. Ang Manluluwas adunay hingpit nga pagsabut sa katungdanan. Bisan tuod ang gikinahanglan Kaniya sobra sa kapabilidad sa usa ka tawo, Iyang hingpit nga gitugyan ang Iyang kaugalingon ngadto sa kabubut-on sa Iyang Amahan ug mituman sa Iyang balaa-nong katungdanan pinaagi sa pag-ula sa mga sala sa katawhan.

Si Joseph Smith maunungon sa iyang caling ug mituman sa iyang katungdanan bisan pa nag-atubang og grabeng pagpanggukod ug dakong personal nga sakripisyo. Siya nagma-kugihon, milahutay, ug mibuhat sa Pagpahiuli sa tinuod nga ebanghelyo ni Jesukristo. . . .

Si Presidente Spencer W. Kimball [1895–1985] midawat sa sugo sa pagdala sa ebanghelyo ngadto sa mga kinatumyan sa yuta. Siya matinud-anong nagbuhat sa iyang katungdanan ug usa ka talagsaong ehemplo alang kanato sa tanan niyang gibuhat sa pagpakatap sa ebanghelyo sa gugma. Ang resulta mao ang Simbahan nga milukop sa kalibutan ug katumanan sa usa ka panagna sa ulahing adlaw.

Kining halangdon nga mga tawo . . . mahimo untang mopili sa mas sayon nga dalan kaysa asa sila gidala sa ilang katungdanan. Apan wala nila kini buhata. Sigurado ang ilang katungdanan dili sa kanunay nakahatag og kahupay o kahamogaway. Sa kanunay ang ilang katungdanan nagkinahanglan og dakong sakripisyo ug personal nga kakugi; apan bisan pa man, ang katungdanan ang ilang gipili ug gituman.

Ang kinabuhi nagkinahanglan kanato nga mobuhat og daghang katungdanan—ang pipila balik-balik, ang uban mas makahuluganon og mahinungdanon. Usa sa importante kaayo nga bahin sa katungdanan mao ang mahimong maayo nga ehemplo ug sa



pagpahimulos sa matag oportunidad sa pagtabang sa uban niining lisud nga dalan sa kinabuhi. Kini mahimo pinaagi sa makapaawhag nga pulong, pagdayeg, paglamano—bisan unsa nga lihok nga nagpasabut og pag-amuma. Ug atong hinumduman nga samtang kita maayong nagkat-on sa mga buluhaton dinhi, kita nag-andam usab sa pagbuhat sa mahangturong mga katungdanan. . . .

Ang kinahanglanon gayud buhaton nga atong mga katungdanan sa panimalay, sa Simbahan, sa atong trabahoan matag adlaw, ug sa atong pinalanggang nasud . . . klaro ug maayo kaayong pagkahulagway sa Gamhanang Magtutudlo, si Jesukristo. Siya mideklarar:

“Kay walay maayong kahoy nga magapamungag mga bungang walay pulos, ni may kahoy nga walay pulos nga magapamungag bungang maayo.

“Kay ang matag kahoy maila pinaagi sa iyang bunga. Kay walay mga igos nga anha popoa gikan sa kasampinitan, ni mga parras gikan sa kadyapaan.

“Ang maayong tawo, gikan sa maayong bahandi sa iyang kasingkasing, magapagulag maayo; apan ang dautang tawo, gikan sa iyang dautang bahandi, magapagulag dautan: kay gikan sa kadagaya sa kasingkasing magasulti ang iyang baba.

“Nganong motawag man kamo kanako nga, Ginoo, Ginoo, apan dili mobuhat sa ginasugo ko kaninyo?

Usa ka importante kaayo nga bahin sa katungdanan mao ang mahimong maayo nga ehemplo ug sa pagpahimulos sa matag oportunidad sa pagtabang sa uban niining lisud nga dalan sa kinabuhi.

“Ang matag usa nga magaduol kanako ug magapatalinghug sa akong mga pulong ug magabuhat niini, ipakita ko kaninyo kon sa unsa siya mahisama:

“Siya mahisama sa usa ka tawo nga nagtukod og balay, nga nagkalot og lalum, ug nagpahiluna sa patukoranan diha sa ibabaw sa bato: ug sa pag-abut sa baha, ang bulhog mihasmag niadtong balaya, apan wala makatay-og niini: kay kini maayo man nga pagkatukod.

“Apan siya nga nagpatalinghug, ug dili magabuhat niini, mahisama siya sa usa ka tawo nga nagtukod sa iyang balay nga walay patukoranan diha sa yuta; kini gihasmagan sa bul-og ug diha-diha napukan; ug daku gayud ang pagkagun-ob niadtong balaya” (Lucas 6:43–49).

“Ayaw pagluya diha sa maayo nga buhat” (D&P 64:33), akong mga kaigsoonan. Ang pagkamatinuoron sa katungdanan usa ka timaan sa tinuod nga disipulo sa Ginoo ug sa mga anak sa Dios. Magmaisug sa inyong katungdanan. Magpabiling lig-on. Ayaw og kapakyas sa inyong labing mahinungdanon nga buluhaton, nga mao ang inyong pagpaku-buhi dinhi sa yuta. Pagmatinuoron sa inyong katungdanan, kay makapaduol kini ninyo sa Dios.

Mohatag ko sa akong lalum ug kinasingkasing nga pagpamatuod nga kini mao lang ang paagi nga makabaton og kalipay ug makatabang sa paglambo sa gingharian. ■

Ang capitalization ug paragraphing gi-estandard.



SA WALA: GIITRATOHAN NI CRAIG DIMOND; SA TUO, GIKAN SA IBABAW: GIITRATOHAN PINAGI NI JED A. CLARK © IRI, JEFFREY ALURED © DESERET NEWS, © DESERET NEWS, UG CHRISTINA SMITH

THOMAS S. MONSON

Pagtubag sa Tawag sa Katungdanan

Kaniadto pa si Presidente Thomas S. Monson mipasalig nga tumanon ang iyang katungdanan sa buhat sa Ginoo ug mosunod sa ehemplo ni Jesukristo

Ni Heidi S. Swinton

Kadaghan si Presidente Thomas S. Monson misulti, “Ganahan ko sa pulong nga *katungdanan*.” Iya kining gikonsiderar nga “usa ka butang nga sagrado.”¹ Agi og pagtuman sa iyang katungdanan isip ika-16 nga Presidente sa Simbahan ni Jesukristo sa mga Santos sa Ulahing mga Adlaw, siya miingon, “Akong itahan ang akong kinabuhi, ang akong kusog—ang tanan nga madalit kanako—sa pag-alagad [sa Ginoo] ug sa pagdumala sa mga kalihokan sa Iyang Simbahan pina-subay sa Iyang kabubut-on ug pinaagi sa Iyang pagdasig.”²

Nailhan sa iyang pagserbisyo sa uban, ihatag ni Presidente Monson ang iyang suit ug sapatos kon anaay buluhaton sa abroad ug mopauli nga naka-slacks ug tsinelas. Iyang nabatasan ang pagbisita sa mga higala ug kaila kinsa nanginahanglan og pagdasig. Siya nakapanalangin sa dili maihap na mga tawo diha sa mga ospital ug care center, misunod sa aghat sa pagtawag gamit ang telepono, ug kadaghan nga namulong sa mga haya. Siya nagpakaon, nanghatag og manok nga aslunon, ug mga libro nga may sulat sa pagka

manggihunahunaon. Ang iyang eskedyul matag adlaw isip Presidente sa Simbahan napuno og mga miting ug sabut, apan kanunay siyang naggahin og panahon alang sa mga tawo—kasagaran sa tinagsa. Sa mga rekord sa kasaysayan sa Simbahan, siya maila sa iyang gugma sa katawhan ug sa iyang pagpakita nianang gugma pinaagi sa paggahin kanila sa iyang panahon.

Ang Ehemplo ni Jesukristo sa Katungdanan

Ang mga buhat ni Presidente Monson nadasig tungod sa iyang pagpamatuod sa Ginoong Jesukristo. Siya miingon: “Bisan kon mianhi Siya dinhi sa yuta isip Anak sa Dios, mapaubsanon Siya nga miserbisyo niadtong naglibut Kaniya. Mianhi Siya gikan sa langit aron mopuyo dinhi sa yuta isip mortal nga tawo ug motukod sa gingharian sa Dios. Ang Iyang mahimayaon nga ebanghelyo miusab sa panghunahuna sa kalibutan.”³ Ang Manluluwas mipahayag sa Iyang panabut sa katungdanan sa dihang Iyang gipahayag, “Ako mianhi dinhi sa kalibutan aron sa pagbuhat sa kabubut-on



Gikan sa ibabaw: Si Presidente Monson nagpakita og gugma sa mga tawo samtang siya nagkiglamano sa mga Boy Scouts, nagdawat og regalo (uban sa iyang asawa, si Frances), naggiya sa usa ka batang babaye sa groundbreaking, ug nagwara-wara sa iyang kamot ngadto sa kongregasyon sa kinatibuk-ang komperensya (uban sa iyang asawa).



Si Jesukristo nagtudlo sa sinagoga ug sa atabay. Siya mipanalangin sa gamayng mga bata ug mibanhaw sa anak nga babaye ni Jairo.

“Ang Manluluwas kanunay gayud aktibo ug bisi—nagtudlo, nagpamatuod, ug nagluwas sa uban. Ang samang gimbuhaton maoy atong indibidwal nga katungdanan isip mga sakop.”

sa akong Amahan” (3 Nephi 27:13). Uban sa determinasyon ug kalumo tungod sa mahangturong panglantaw, Siya “nagpangadto-ngadto sa paghimog kaayohan, . . . kay ang Dios uban man kaniya” (Mga Buhat 10:38).

Si Presidente Monson naghatag og gibug-aton sa dihang anaa na ang katungdanan ni Jesus diha sa Tanaman sa Getsemani, Siya mitubag, “Amahan ko, kon mahimo man, isaylo lang kanako kining kopa: ngani, dili sumala sa akong pagbuot kondili sa imo” (Mateo 26:39). Ang Manluluwas nasayud ug mitubag kanunay sa Iyang katungdanan sa paggiya, pagbayaw, ug pag-awhag sa mga anak sa Iyang Amahan. Si Presidente Monson misulti kabahin niini: “Ang Manluluwas kanunay gayud aktibo ug bisi—nagtudlo, nagpamatuod, ug nagluwas sa uban. Ang samang gimbuhaton maoy atong indibidwal nga katungdanan isip mga sakop.”⁴

Nagkat-on sa Pagtuman sa Iyang Katungdanan

Si Presidente Monson nagdako sa Sixth-Seventh Ward sa Temple View Utah Stake. Didto siya nakakat-on sa iyang katungdanan sa pagtuman sa iyang mga buluhaton sa priesthood ubos sa giya sa maalamong mga lider sa priesthood, ug siya nakaangkon og kahibalo ug pagpamatuod sa ebanghelyo ni Jesukristo gikan sa dinasig nga mga lider.

Niadtong 1950 sa edad nga 22, si Thomas Spencer Monson gipaluyohan isip bishop sa Sixth-Seventh Ward. Iyang gigamit ang iyang nakat-unan ngadto sa nagtudlo kaniya sa kahulugan niini. Siya ang amahan sa ward, ang presidente sa Aaronic Priesthood, tigtabang sa kabus ug nanginahanglan, ang tighupot sa eksaktong mga rekord, ug ang gikauyonan nga maghuhukom sa Israel. Daghan ang

iyang mga buluhaton, apan iya kining nahimo nga may positibong kinaiya.

Usa sa katungdanan sa bishop mao nga padalhan ang matag serviceman og *Church News* ug *Improvement Era* ug personal nga mosulat kaniya matag bulan. Tungod kay si Presidente Monson naka-serbisyo sa navy sa Ikadu-

hang Gubat sa Kalibutan, siya nasayud sa kaimportante sa sulat gikan sa panimalay. Siya adunay 23 ka mga miyembro sa ward nga nagserbisyo sa military, busa mitawag siya og usa ka sister sa ward sa pagdumala sa pagpadala niining mga sulat. Usa ka gabii gihatag ni Presidente Monson kaniya ang 23 ka mga sulat.

“Bishop, dili ka ba maluya?” nangutana siya. “Ania na usab laing sulat para kang Brother Bryson. Kini ang ika-17 nga sulat nga imong gipadala kaniya nga walay tubag.”

“Nan, tingali karong bulana,” siya miingon. Mao gyud ang nahitabo. Ang tubag gikan ni Brother Bryson mabasa: “Pinalanggang Bishop, dili ko kaayo mahilig sa pagsulat. Salamat sa *Church News* ug mga magasin, apan labaw sa tanan salamat sa imong personal nga mga sulat. Nausab nako karon. Naordinahan nako pagka-priest sa Aaronic Priesthood. Malipayon kaayo ko.”

Nakita ni Presidente Monson sa sulat ang praktikal nga paggamit sa sanglitanan “Buhata ang inyong katungdanan, kana ang pinakamaayo. Kay ang Ginoo motabang kaninyo.” Daghang tuig ang milabay, samtang nagtambong sa kompetensya sa stake, siya namulong sa iyang kasinatian sa pagsulat ngadto sa mga servicemen. Human sa miting, usa ka batan-ong lalaki miduol kaniya ug nangutana, “Bishop, kahinumdom ka nako?”

Diha-diha dayon si Presidente Monson mitubag, “Brother Bryson! Kumusta ka? Kumusta ang imong pagsimba?”

Ang serviceman kaniadto mitubag uban sa dakong pasalamat nga siya maayo ra ug nagserbisyo sa elders quorum presidency. “Salamat usab sa imong kabalaka alang kanako ug sa personal nga mga sulat nga imong gipadala nga akong gibahandi.”⁵

Sa mga panghitabo sama niini, si Presidente Monson miingon: “Sa kasagaran ang gagmay nga mga buhat sa pagserbisyo mao ra ang gikinahanglan sa pagbayaw ug pagpanalangin sa uban: usa ka pangutana mahitungod sa pamilya sa tawo, mubo nga mga pulong sa pag-awhag, usa ka sinsero nga pagdayeg, usa ka gamay nga sulat sa pasalamat, mubo nga tawag sa telepono. Kon kita mapaniiron ug nakaamgo, ug kon kita mobuhat sa mga pag-aghat nga moabut kanato, kita makahimo og daghang kaayohan.”⁶

Pagkat-on sa Pagtuman sa Atong Katungdanan

“Samtang atong sundon ang mga lakang [ni Jesukristo] karon, kita usab adunay oportunidad sa pagpanalangin sa kinabuhi sa uban,” miingon si Presidente Monson. “Si Jesus nagdapit kanato sa paghalad sa atong kaugalingon: ‘Tan-awa, ang Ginoo nagkinahanglan sa kasingkasing ug usa ka andam nga hunahuna.’”⁷

Ang panglantaw sa atong propeta kabahin sa katungdanan nagkinahanglan og lapas pa sa personal nga ambisyon, kalampusan, kasayon, o kalipay nga makatabang ug makatubag sa kaayohan sa kadaghanan. “Sa pagkaplag og tinuod nga kalipay,” si Presidente Monson miingon, “kinahanglang dili nato hunahunaon ang atong kaugalingon. Walay tawo nga makakat-on sa kahulugan sa pagpakabuhi hangtud iyang unahon ang pagserbisyo sa uban. Ang pagserbisyo sa

Samtang gihangyo ni Presidente Monson ang tanan nga natandog sa kinabuhi sa presidente sa stake nga mobarug, ang tanang anaa sa kongregasyon mibarug.



*“Sa kasagaran
ang gagmay
nga mga buhat
sa pagserbisyo
mao ra ang
gikinahanglan
sa pagbayaw
ug pagpanala-
ngin sa uban.”*

uban susama sa katungdanan, ang pagtuman niini makahatag og tinuod nga kalipay.”⁸

Siya nagtuo nga ang panaghigala makapasasyon sa pagserbisyo sa uban. “Ang usa ka higala mas maghunahuna sa pagtabang sa katawhan kaysa dayegon,” siya miingon. “Ang usa ka higala moamuma. Ang usa ka higala mohigugma. Ang usa ka higala maminaw. Ug ang usa ka higala motabang.”⁹

Daghang mga tuig ang milabay si Presidente Monson mitambong sa komperensya sa stake sa Star Valley, Wyoming, USA, aron sa pag-organisar og usab sa stake presidency. Apan sobra pa sa pagtuman niana nga katungdanan ang iyang gibuhat. Natandog niya ang kinabuhi niadtong tanan nga mitambong uban sa yanong pagpakita og gugma samtang iyang gi-release ang stake president, E. Francis Winters, kinsa nagserbisyo sulod sa 23 ka tuig.

Sa adlaw sa komperensya sa stake, napuno sa mga miyembro ang building. Ingon og ang matag usa miingon og “hilum nga *salamat* niining halangdon nga lider,” nga klarong nagbuhat sa iyang katungdanan uban iyang tibukong kalag. Sa pagbarug ni Presidente Monson aron mamulong, iyang gisulti ang gidugayon nga si Presidente Winters nangulo sa stake ug nahimong “mahangturong haligi sa kalig-on sa tanang anaa sa walog.” Dayon siya nadasig sa pagbuhat og usa ka butang nga wala pa niya buhata sukad. Iyang gihangyo ang tanan nga natandog sa kinabuhi ni Presidente Winter nga mobarug. Makapahingangha ang resulta. Ang tanan mibarug.

Si Presidente Monson misulti sa kongregasyon, nga daghan ang naghilak, “Kining dako nga pundok nagpakita dili lang sa indibidwal nga mga pagbati apan sa pasalamat usab sa Dios alang sa maayong pagpuyo sa kinabuhi.”¹⁰

Ang Pagpamatuod sa Atong Propeta kabahin sa Katungdanan

Si Presidente Monson naghatag kanato niining makapadagdag nga mga pagtulun-an kabahin sa katungdanan:

“Bisan unsa pa ang atong calling, dili igsapayan sa atong mga kahadlok o kabalaka, kita mag-ampo ug dayon moadto ug mobuhat, maghinumdom sa mga pulong sa Agalon, gani ang Ginoong Jesukristo, kinsa nagsaad, ‘Anaa ako kaninyo kanunay, bisan asa nga dapit sa yuta.’”¹¹

“Makapalig-on kita sa usag usa; kita adunay kapasidad nga motagad niadtong wala matagad. Kon kita makabaton og mga mata nga molantaw, mga dalunggan nga makadungog, ug mga kasingkasing nga nasayud ug mobati, kita motabang ug moluwas niadtong kita may responsibilidad.”¹²

“Kita wala mag-inusara—diha sa atong siyudad, nasud, o sa atong kalibutan. Walay nag-ali sa atong kaabunda ug sa kalisud sa atong silingan.”¹³

“Adunay mga tiil nga kinahanglang tabangan, mga kamot nga alalayan, mga panghunahuna nga awragon, mga kasingkasing nga dasigon ug mga kalag nga luwason.”¹⁴

“Tingali kon kita moatubang sa atong Tiglalang, kita dili pangutan-on, ‘Pila ka posisyon ang imong nahuptan,’ apan, ‘Pila ka mga tawo ang imong natabangan?’”¹⁵

“Samtang kita magpadayon sa atong matag adlaw nga kinabuhi, kita makakita og daghan mga oportunidad nga mosunod sa ehemplo sa Manluluwas. Kon ang atong kasingkasing nahisubay sa Iyang mga pagtulun-an, kita makadiskobre sa kaduol gayud sa Iyang balaanong tabang. Kini sama nga kita anaa sa buhat sa Ginoo; ug dayon kita makaamgo nga kon kita anaa sa buhat sa Ginoo, kita angay sa panabang sa Ginoo.”¹⁶

“Pinaagi sa pagkat-on kabahin Kaniya, sa pagtuo Kaniya, sa pagsunod Kaniya, adunay kapasidad nga mahimong sama Kaniya. Ang [atong] panagway mausab; [atong] kasingkasing mahumok; [atong] lakang mapas-pas; [atong] panglantaw molambo. Ang kinabuhi mahimong angay niining mamahimo.”¹⁷

Sama sa atong propeta, si Presidente Thomas S. Monson, kita makapasalig nga tumanon ang atong katungdanan sa buhat sa Ginoo ug mosunod sa ehemplo ni Jesukristo. ■

MUBO NGA MGA SULAT

1. Thomas S. Monson, “Stumbling Blocks, Faith, and Miracles,” *Liahona*, Hunyo 1996, 20; “Happy Birthday,” *Ensign*, Mar. 1995, 59.
2. Thomas S. Monson, “Ang Paghinumdom ug Pagpadayon,” *Liahona*, Mayo 2008, 90.
3. Thomas S. Monson, “Ang Tigbuhat og Taytayan,” *Liahona*, Nob. 2003, 68.
4. Thomas S. Monson, “Matinguhaon nga Moapil,” *Liahona*, Nob. 2004, 56.
5. Tan-awa sa Thomas S. Monson, “The Call of Duty,” *Ensign*, Mayo 1986, 39.
6. Thomas S. Monson, “Tulo ka mga Tumong nga Mogiya Kaninyo,” *Liahona*, Nob. 2007, 120–21.
7. Thomas S. Monson, “The Gifts of Christmas,” *Liahona*, Dis. 2003, 2.
8. Thomas S. Monson, “The Lord’s Way,” *Ensign*, Mayo 1990, 93.
9. Thomas S. Monson, “To the Rescue,” *Liahona*, Hulyo 2001, 59.
10. Thomas S. Monson, “Your Eternal Home,” *Liahona*, Hulyo 2000, 70.
11. Thomas S. Monson, “They Pray and They Go,” *Liahona*, Hulyo 2002, 57.
12. Thomas S. Monson, “The Call to Serve,” *Liahona*, Ene. 2001, 58.
13. Thomas S. Monson, “In Search of the Abundant Life,” *Tambuli*, Ago. 1988, 4.
14. Thomas S. Monson, “Unsa Kalig-on ang Tukuranan,” *Liahona*, Nob. 2006, 68.
15. Thomas S. Monson, “Faces and Attitudes,” *New Era*, Sept. 1977, 50.
16. Thomas S. Monson, “Windows,” *Ensign*, Nob. 1989, 69.
17. Thomas S. Monson, “The Way of the Master,” *Liahona*, Ene. 2003, 4.

PAGSERBISYO SA NANGINA- HANGLAN

Ni Al VanLeeuwen

Sa dihang freshman pa ko sa kolehiyo, dali kong nakahigala og duha ka laing freshman, usa ka rantsero ug usa ka mag-uuma. Daw walay sama ang among panagkauban—duha ka praktikal nga mga lalaking taga-kasadpan sa U.S. ug usa ka pas-pas mosulti nga taga-siyudad sa East Coast. Human og gradwar sa kolehiyo, sila namauli para mag-ranso ug mag-uma, ug ako nagtrabaho sa dagkong kompaniya.

Kami magpahibaloay sa among kahimtang pinaagi sa tinuig nga mga kard sa Pasko ug panagsa nga tawag diha sa telepono. Sa dihang kapin sa 30 na ko, nakaserbisyo nako og kaduha isip Scoutmaster. Sa wala madugay, samtang patapos na ko sa ikaduha nga “hugna sa pagserbisyo” isip assistant nursery leader, ang duha nako ka higala nagserbisyo sa bishopric. Sa nagpadayon ang panahon, natintal ko sa pagkompara sa akong calling ngadto sa calling sa akong mga higala, ug misugod ko sa pagbati nga wala kinahanglana ug pinasagdan.

Sa dihang kapin na ko sa 40, ang paghatag og mga calling sa pagpangulo ngadto sa uban nakahasol kanako sulod sa pipila ka adlaw. Matag higayon nga adunay usa ka tawo nga gitawag sa usa ka posisyon sa pagpangulo sa ward o stake, si Satanas mohunghong kanako nga ako dili takus o kulang og pagtuo nga gikinahanglan ana nga calling. Makabuntog ko sa ingon niining panghunahuna pinaagi sa pag-ampo ug pagtuon, apan nanlimbasug ko sa bili sa kaugalingon. Ang “pagka elder lang” ug pag-referee sa mga basketbol sa mga batan-on sa edad nga 50 samtang ang akong mga higala nagserbisyo sa mga stake presidency, dili mao ang akong gihunahuna nga buhaton niini nga edad.

Dayon miabut ang kasinatian nga nakapa-usab sa akong pagsabut sa ebanghelyo. Usa ka Dominggo gitabangan nako akong asawa sa iyang klase sa Primary nga mga siyete anyos nga hilabihan ka aktibo. Sa dihang



nagsugod ang panahon sa pagpakigbahin sa Primary, nakamatikod ko sa usa ka sakop sa klase nga mitikubo diha sa iyang lingkuranan ug klaro nga dili maayo ang gipamati. Ang Espiritu mihunghong nga kinahanglan niya ang paghupay, busa ako siyang gitaparan ug hinayang gipangutana kon unsa ang problema. Wala siya motubag apan ingon og gisakitan gayud siya, mao nga mikanta ko og hinay.

Ang Primary nagkat-on og bag-ong kanta, ug sa dihang amo kining gikanta, “Kon maminaw sa dughan ko mabati ko Siya,”¹ Misugod ko sa pagbati sa labing talagsaon nga kahayag ug kainit nga mipuno sa akong kalag. Mibati ko nga gigakos sa mahangturong gugma. Nakasabut ko nga ang Langitnong Amahan nakadungog sa pag-ampo niining batan-ong babaye ug anaa ko didto sa paghupay nga gusto Niyang buhaton sa batang babaye. Nakasabut ko sa espirituhanong paagi, ug nakabaton ko og personal nga pagpamatuod sa gugma sa atong Manluluwas alang kaniya, sa tanan Niyang mga anak, ug alang kanako. Nasayud ko nga misalig Siya kanako sa pagserbisyo sa usa ka tawo nga nanginahanglan, ug anaa ko kon asa Niya buot ako maanaa. Nakakat-on ko nga kita Iyang mga kamot kon kita moserbisyo sa nanginahanglan.

Naglipay ko sa bisan unsang oportunidad nga makaserbisyo, ug naningkamot ko nga magpabiling takus aron mabati ang mga pagdasig sa Espiritu ug maanaa kon asa buot sa Langitnong Amahan kon ang usa sa Iyang mga anak nanginahanglan og serbisyo. ■

MUBO NGA SULAT

1. Sally DeFord, “Kon Maminaw sa Dughan Ko,” *2011 Outline alang sa Panahon sa Pagpakigbahin*, 28.



PILA KA MGA TAWO ANG IMONG NATABANGAN?

“Tingali kon kita moatubang sa atong Tiglalang, kita dili pangu-tan-on, ‘Pila ka posisyon ang imong nahuptan?’ apan, ‘Pila ka mga tawo ang imong natabangan?’ Sa pagkatinuod, dili ka makahigugma sa Ginoo hangtud serbisyoan nimo siya pinaagi sa pagserbisyo sa iyang katawhan.”

Presidente Thomas S. Monson, “Faces and Attitudes,” *New Era*, Sept. 1977, 50.



London, England



Bangalore, India



Pagsaulog sa

Ni Kathryn H. Olson
Welfare Services

Ang pagpanglimpyo sa mga building, pag-mop sa mga salug, pagtudlo sa mga estudyante, pagpundok og pagkaon, pagtabang sa mga milalin, pagbisita sa mga biyuda, pag-ibot sa sagbut sa nataran, ug pamin-tal og mga eskwelahan. Kini mao lamang ang pipila sa daghang mga proyekto sa pagserbisyo nga gihimo sa miaging tuig sa mga miyembro sa Simbahan isip tubag sa pagdapit sa Unang Kapangulohan sa pagpahigayon og adlaw sa pagserbisyo isip pagsaulog sa ika-75 nga anibersaryo sa programa sa welfare. Kini nga mga proyekto klarong nakaapekto niadtong miserbisyo ug giserbisyon. Daghang mga komunidad sa tibuok kalibutan ang milambo.

London, England

Ang mga miyembro sa Simbahan sa London nagsaulog sa anibersaryo pinaagi sa pagtabang og limpyo sa Tottenham, siyudad nga nakasinati og mga riot niadtong Agosto 2011. Sa regional park, ang mga bolunter namutol sa mga sagbut, naghimo og mga flower bed, ug nanglimpyo.

Ang mga miyembro miserbisyo usab sa ospital sa mga bata, diin sila milimpyo sa

agianan sa hardin ug mihimo sa nataran sa ospital nga mas nindot alang sa mga bata ug sa ilang pamilya. Si Charlotte Illera mitabang sa paghan-ay sa proyekto. “Kadto sa tinuoray lisud nga buluhaton, apan kadto nahimong makapalipay usab nga buluhaton,” miingon siya. “Bisan ang gamay nga butang sama sa pagpanihig makatabang kaayo. Dili kinahanglan nga kamo adunay talagsaong mga kahanas. Ang gagmay nga mga butang makahimo og dakong kalainan sa ubang mga tawo.”

Si Rudi Champagnie mipakigbahin sa iyang panglantaw sa inspirasyon sa pagdapit sa Unang Kapangulohan sa pagserbisyo: “Sa akong hunahuna kini nga pinadayag mas makapahiusa kanato—masuod kita sa komunidad, sa pakighimamat og bag-ong mga tawo.” Siya mipadayon, “Nga nakita ang Simbahan nga nanginlabut sa komunidad usa ka nindot kaayo nga butang. Ang mahilakip niini gani mas espesyal. Kini nakapalig-on sa akong pagpamatuod, ug nakahatag kanako og tinguha nga mas magkugi pa.”

Hong Kong, China

Ang mga hamtong nga lider sa kabatan-onan sa Hong Kong China Stake mihangyo



Bujumbura, Burundi

Adlaw sa Pagserbisyo

sa youth council sa pagpili og ilang proyekto sa pagserbisyo. Human makita sa mga batan-on ang panginahanglan sa komunidad, sila mihukom sa pagtudlo sa mga bata gikan sa kabus nga mga pamilya sa usa ka lokal nga eskwelahan. Mga 125 ka mga batan-on ang mitudlo sa sobra sa 80 ka mga estudyante kabahin sa pagpalambo sa mga talento, paghimo og makapahimsug nga pagkaon, paghimo og mga panagpundok sa pamilya, ug pagmugna og tinuoray nga pakighigala.

“Kini dili lang kausa nga higayon nga impluwensya,” miingon si Anita Shum, ang stake Young Women president. “Ang gibuhay sa mga batan-on ngadto sa mga bata adunay mahang-turong epekto.” Siya midugang nga ang mga batan-on adunay nindot nga mga panumdu-man ug mga kasinatian nga mopanalangin kanila sa kahangturang.

Accra, Ghana

Ang mga miyembro sa Accra, Ghana, miapil sa adlaw sa pagserbisyo pinaagi sa pagpamin-tal sa mga eskwelahan, pagpanglimpyo sa ka-dalanan ug mga gutter, ug nanglimpyo sa mga nataran sa mga ospital ug klinika.

Si Emma Owusu Ansah sa Accra Ghana Christiansborg Stake nahilakip sa pagplano sa ilang adlaw sa pagserbisyo. “Ang pagtinaba-ngay isip miyembro sa Simbahan nakapahiusa kanamo ug nakapasayon sa pagsunod sa baruganan sama sa pagserbisyo,” miingon siya. Pagkahuman sa proyekto, ang mga miyem-bro nagpundok aron mopakigbahin sa ilang pagpamatuod. Si Sister Ansah misulti, “Human sa pagpaminaw sa tagsa-tagsa ka mga pagpa-matuod, nakaamgo ko sa kadako nga mawala kon kita dili moserbisyo sa uban.”

Sa dihang si Presidente Henry B. Eyring, Unang Magtatambag sa Unang Kapangulohan, midapit sa pag-apil sa adlaw sa pagserbisyo, siya namulong sa makapahiusa nga epekto tungod sa mga proyekto: “Ang . . . baruganan sa ebanghelyo nga nahimo nakong giya sa buhat sa welfare mao ang gahum ug panalangin sa panaghiusa. Kon kita maghiusa sa pagserbisyo sa mga tawo nga nanginahanglan, ang Ginoo mohiusa sa atong mga kasingkasing.”¹

Córdoba, Argentina

Bisan pa sa ulan niadtong Oktubre 1, 601 ka mga Santos sa Ulahing mga Adlaw gikan



Falls Church, Virginia, USA



MGA PAGBATI SA GUGMANG PUTLI

“Ang Ginoo motuman sa Iyang mga saad kaninyo kon kamo motuman sa inyo. Samtang kamo nagserbisyo sa uban alang Kaniya, ipabati Niya kaninyo ang Iyang gugma. Ug sa kadugayan, ang mga pagbati sa gugmang putli mahimong kabahin sa pagka-kamo. Ug inyong madawat ang kasiguroan sa pasalig ni Mormon diha sa inyong kasingkasing samtang kamo magpa-dayon sa pagserbisyo sa uban niining kinabuhi nga ang tanan maayo ra kaninyo.”

Presidente Henry B. Eyring, Unang Magtatambag sa Unang Kapangulohan, “Usa ka Saksi,” *Liahona*, Nob. 2011, 68.

sa lima ka stake sa Córdoba, Argentina, midonar og 10,234 ka oras sa pagserbisyo sa nursing home. Ang mga miyembro mihatag og mga sinina, pagkaon ug mga hygiene kit. Sila usab naghardin, nagpintal sa mga bong-bong ug lingkuranan, ug nagpasundayag og mga talento. Pipila ka mga sister miboluntaryo sa pagpanindot sa buhok, tiil, ug kamot.

“Nasayud ko nga ang proyekto dili lang tabang alang kanila apan sa kanako usab,” miingon ang 14-anyos nga si Rocío B. human sa proyekto. “Nasayud ko nga gibuhay nako ang matarung nga butang ug ang Langitnong Amahan nahimuot kanako.”

São Paulo, Brazil

Ang mga miyembro sa São Paulo Brazil Stake nadasig sa pagkolekta og asukal, mantika, bugas, ug beans ug gidonar sa duha ka charities. Dayon ilang gibansay ang mga representante gikan sa charities unsaon pagtipig og pagkaon. Ang mga miyembro miboluntaryo usab sa pagbansay sa mga sakop sa stake ug komunidad sa edukasyon, panalapi, ug pagpanarbaho sa pagtabang kanila sa pagpalambo og mga kahanas nga gikinahangalan aron madawat sa trabaho.

“Ang komunidad nga among gidapit nalipay sa buhat sa Simbahan. Daghan ang wala kaila namo, apan miuli sila nga may maayong pagbati,” miingon si Kátia Ribeiro. “Sa mga miyembro, may diwa sa panaghiusa ug serbisyo, ug niadtong among giserbisuhan, adunay diwa sa pagkamapasalamaton.”

Falls Church, Virginia, USA

Ang mga miyembro sa Falls Church, Virginia, USA, mibati og kalipay nga naghiusa og serbisyo sa duha ka homeless shelter. Nagnusnus sa bong-bong, si Adeana Alvarez miingon sa kaubang miyembro, “Bati kaayo ang akong semana, ug nindot kaayo nga akong inusnus ang akong kalagot niining bong-bong! Kitang tanan nanginahanglan og serbisyo panagsa sa atong kinabuhi, ug nindot nga buhaton kini ngadto sa uban.”

Laing miyembro sa ward, si Anne Sorensen, misulti, “Nindot kini nga paagi nga malakip sa komunidad. Karon mas ganahan kong masayud unsa ang nahitabo niadtong organisasyon. Matag higayon nga moanhi ko, maghunahuna ko sa mga tawo nga mitambong sa mga klase ug naglaum nga ang among gibuhay dinhi makahatag kanila og paagi nga mobati nga sila wala mag-inusara sa pagpalambo sa ilang kaugalingon.”

Tokorozawa, Japan

Sa usa ka eskwelahan sa elementarya sa Tokorozawa, ang mga miyembro mipresentar og seminar unsaon pagtipig og pagkaon sa 50 ka mga ginikanan ug magtutudlo. Tungod sa linog niadtong Marso 2011, ang mga lider sa komunidad naghinam-hinam unsaon pagpangandam alang sa natural nga mga kalamidad, ilabi na unsaon pagtipig og pagkaon sa taas nga panahon.

“Bisan pa sa dakong linog mga nahitabo sa silangang Japan, wala koy gibuhay sa pagpangandam,” miingon ang usa ka partisipante. “Nalipay ko nga nakakat-on ko niini. Gusto kong makakita og lugar nga katipigan og pagkaon, ug gusto kong protektahan ang akong pinalanggang pamilya.”

Si Akihito Suda, miyembro sa Musashino Japan Stake nakaobserbar nga ang Kahayag ni Kristo mitandog sa komunidad samtang ang mga miyembro mipakita sa ilang pagpangandam sa krisis. “Si Kristo mao ang Kahayag sa Kalibutan,” siya miingon. “Ang Iyang mga pagtulun-an midan-ag sa komunidad.”

Tallinn, Estonia

Ang mga miyembro sa Tallinn migahin og usa ka adlaw sa pagtabang sa nanginahanglang komunidad sa paglimpyo sa ilang panimalay. Pipila sa mga partisipante nagbugha og kahoy ug nagpala og uling, samtang ang uban naglimpyo sa mga karpit, nag-ilis og kurtina, ug naglimpyo sa mga bintana ug bong-bong.

Si Maila Chan uban sa iyang pamilya mibisita og tigulang nga babaye ug nagbugha og kahoy para niya. “Isip inahan nalipay kaayo ko nga ang among pamilya adunay talagsang kasinatian,” siya miingon. “Nindot kaayo nga samtang nagserbisyo sa uban, inyong kalimtan ang inyong mga problema. Nasayud ko nga samtang nagserbisyo sa uban, kita nagserbisyo lamang sa atong Dios.”

Si Margit Timakov nakaobserbar usab, “Kon dili nako unahan ang akong mga buluhaton ug mopasalig gayud sa pagtabang sa uban, nasabtan nako ang gahum sa sakripisyo. Dili na kinahanglan nga mangutana kon ngano o may mahimo ba kita. Kinahanglan lang ta nga motabang. Motabang ta kay kita nagpakabana.

Motabang ta kay gusto tang mosunod sa ehemplo ni Kristo.”

Ang Bunga sa Inyong mga Kahago

Ang mga pagpamatuod niadtong miserbisyo sa ilang komunidad sa tibuok kalibutan nagtudlo kanato nga pinaagi sa pagserbisyo, ang atong pagpamatuod molig-on ug mas maayo ang atong pagbati sa kaugalingon. Si Presidente Eyring mimatuod nga kita mapanalanginan sa atong pagserbisyo: “Sa ngalan sa Agalon akong ipaabut ang pasalamat alang sa inyong buhat sa pagserbisyo sa mga anak sa atong Langitnong Amahan. Nakaila Siya kaninyo, ug nakita Niya ang inyong paningkamot, kakugi, ug sakripisyo. Ako nag-ampo nga Siya mohatag kaninyo og panalangin nga makita ang bunga sa inyong mga paghago diha sa kalipay niadtong inyong natabangan alang sa Ginoo.”² ■

MUBO NGA MGA SULAT

1. Henry B. Eyring, “Mga Oportunidad sa Paghimo og Maayo,” *Liahona*, Mayo 2011, 25.
2. Henry B. Eyring, *Liahona*, Mayo 2011, 26.

PAGTUBAG SA MGA PANGUTANA

Sa pagkakita sa Mormon Helping Hands sa komunidad, ang pipila naghunahuna kon ang mga miyembro sa Simbahan motabang lang ba sa kaubang miyembro o sa laing tinuohan usab. Kita, siyempre, motabang sa duha. Kita naningkamot sa pagsunod sa ehemplo sa Manluluwas sa pagserbisyo, bisan sa pag-rake sa mga dahon sa nataran sa silingan o sa pagpadala ug pag-apud-apud og toneladang suplay aron sa pagtubag sa natural nga mga kalamidad. Kita nagtinguha sa pagtabang sa uban, dili igsapayan ang ilang tinuhoan o kultura.

PAGKAILA DIHA SA MGA KOMUNIDAD

Usa sa komon nga aspeto sa mga proyekto sa adlaw sa pagserbisyo sa tibuok kalibutan mao ang epekto niini sa lokal nga mga komunidad. Daghang milabay ang nangutana sa mga partisipante kabahin sa Simbahan, ug ang mga miyembro mipakigbahin sa ilang pagpamatuod.

Sa pipila ka bahin sa kalibutan, ang mga opisyal sa gobyerno miila sa mga paningkamot sa mga miyembro sa Simbahan. Sama pananglit, sa interbyu sa radyo kabahin sa adlaw sa pagserbisyo, ang chief sa Kisanga quarter sa Lubumbashi, Democratic Republic of the Congo, nanawang sa ubang mga relihiyon sa pagsunod sa ehemplo sa “mga Mormons” sa pagserbisyo sa komunidad.

Sa serbisyo nga gihatag sa 300 ka mga miyembro

sa Simbahan sa greater London, ang mayor, si Boris Johnson, miingon, “Karon, nindot kaayong tan-awon ang mangihunahunaon sa komunidad nga taga-London—mga bolunter—nga nanagpundok.”

Si Gobernador Dannel Malloy sa Connecticut, USA, ug Gobernador Robert McConnell sa Virginia, USA, miisyu og pamahayag sa pagpasidungog sa mga adlaw sa pagserbisyo sa ilang mga estado. Si Gobernador Malloy miingon sa iyang pamahayag, “Kami mapasalamaton sa Ang Simbahan ni Jesukristo sa mga Santo sa Ulahing mga Adlaw sa ilang pagserbisyo sa uban ug [sa ilang] pagdapit sa mga lumulupyo sa tanang tinuhoan ug background sa pagsaulog uban kanila sa ilang anibersaryo sa tuig sa pagserbisyo.”





**Ni Elder
Jeffrey R. Holland**

Sa Korum sa Napulog
Duha ka mga Apostoles

PANAGHIUSA

alang sa Kawsa ni Kristo

*Kini nga artikulo kinutlo gikan sa pamulong diha sa
Siyudad sa Salt Lake niadtong Marso 10, 2011, ngadto
sa grupo sa nasyonal nga Kristiyanong mga lider.*

Mga higala, nasayud mo unsa ang akong nasayran—sa modernong kalibutan adunay daghang sala ug pagkaubus sa moral nga nakaapekto sa tanan, ilabi na sa mga batan-on, ug kini nagkagrabe matag adlaw. Kamo ug ako nabalaka pag-ayo sa pagkatap sa pornograpiya ug sa kakabus, pang-abuso ug aborsyon, sekswal nga sala (ang heterosexual ug homosexual), kabayolente, kabagis, pagdagsal, ug tintasyon, ang tanan mahitabo sama kaduol diha sa cell phone sa inyong anak nga babaye o sa iPad sa inyong anak nga lalaki.

Sigurado adunay paagi alang sa matarung nga katawhan, kinsa nahigugma sa Dios ug nagdala sa ngalan ni Kristo nga magkahiusa alang sa kawsa ni Kristo ug batok sa pwersa sa sala. Niini kita magmaisugon ug magma-tuohon, kay “kon ang Dios dapig kanato, kinsa pa man ang batok kanato?” (Mga Taga-Roma 8:31).

Kamo nagserbisyo ug nagsangyaw, nagtudlo ug naghago niana nga pagsalig, ug ako usab. Sa pagbuhat niini, nagtuo ko nga kita makasalig usab sa sunod nga bersikulo nga anaa sa Mga Taga-Roma: “Siya nga wala

PAGTUBAG SA MGA PANGUTANA


*Mga Kristiyanong mga lider
ba ang mga Santos sa Ulahing mga Adlaw?
Siyempre. Sama sa gipasabut ni Elder Holland,
“Kita nagtuo sa bantugang Jesus kinsa milakaw sa abugong mga dalan sa Balaang Yuta ug midklarar nga Siya ug si Jehova sa Daang Tugon, mao ra nga Dios.”*

magpahigawas sa iyang kaugalingong Anak, kondili mitugyan hinoon kaniya alang kanatong tanan, dili ba ihatag usab niya kanato ang tanang mga butang uban kaniya?” Nagtuo gyud ko nga kon kitang tanan sa tibuok kalibutan mas magkugi nga *dili* mabulag ang *usag usa* gikan sa “gugma ni Kristo,” kita mahimong “labaw pa ka mananaug pinaagi kaniya nga nahigugma kanato” (Mga Taga-Roma 8:32, 35, 37).

Panaghisgut sa Teyolohiya

Ang mga evangelical ug mga Santos sa Ulahing mga Adlaw wala magkauyon kanunay. Sugod sa ika-19 nga siglo sa dihang si Joseph Smith nakadawat og langitnong pagpa-dayag sa iyang pagkabatan-on ug maisugong midklarar niini, ang atong pagtinagdanay sa kanunay dili mabination.

Apan, makapahibulong—ug nagtuo gyud ko nga kini kabahin sa balaanong pag-organisar sa mga panghitabo niining samok nga panahon—ang LDS ug batid nga mga evangelical ug mga lider sa simbahan ingon og gihiusa sukad sa hinapos sa mga 1990, nga sa akong hunahuna nahimong



*Sigurado adu-
nay paagi alang
sa matarung
nga katawhan,
kinsa nahi-
gugma sa Dios
ug nagdala sa
ngalan ni Kristo
nga magkahi-
usa alang sa
kawsa ni Kristo
ug batok sa
pwera sa sala.*

mahagiton ug mabungahon nga panaghisgut sa teyolohiya. Kini usa ka matinuoron nga paningkamot aron magsinabtanay, usa ka buhat sa pagpawala sa mga istorya-istorya ug mga sayop nga pagsabot sa *duha* ka grupo, usa ka buhat sa gugma diin ang mga partisipante nadasig ug natandog sa hilum nga pagbati nga mas lalum pa kaysa ordinaryong pagpakigbahin sa pagtuo.

Ang una niadtong pormal nga panaghisgut nahitabo sa tingpamulak sa 2000 sa Brigham Young University. Sa pagsugod sa panaghisgut, klaro nga ang mga partisipante nangita og usa ka sumbanan, usa ka modelo, usa ka punto sa tamdanan. Kini ba mga komprontasyon, mga argumento, mga debate? Aduna ba kanila mananaug ug mapilde? Unsa man kaha sila ka prangka ug kamatinuoron? Pipila sa mga Santos sa Ulahing mga Adlaw naghunahuna: Kining “laing mga grupo” naglantaw ba niining panag-istoryahanay nga atong “pagsulay-sulay” aron maapil sa grupo nga Kristiyano? Kini ba usa ka paningkamot sa “pag-ayo” sa Mormonismo, nga kini mas Kristiyano sa tradisyonal nga paagi, mas dawaton sa mga nagduha-duha?

Ingon man, pipila sa mga evangelical naghunahuna: Kadto bang “laing mga grupo” matinuoron, o kini laing paagi sa misyonaryo nga pagsangyaw? Ang tawo ba mahimong Kristiyano sumala sa Bag-ong Tugon apan wala mosunod sa mga pagtuo [creed] nga gihimo sa tradisyonal nga Kristiyanismo? Usa ka pangutana nga padayong anaa sa duha ka grupo mao nga kon unsa ka daghan ang “sayop nga teyolohiya” nga pun-an sa grasya sa Dios? Sa wala madugay, kini nga mga isyu nahimong kabahin sa panaghisgut, ug sa proseso, ang tensyon nagkaanam og kawala.

Ang pagbati nga pormalidad sa sinugdanan nahulipan sa mahigalaong pagka-inato, usa ka tinuoray nga panag-igsoonay, may pagkamabination sa dili pagsinabtanay, pagtahud sa managlahi nga panglantaw, usa ka pagbati nga may responsibilidad nga tinuorayng mosabot (kon dili mahiuyon) ngadto sa ubang mga pagtuo—usa ka responsibilidad sa pagpresentar sa kaugalingong mga doktrina ug mga praktis sa eksaktong paagi ug mosabot sa uban sa samang paagi. Ang



Kami andam nga mahiusa sa higalang mga evangelical sa Kristiyanong panaghiusa nga paningkamot sa paglig-on sa mga pamilya ug kaminyoon, manawagan og moralidad sa media, maningkamot sa paghatag og tawhanong paghupay panahon sa natural nga mga kalamidad, pagsulbad sa kahimtang sa mga kabus, ug sa paggarantiya sa kagawasan sa relihiyon nga motugot kanato nga mamulong kabahin sa mga butang sumala sa Kristiyanong konsyensya.

panaghisgut nahimong makalingaw nga “pagtahud sa pagtuo sa uban.”¹

Nahibaloan nga ang Santos sa Ulahing mga Adlaw adunay lahi nga estruktura sa pamunoan sa katungod ug organisasyon kay sa kadaghanang mga tinuohan, walay opisyal nga representante sa Simbahan ang miapil niining pakigpulong, ni adunay eklesyastikanhon nga pasabot niini kanila. Sama kaninyo, kami walay tinguha nga ikompromiso ang doktrinal nga kalainan o walaon ang pagtuo nga nakapahimo kanato kon si kinsa kita. Kami nagmatinguhaon, hinoon, nga dili masaypan sa pagsabot, dili akusahan sa mga pagtuo nga wala namo hupti, ug dili kami mamuhi sa pasalig ngadto kang Kristo ug sa Iyang ebanghelyo, ilabi na nga dili dauton sa proseso.

Dugang pa, kami nangita og pagkasu-sama ug kauban sa “paghimo” sa buhat sa pagpangalagad. Kami andam nga mahiusa sa higalang mga evangelical sa Kristiyanong panaghiusa nga paningkamot sa paglig-on sa mga pamilya ug kaminyoon, manawagan og moralidad sa media, maningkamot sa paghatag og tawhanong paghupay panahon sa natural nga mga kalamidad, sa pagsulbad sa kahimtang sa mga kabus, ug sa paggarantiya sa kagawasan sa relihiyon nga motugot kanato nga mamulong kabahin sa mga butang sumala sa Kristiyanong konsyensya kabahin sa problema sa katilingban sa atong panahon. Kabahin niini, kinahanglang dili moabut ang panahon nga kamo o ako o bisan kinsang lider sa simbahan niining nasud did-an sa pagsangyaw diha sa iyang pulpito nianang iyang gituohan nga tinuod. Apan, tungod sa bag-ohay nga sociopolitical nga mga panghitabo ug legal nga mga hagit karon gumikan niini, ilabi na kabahin sa kabalaan sa kaminyoon, kana nga adlaw moabut gawas kon kita molihok karon sa pagpakgang niini.²

Kon mas daghan ug mas nagkahiusa ang mga tingog sa Kristiyano, kita mas makapahimo niining mga butanga. Kabahin niana kinahanglan natong hinumduman ang pasidaan sa Manluluwas nga ang “balay mapukan [batok sa iyang kaugalingon]”—ang balay nga walay panaghiusa dili makabuntog sa nagkahiusang kaaway nga kanunay adunay dautang tumong (tan-awa sa Lucas 11:17).



Alang sa dugang nga impormasyon kabahin sa mga Santos sa Ulahing mga Adlaw isip Kristiyano, tan-awa sa “About Mormons” ubos sa Frequently Asked Questions sa Mormon.org; “Christianity: Following Jesus in Word and Deed” nga anaa sa News Releases sa MormonNewsroom.org; ug Gordon B. Hinckley, “A Prophet’s Testimony,” Ensign, Mayo 1993, 93.

Si Kristo nga Atong Gibalaan Pagtahud

Sa paghisgot sa pipila niini nga kasaysayan ug nagtinguha nga kita dili maglalis sa mga butang nga dili kinahanglang lalisan, gusto kong mopamatuod kaninyo, akong mga higala, kabahin ni Kristo nga among gibalaan pagtahud ug gisimba sa Ang Simbahan ni Jesukristo sa mga Santos sa Ulahing mga Adlaw. Kami nagtuo sa bantugang Jesus kinsa milakaw sa abugon nga mga dalan sa Balaang Yuta ug mideklarar nga Siya ug si Jehova sa Daang Tugon, mao ra nga Dios. Kami modeklarar nga Siya hingpit nga Dios sa Iyang pagkabalaan ug tawo gayud sa Iyang mortal nga kasinatian, ang Anak nga usa ka Dios ug ang Dios nga usa ka Anak; nga Siya, sa pinulongan sa Basahon ni Mormon, “ang Dios sa Kahangturan” (ulohang pahina sa Basahon ni Mormon).

Kami mopamatuod nga Siya naghiusa uban sa Amahan ug sa Espiritu Santo, ang Tulo Naghiusa: usa sa espiritu, usa sa kalig-on, usa sa katuyoan, usa sa tingog, usa sa himaya, usa sa kabubut-on, usa sa kaayo, ug usa sa grasya—usa sa tanang porma ug parte sa panaghiusa *gawas* lang Sila managlahi nga personahe (tan-awa sa 3 Nephi 11:36). Kami mopamatuod nga si Kristo natawogikan sa Iyang balaan nga Amahan ug birhen nga inahan, nga sa iyang edad nga 12 anyos pataas, Siya anaa sa buluhaton sa Iyang Amahan, nga sa pagbuhat niini, Siya nagpuyo og hingpit, walay sala nga kinabuhi ug naghatag og sumbanan sa tanan nga moduol Kaniya alang sa kaluwasan.

Kami mopamatuod sa matag wali nga Iyang gihatag, sa matag ampo nga Iyang gilitok, sa matag milagro nga Iyang gihimo, ug sa pagtubos nga Iyang gibuhat. Niining naulahi kami mopamatuod nga aron sa pagtuman sa balaanong plano sa atong kaluwasan, Iyang gidala ang

tanang sala, kaguol, ug kasakit sa kalibutan, migawas ang dugo sa matag lungag sa panit tungod sa kasakit, nagsugod sa Getsemani ug namatay diha sa krus sa Kalbaryo isip puli nga halad alang sa mga sala ug makakasala, lakip kanato.

Sa sinugdanan sa Basahon ni Mormon usa ka propeta nga Nephite ang “nakakita nga [si Jesus] gituboy diha sa krus ug gipatay tungod sa mga sala sa kalibutan” (1 Nephi 11:33). Sa wala madugay ang Ginoo mimatuod: “Tan-awa ako mihatag nganha kaninyo sa akong ebanghelyo, ug kini mao ang ebanghelyo diin Ako mihatag nganha kaninyo—nga Ako mianhi dinhi sa kalibutan aron sa pagbuhat sa kabubut-on sa akong Amahan, tungod kay ang akong Amahan mipadala kanako. Ug ang akong Amahan mipadala kanako nga Ako unta ituboy nganha sa krus” (3 Nephi 27:13–14; tan-awa usab sa D&P 76:40–42). Tinuod, kini gasa sa Espiritu “aron masayud nga si Jesukristo mao ang Anak sa Dios, ug nga siya gilansang sa krus alang sa mga sala sa kalibutan” (D&P 46:13).

Kami modeklarar nga sa paglabay sa tulo ka adlaw gikan sa Iyang Paglansang sa Krus, Siya nabanhaw sa mahimayaong imortalidad, ang unang bunga sa Pagkabanhaw, sa ingon gibuntog ang pisikal nga kamatayon ug espiritwal nga gapos sa impyerno, naghatag og imortal nga umaabot sa lawas ug sa espiritu, usa ka umaabot nga mahitabo sa hingpit nga kahimayaon ug kahalangdon pinaagi sa pagdawat Kaniya ug sa Iyang ngalan isip bugtong “ngalan sa silong sa langit nga gikahatag ngadto sa mga tawo, nga pinaagi niini maluwas kita.” Wala gayuy, “kaluwasan pinaagi kang bisan kinsa” (Mga Buhat 4:12).

Kami modeklarar nga Siya mobalik dinhi sa yuta,

***Kini gasa sa Espiritu
“aron masayud
nga si Jesukristo
mao ang Anak sa
Dios, ug nga siya
gilansang sa krus
alang sa mga sala
sa kalibutan”***



niining higayon nga gamhanan, halangdon, ug mahimayaon, sa paghari isip Hari sa mga hari ug Ginoo sa mga ginoo. Kini mao ang Kristo, nga among gisimba, kansang grasya kami mosalig sa hingpit ug sa dayag nga paagi, ug ang “Magbalantay ug Magdudumala sa [atong] mga kalag” (1 Pedro 2:25).

Kausa si Joseph Smith gipangutana, “Unsa ang mga sukaranang baruganan sa imong relihiyon?” Siya miingon, “Ang sukaranan nga mga baruganan sa atong relihiyon mao ang pagpamatuod sa mga Apostoles ug mga Propeta, mahitungod ni Jesukristo, nga Siya namatay, gilubong, ug mibangon sa ikatulong adlaw, ug mikayab ngadto sa langit; ug sa ubang mga butang nga may kalabutan sa atong relihiyon mga sumpay lamang niini.”³

Kasagaran, ang mga Santos sa Ulahing mga Adlaw naila nga mga kugihan, manggihunahunaon sa trabaho nga matang sa tawo. Alang kanamo, ang mga buhat sa pagkamatarung, nga among gitawag og “mapahinunguron nga pagkadisipulo,” usa ka siguradong sukdanan sa katinuod sa among hugot nga pagtuo. Kami nagtuo sama ni Santiago, ang igsoon ni Jesus, nga ang tinuod nga hugot nga pagtuo makita sa pagkamatinud-anon (tan-awa sa Santiago 2). Kami nagtudlo nga kadtong Puritans mas duol sa kamatuoran sa dihang nagdahum sila nga kadtong anaa sa pakigsaad nagpuyo og “matarung nga kinabuhi” (D&P 20:69).

Ang kaluwasan ug kinabuhing dayon walay bayad (tan-awa sa 2 Nephi 2:4); sa tinuod, kini ang labing mahinungdanon sa tanan nga mga gasa sa Dios (tan-awa sa D&P 6:13; 14:7). Bisan pa man, kami nagtudlo nga ang tawo kinahanglang mangandam sa pagdawat niining mga gasa pinaagi sa pagdeklarar ug pagpakita og “hugot nga pagtuo diha sa Ginoong Jesukristo”

(Mga Artikulo sa Hugot nga Pagtuo 1:4)—pinaagi sa pagsalig sa “mga maayo nga buhat, kalooy, ug grasya sa Balaang Mesiya” (2 Nephi 2:8; tan-awa usab sa 2 Nephi 31:19; Moroni 6:4). Alang kanamo, ang bunga niana nga hugot nga pagtuo naglakip sa paghinulsol, pagdawat sa mga pakigsaad ug ordinansa sa ebanghelyo (lakip ang bunyag), ug mapasalamatong kasingkasing nga nagdasig kanato nga mopalayo sa tanang dautan, sa “pagpas-an sa [atong] krus matag adlaw” (Lucas 9:23), ug sa pagsunod sa Iyang mga sugo—*tanan* Niyang mga sugo (tan-awa sa Juan 14:15). Kami nagmaya uban ni Apostol Pablo: “Salamat sa Dios, [kinsa] naghatag kanato sa kadaugan pinaagi sa atong Ginoong Jesukristo” (1 Mga Taga-Corinto 15:57). Niana nga diwa, usa sa mga propeta sa Basahon ni Mormon misulat, “Kami naghisgot mahitungod kang Kristo, kami nalipay diha kang Kristo, kami nagsangyaw mahitungod kang Kristo, kami nanagna mahitungod kang Kristo . . . nga ang among mga anak mahimo nga masayud sa unsa nga tinubdan sila mahimo nga mangita alang sa kapasayloan sa ilang mga sala . . . [ug] molantaw unta sa umaabut ngadto niana nga kinabuhi nga anaa diha kang Kristo” (2 Nephi 25:26, 27).

Naglaum ko nga kining pagsaksi nga akong gipamatud-an kaninyo ug sa kalibutan makatabang kaninyo nga makasabut sa dili mahulagway nga gugma nga among gibati alang sa Manluluwas sa kalibutan dinhi sa Ang Simbahan ni Jesukristo sa mga Santos sa Ulahing mga Adlaw.

Usa ka Panawagan sa Kristiyanong Konsensya

Sumala sa atong gipakita nga susamang debosyon sa Ginoong Jesukristo ug sa mga hagit nga giatubang nato sa

katilingban, siguradong adunay paagi nga kita magkahiusa sa nasyonal—o internasyonal—nga panawagan sa Kristiyanong konsensya. Pipila ka mga tuig ang milabay si Tim LaHaye misulat:

“Kon ang relihiyusong mga Amerikano magtinabangay alang sa moral nga kaayohan sa tanan, kita magmalampuson sa pag-establisar og usab sa moral nga mga baruganan sa publiko nga gilauman sa atong katigulangan nga gigarantiyahan sa Konstitusyon [sa Estados Unidos]. . . .

“ . . . Ang tanang relihiyusong katawhan sa atong nasud kinahanglang motahud sa ubang relihiyon ug sa ilang pagtuo. Dili kinahanglang dawaton nato ang ilang pagtuo, apan tauron nato ang katawhan ug makaamgo nga kita daghan og pagkapareha sa usag usa kaysa mga kalibutanon niining nasud. Panahon na nga magkahiusa ang tanang relihiyusong mga tawo batok sa atong komon nga kaaway.”⁴

Aron masiguro, adunay risgo sa pagkat-on og usa ka bag-ong butang kabahin sa usa ka tawo. Ang bag-ong mga ideya makaa-pekto sa kaarang mga panglantaw, ug sa ingon ang bag-ong panghunahuna sa atong panglantaw sa kalibutan mahitabo gayud. Kon kita molantaw lapas sa kolor, kagikan, higala, simbahan, sinagoga, mosque, pagtuo ug pahayag sa pagtuo, ug kon kita maningkamot nga molantaw kon si kinsa ug unsa sila—mga anak sa sama nga Dios—adunay maayo ug nindot nga mahitabo kanato, ug kita mas mapaduol sa Dios kinsa Amahan natong tanan.

Gikinahanglan kaayo niining mapugsanon ug libug nga kalibutan ang Kristiyanong pagtuo, kalooy, ug pagsabut. Si Joseph Smith nakaobserbar niadtong 1843, wala kaabut og usa ka tuig sa wala pa siya mamatay: “Kon akong gihunahuna nga ang katawhan anaa sa kasaypanan, ako ba silang iduot? Dili. Ako silang ipataas, ug diha usab sa ilang pamaagi, kon dili nako sila madani nga ang akong paagi mas maayo; ug dili ako mamugos ni bisan kinsang tawo nga motuo sama sa akong pagtuo, pinaagi lamang sa kaayo nga mangatarungan, kay ang kamatuoran mangita sa iyang kaugalingong paagi. Motuo ba kamo ni Jesukristo ug sa Ebanghelyo sa



“Motuo ba kamo ni Jesukristo ug sa Ebanghelyo sa kaluwasan nga iyang gipadayag? nangutana si Propeta Joseph Smith. “Ako motuo. Ang mga Kristiyanong kinahanglang mohunong sa pagdinautay ug paglalis sa usag usa, ug moamuma sa mga baruganan sa panaghiusa ug panaghigala; ug ila kining buhaton sa dili pa moabut ang milenyum ug si Kristo ang maghari sa Iyang gingharian.”

kaluwasan nga Iyang gipadayag? Ako motuo. Ang mga Kristiyanong kinahanglang mohunong sa pagdinautay ug paglalis sa usag usa, ug moamuma sa mga baruganan sa panaghiusa ug panaghigala; ug ila kining buhaton sa dili pa moabut ang milenyum ug si Kristo ang maghari sa Iyang gingharian.”⁵

Kini akong tapuson uban sa gugma alang kaninyo pinaagi sa duha ka pamulong sa panamilit diha sa atong kasulatan. Una gikan sa Bag-ong Tugon sa tigsulat sa Mga Hebreohanon:

“[Hinaut] ang Dios sa kalinaw, nga nagbanhaw sa atong Ginoong Jesus, ang dakong magbalantay sa mga karnero, pinaagi sa dugo sa dayon nga pakigsaad,

“Magasangkap unta kaninyo sa tanang maa-yong butang aron kamo makatuman sa iyang kabubut-on, nga magabuhat diha kaninyo sa makapahimuot sa iyang pagtan-aw, pinaagi kang Jesukristo; kang kinsa maiya unta ang himaya nga hangtud sa kahangturan. Amen” (Mga Hebreohanon 13:20–21).

Ug kini gikan sa Basahon ni Mormon, usa ka amahan nagsulat ngadto sa iyang anak:

“Pagmatinud-anon diha kang Kristo . . . [ug] hinaut unta nga [Siya] mobayaw kanimo, ug unta ang iyang mga pag-antus ug kamatayon . . . ug sa iyang kalooy ug pagkamaintuson, ug ang paglaum sa iyang himaya ug kinabuhi nga dayon, moabut sa imong salabutan sa kahangturan.

“Ug unta ang grasya sa Dios nga Amahan, kansang trono anaa sa kahitas-an sa mga langit, ug sa atong Ginoong Jesukristo, kinsa naglingkod sa tuo nga kamot sa iyang gahum, hangtud nga ang tanan nga mga butang mahimo nga alagad ngadto kaniya, ug magpabilin uban kanimo hangtud sa kahangturan. Amen” (Moroni 9:25–26). ■

MUBO NGA MGA SULAT

1. Usa ka termino nga gipaila ni Richard J. Mouw, *Uncommon Decency: Christian Civility in an Uncivil World* (1992).
2. Tan-awa sa Dallin H. Oaks, “Preserving Religious Freedom” (speech, Chapman University School of Law, Feb. 4, 2011), newsroom.lds.org/article/elder-oaks-religious-freedom-Chapman-University.
3. *Mga Pagtulun-an sa mga Presidente sa Simbahan: Joseph Smith*, (2007), 58.
4. Tim LaHaye, *The Race for the 21st Century* (1986), 109.
5. Joseph Smith, sa *History of the Church*, 5:499.



Ni Elder
Stanley G. Ellis
Sa Seventy



Natural nga mga Kalamidad

DILI KITA KINAHANGLANG
MAHADLOK

Ang timailhan sa katapusang mga adlaw mao ang pagdaghan sa kalamidad ug sa mga dautan. Niining mga hulga ang Ginoo ug ang Iyang mga propeta mitambag kanato kon unsaon nga magmatarung ug makalikay sa espiritwal nga mga lit-ag ug sa dautan. Bisan pa man, ang mga kalamidad—sama sa mga buhawi, linog ug tsunami—ingon og moigo nga dili matag-an ug makagun-ob sa matarung ug sa dili matarung. Kini nga mga kalamidad makahadlok sa kadaghanan. Apan nakakat-on ko nga dili ta angay mahadlok sa kalamidad. Kon ang ebanghelyo maoy atong pundasyon ug kita andam, kita makasugakod sa bisan unsang unos.

Sa wala pay Unos: Himoa nga ang Pagpangandam usa ka Prayoridad sa Pamilya

Niadtong Septyembre 2005, nagserbisyo ko isip Area Seventy sa North America Southwest Area, nga naglakip sa mga bahin sa Estados Unidos sama sa Houston, Texas. Among nahibaloan nga ang Hurricane Rita—ang pinaka kusog nga bagyo sa kasaysayan nga naobserbar sa Gulf sa Mexico—padulong kanamo. Gihangyo ko sa pagdumala sa Church's emergency response sa maong dapit. Kada adlaw kami mag-conference calls uban sa mga

Samtang kita nagtinguha sa giya sa Langit-nong Amahan, ang Espiritu Santo motabang kanato sa pag-andam, paglahutay, ug pagbangon gikan sa natural nga mga kalamidad.

priesthood leader, mga stake president, mga mission president, mga Church welfare ug humanitarian aid representative, ug emergency response leader. Among gihisgutan ang daghang mga butang—kon ang bishops' storehouse andam na, asa ang mga tawo makabakwit, ug unsaon sa paghan-ay sa mga paningkamot sa pagtabang human sa unos. Maayo kining pagkahan-ay nga tubag sa Simbahan ug makapadasig nga kasinatian.

Usa sa mga stake president sa dapit nadasig sa pag-aghat sa iyang mga miyembro sa stake sa pag-andam mga walo o siyam ka bulan sa wala pa ang unos. Siya mipasabut nga wala siya nangangkon nga propeta apan ang mga pagdasig gikan sa Espiritu klaro kaayo. Ang mga miyembro sa stake misunod sa nag-unang stratehiya sa pagpangandam nga gisugyot sa Sim-

bahan. Sa dihang miigo ang unos, walay miyembro sa stake ang namatay. Dugang pa, tungod kay ang mga miyembro nakaandam sa gikinahanglang suplay ug may plano, ang ilang kahimtang mas maayo kaysa wala sila mangandam. Ilang gisunod ang pasidaan sa Espiritu.

Susama nga sitwasyon ang nahitabo sa akong pamilya ug kanako. Mga tulo ka bulan sa wala pa ang unos, kami nadasig nga ipasusi ang among generator. Daghang

Gusto ba ninyong hisgutan sa inyong mga anak ang paghatag ug pagdawat og kahupayan atol sa kalamidad? Basaha ang pagpamatuod sa duha ka bantan-on nga naluwas, sa mga pahina 60–61 niining isyu.

Sa miaging pahina: Ang mga trabahante naghawan sa mga nampung sa apartment nga nagun-ob atol sa linog sa Haiti niadtong Enero 2010.

Ang mga tawo sa Houston, Texas, USA, namakwit sa wala pa moigo ang Hurricane Rita.

mga tawo sa dapit adunay gagmay nga mga generator aron nga kon may unos ug walay kuryente, sila may igong kuryente aron dili madaut ang mga pagkaon nga anaa sa ilang refrigerator ug freezer. Sa dihang among gipasusi ang among generator, among nahibaloan nga kini guba. Amo kining napaayo sa wala pa moabut ang unos. Ang among pamilya, mga miyembro sa among ward, ug mga silingan migamit sa among generator human miigo ang unos. Ang pagpaayo niini nahimong usa ka dakong panalangin.

Kining baruganan sa pagpangandam magamit sa mga indibidwal ingon man usab sa mga pamilya. Mga ginikanan, kamo makaimpluwensya kaayo sa inyong pamilya pinaagi sa pagpaapil sa inyong mga anak sa pagpangandam ug sa pag-ampo sa pamilya alang sa giya sa Ginoo. Buot ipasabut, kon ang inyong pamilya nagkonsiderar sa pagpangandam, ang pangutana, unsa ang atong buhaton? kinahanglang malakip sa pag-ampo

sa pamilya. Makahisgut kamo niining hilisgutan ug mopakigbahin og mga ideya sa family home evening. Dayon buhata kadto nga mga plano.

Dugang pa, ang pinaka maayong buhaton sa ginikanan mao ang pagsunod niining pagtulun-an. Adunay miingon nga kini nga mga kinaiya “masunod” dili “matudlo.” Akong nasayran nga kini tinuod. Samtang ang mga bata makakita sa ilang mga ginikanan nga nagtinguha ug nagsunod sa giya sa Espiritu, sila makakat-on unsa ang proseso sa pagpadayag.

Atol sa Unos: Sunda ang Pagpadayag nga Inyong Nadawat alang sa Inyong Pamilya

Samtang nagkaduol ang unos, usa ka lisud nga pangutana ang among gikonsiderar, ang mga tawo ba among pabakwiton. Ang Espiritu midereka kanako nga dili mobuhat og kinatibuk-ang rekomendasyon alang sa tanang area apan sa paghangyo sa matag stake leader, bishopric, ug sa pamilya nga mainampuong ikonsiderar ang sitwasyon ug makadawat og ilang kaugalingong inspirasyon sa angay nga buhaton. Sa hapit na ang unos, nahimong klaro nga ang Espiritu nasayud unsa ang labing maayo sa matag pamilya.

Ang mga lider sa usa ka stake, pananglit, nasayud nga sila maigo gayud sa unos ug ang mga miyembro gipasidan-an nga mobakwit. Ang stake president ug ang iyang asawa mibakwit ngadto sa balay sa iyang igsoon. Pagkahuman, ang unos miliko, padulong nila usab. Ang ilang gibakwitan naigo sa unos!

Tingali kamo makapangutana, “Unsa man na nga matang sa pagpadayag?” Apan ikonsiderar unsa ang nahitabo. Kini nga stake president ug iyang asawa nasayud unsaon pagpangandam atol sa unos, kay sa iyang igsoong babaye nga wala. Sila nakatabang sa ilang mga paryente nga maandam inigabut sa unos, ug sa dihang miigo kini, ang kadaut gamay lang kay sa wala





Gihawanan sa mga bolunter sa Mormon Helping Hands ang mga nangatumpag human sa unos sa Joplin, Missouri, USA, niadtong Mayo 2011.

mangandam. Ang Ginoo migiya kanila unsa ang labing maayo nga buhaton.

Sa among pamilya, mibati kami nga dili mamakwit. Busa nagpabilin kami. Wala lang mi maluwas human sa unos, nakatabang pa usab kami sa ubang mga tawo sa dapit. Pipila sa among minyo nga mga anak nadasig nga mobakwit, mao nga sila mibiya. Ang pagsunod sa Espiritu mipanalangin sa matag pamilya, ward, ug stake.

Human sa Unos: Tuguti ang Ebanghelyo Mopawala sa Kahapdos

Usahay ang buotang mga tawo mag-antus atol sa mga kalamidad. Dili wagtangon sa Dios ang pag-antus—apil kini sa plano. Sama pananglit, usa sa ka stake center sa tunga-tungang Estados Unidos nagun-ob tungod sa buhawi. Kini nga buwahi miguba usab sa balay sa stake president. Ang kabtangan niya ug sa iyang pamilya nahanaw. Apan, kini mga butang lang: kalibutanong kabtangan. Makapaguol ang pagkawala, apan kini dili makagun-ob sa kahangturan. Usahay ang atong gihunahuna nga importante dili gayud diay importante. Kini nga pagkaamgo dili ingon sayon dawaton, apan kini tinuod, ug ang pagsabot niini makapahupay.

Ang labing pait nga mahimo niining mga kalamidad mao nga adunay tawo nga mamatay. Kana makapaguol kaayo. Apan tungod kay nasayud kita sa kamatuoran, ang ingon nga pagkamatay kabahin sa plano sa Langitnong Amahan. Atong nasayran unsa ang kahulugan sa kina-buhi; nasayran nato nganong ania kita dinha ug asa kita paingon. Tungod niining mahangtulong panglantaw, ang

kasakit mahupay. Ang kahibalo sa plano sa kaluwasan makapawala sa ikos sa kamatayon (tan-awa sa 1 Mga Taga-Corinto 15:55).

Kaniadto, sila si Shadrach, Meshach ug Abed-nego wala masayud sa mahitabo kon sila ibutang sa hudno sa kalayo sa pagdumili sa pagsimba og dios-dios. Sila miingon sa hari, “Ang among Dios . . . makahimo sa pagluwas kanamo. . . . Apan kong dili ugaling, kami dili [gayud] moalagad sa imong mga dios” (Daniel 3:17–18).

Susama usab, daghang mga pioneer sa gipahiuli nga Simbahan andam sa pagsulay sa pagtabok sa mga kapatagan sa North Amerika sa tunga-tungang siglo sa 1800, bisan sa posibilidad sa kamatayon. Ang Basahon ni Mormon naghulagway sa buotang mga tawo nga gipangpatay ug nagtudlo nga sila “bulahan, kay sila miadto na aron sa pagpuyo uban sa ilang Dios” (Alma 24:22).

Sa matag usa, ilang gidawat ang kamatayon uban sa hugot nga pagtuo. Alang kanila, tungod sa kalinaw nga mahatag sa ebanghelyo, ang ikos sa kamatayon mawala. Bisan tuod kini masakit nga mamatyan og usa ka tawo nga inyong gihigugma ug bisan daghan kanato dili ganahang mamatay tungod kay daghang butang nga angayang ipakabuhi, ang tinuod mao nga ang tanan mamatay sa umaabut. Kon nasayud mo sa plano sa ebanghelyo, inyong nasayran nga ang kamatayon dili mao ang katapusan sa kalibutan. Ang inyong pagpakabuhi magpadayon, ug ang relasyon sa pamilya magpadayon bisan ang atong mortal nga mga lawas anaa sa lubnganan. Sa kinatibuk-ang panglantaw sa mga butang, ang kamatayon dili makapasubo sa kahangturan. Sama sa gitudlo ni Elder Russell M. Nelson sa Korum sa Napulog Duha ka mga Apostoles: “Kita nabuhi aron mamatay, ug kita mamatay aron mabuhi pag-usab. Gikan sa usa ka mahangtulong panglantaw, ang wala damha nga kamatayon mao lamang ang kamatayon sa usa nga dili pa andam sa pagsugat sa Dios.”¹ Ang mahangtulong panglantaw kabahin sa kalinaw nga mahatag sa ebanghelyo kanato.

Ang Ginoo nakaila kanato. Ang Ginoo nahigugma kanato. Ug ang Ginoo gusto nga motabang kanato. Ang mga kalamidad moabut, apan kita dili kinahanglang mahadlok. Kon kita andam nga magiyahan ug mohangyo sa Iyang direksyon, ang Ginoo pinaagi sa Espiritu Santo makatabang kanato sa pagpangandam, sa paglahutay, ug pagkaayo gikan sa natural nga mga kalamidad. ■

MUBO NGA SULAT

1. Russell M. Nelson, “Atubanga ang Umaabut uban sa Hugot nga Pagtuo,” *Liahona*, Mayo 2011, 34.

PAGKAKAPLAG OG HUGOT NGA PAGTUO

diha sa mga Kinatumyan sa Yuta


Ni Michael R. Morris

Mga Magasin sa Simbahan

Ang Les Éclaireurs Lighthouse nagbarug sama sa usa ka guwardiya sa gamayng isla sa mabugnawng Beagle Channel. Pinulongang French nga nagpasabut og “ang Manunuhid” o “ang Tiglamdag,” ang Les Éclaireurs mokidlap matag 10 ka segundo gikan sa iyang hilit nga nahimutangan.

Lima ka nautical miles (9 km) sa amihanang bahin, mao ang kinahabagatang siyudad sa Argentina, ang Ushuaia, nahimutang sa tumoy sa arkipelago sa Tierra del Fuego. Nuybenta ka milya (145 km) sa habagatan mao ang Cape Horn ug lapas ana, ang na-ice nga Antarctic.

Alang niadtong nagpamiyembro sa Ang Simbahan ni Jesukristo sa mga Santos sa Ulahing mga Adlaw dinhi



Pinaagi sa Basahon ni Mormon, ang Dios “mitubag sa akong pinaka mahinungdanon nga pag-ampo,” miingon si Guillermo Leiva (sa ibabaw, tunga), kinsa nagserbisyo isip branch president sa Ushuaia. Ibabaw sa tuo: Les Éclaireurs Lighthouse ug mga litrato sa Ushuaia.

niining gitawag sa mga lokal og “ang kinatumyan sa yuta,” ang Les Éclaireurs nagsilbing simbolo sa gipahiuli nga ebanghelyo. Sama sa parola, ang ebanghelyo mao ang banwag nga naggiya kanila gikan sa espirital nga kangitngit ug nagdala kanila diha sa lapyahan sa hugot nga pagtuo ug pag-fellowship.

Nakaplagnan Nako ang mga Tubag

Si Guillermo Javier Leiva nakahinumdom sa kasakit sa iyang diborsyo niadtong 2007. Kinahanglan niyang mangita og apartment ug dili na makakita kada gabii sa iyang batan-ong anak nga lalaki, si Julian. Mibati siya og kahaw-ang ug kamingaw.

“Nagguol ko pag-ayo,” siya miingon, “ug sa panahon sa kasagmuyo, nangita ko sa Dios.”

Si Guillermo miampo alang sa mga tubag ug tabang. “Miingon ako, ‘Amahan, dili ako takus aron ikaw mosulod sa akong balay, apan usa ka pulong gikan Kanimo igo na nga makaayo kanako.’”

Sa wala madugay miabut ang tubag niadtong pagampo sa dihang ang mga misyonaryo mihunong aron



sa pakig-istorya kaniya samtang siya nakigdula sa iyang anak gawas sa bag-o niyang apartment.


“Usa kanila mitimbaya kanako ug nangutana ko anaa ba koy pagtuo,” siya mihinumdom. “Mitubag ko og oo apan dili ko buotan nga Kristiyano. Siya nangutana kon mobasa ba ko kon hatagan ko niya og basahon. Mitubag ko og oo.”

Samtang gibasa ni Guillermo ang mga bersikulo sa Alma 32 nga gimarkahan sa mga misyonaryo, siya mii- ngon, “Diha-diha dayon mibati ko sa dakong kalipay nga wala na nako mabati sa dugayng panahon. Ang basahon mitandog sa akong kasingkasing. Dili ko ganahang mohu- nong sa pagbasa.”

Si Guillermo wala na magsimbahan sa iyang tinuohan sa una, apan iyang gisultihan ang mga misyonaryo nga wala siyay plano nga magpabunyag og usab. Hinoon, ganahan siya sa ilang pagbisita ug sa pagbasa sa ilang reading assignment sa Basahon ni Mormon.

Samtang siya nagbasa, siya nagguol kang Nephi sa dihang iyang nasayran nga ang propeta nasagmuyo “tu- ngod sa mga pagtintal ug ang mga sala sayon nga mohasol

*Ang Ushuaia, Argentina,
tingali anaa sa kinatumyan sa yuta,
apan alang niadtong midawat sa
ebanghelyo, kini ang sinugdanan
sa bag-ong kinabuhi.*



kanako” (2 Nephi 4:18). “Nasayud ko nga nakasala ko,” miingon si Guillermo, “ug nagmahay niini.”


Samtang nagbasa siya, mibati siya nga giluwag gikan sa kangitngit ug kawala sa paglaum ug gidala ngadto “sa kahayag sa himaya sa Dios” (Alma 19:6).

Ug samtang iyang gibasa ang pakigsaad sa bunyag diha sa Katubigan sa Mormon, siya nakaamgo sa kaimportante nga mabunyagan sa tawo nga may eksaktong awtoridad. “Kon akong nasayran ang liso maayo, ‘unsay *anaa* kanako . . . batok sa pagpabunyag diha sa ngalan sa Ginoo?” (Mosiah 18:10), siya namalandong.

Samtang sila nagsiksik, sila misimba sa lain-laing relihiyon ug nag-imbetigar sa daghang pagtuo. Sila nangita og simbahan nga wala lang mahiuon sa mga pangtulun-an ni Kristo apan makalig-on usab sa ilang pamilya.

“Kadto lisud nga panahon sa among pamilya,” mihi-numdom si Amanda, “ug kami nagkinahanglan og simbahan sa pagtabang kanamo.”

Sa sayong bahin sa mga tuig 1990 ang pamilyang Robledo mibalhin gikan sa Mendoza, sa amihanang kasadpan sa Argentina, ngadto sa Ushuaia. Sa dihang ilang nahibaloan ang Simbahan paglabay sa duha ka tuig, ilang nabati



Sa tuo: Alang kang Amanda ug Ricardo Robledo (uban sa ilang mga anak nga babaye nga sila si Bárbara ug Irene), ang pagkasayud nga ang ilang pamilya mahimong mag-uban hangtud sa hangtud mao ang labing mahinungdanon nga doktrina nga nakapadawat kanila sa gipahiuli nga ebanghelyo.



“Kada basa nako, mobati ko og kalinaw ug makakaplag og mga tubag,” miingon si Guillermo. “Nakaamgo ko nga ang Basahon ni Mormon mao ang pulong sa Dios nga akong giampo.”

Sa dihang nabunyagan siya niadtong Marso 2009, siya nausab sa espirital nga paagi ug may bag-ong paglaum sa umaabot. “Ang bunyag mao ang kahigayunan nga magbag-o,” miingon si Guillermo. “Giusab nako akong kinabuhi. Malipayon ko karon. Nasayud ko nga kini ang tinuod nga Simbahan ni Jesukristo ug ang Dios motubag sa mga pag-ampo tungod kay Iyang gitubag ang akong pinakamahinungdanon nga pag-ampo.”

Kami Nanginahanglan og Simbahan

Isip bata, si Amanda Robledo walay espirital nga tambal alang sa iyang pisikal nga kasakit human namatay ang iyang inahan. Ug ang iyang bana, si Ricardo, wala makakaplag og mga tubag sa iyang matinuoron nga kinasingkasing mga pangutana sa pagkamatay sa iyang igsoon.

Usa niadto nga mga pangutana mao, Aduna bay simbahan sa kalibutan nga nagsunod sa mga pagtulun-an ni Jesukristo? Ang ilang pagpangita niana nga simbahan ug mga tubag sa ilang pangutana nakaandam kanila sa pagdawat sa gipahiuli nga ebanghelyo.

dayon nga adunay lahi sa diwa ug mga pagtulun-an sa mga full-time nga misyonaryo.

Gamay lang ang nasayran ni Amanda sa Simbahan. “Ug dili maayo ang akong nadungog,” siya miingon. Apan siya, si Ricardo, ug upat nila ka anak natandog sa ilang nakat-unan.

“Nabati nako ang Espiritu sa dihang ang mga misyonaryo mitudlo kanamo,” miingon ang ilang anak nga si Bárbara, kinsa 11 anyos niadtong panahona. “Ug gahan ko sa dihang mitudlo sila nga kami makaampo isip pamilya.”

Ang pagpaminaw sa mga diskusyon sa misyonaryo, pagbasa sa Basahon ni Mormon, ug pagsimba, miingon si Ricardo, “nakahatag sa mga tubag nga among gipangita—mga tubag kabahin sa bunyag, kinabuhi sa wala pa dinhi sa yuta, ang kabalaan ni Kristo, ang imortalidad sa tawo, mga ordinansa sa ebanghelyo, kaminyoon, ug sa pagka mahangturon sa pamilya.”

Alang sa mga Robledo, ang pagkasayud nga ang ilang pamilya mahimong mag-uban hangtud sa hangtud mao ang labing mahinungdanon nga doktrina sa gipahiuli nga ebanghelyo.

“Ang akong pagkakabig nahitabo nianang higayuna,” miingon si Ricardo, kinsa nabunyagan sa wala pay tulo ka semana human sa unang diskusyon ug karon nagserbisyo



Ang Ushuaia mahimong anaa sa kinatumyan sa yuta, apan alang nila ni Marcelino Tossen kinsa nakakaplag sa ebanghelyo dinhi, “kini ang sinugdanan sa tanang butang.”

isip second counselor sa district presidency. “Nag-antus ko sa dihang namatay ang akong igsoon sa edad nga 49, apan nasabtan nako nga maluwas nako siya pinaagi sa buhat diha sa templo. Kini nga kasiguroan naghatag kanako og kalinaw ug kalipay.”

Si Amanda, sa wala madugay nabunyagan usab uban sa usa sa ilang mga anak, miingon, “Wala na koy inahan sukad bata pa ko. Kanunay maghunahuna ko nga wala na siya, ug kini nakapasagmuyo kanako. Apan sa dihang ang mga misyonaryo miingon kanamo nga ang pamilya mahimong mag-uban sa kahangturan, kini nakapatandog sa akong kasingkasing. Nindot kaayong hunahunaon nga makakita ko niya pag-usab.

Human nga naminyo alang sa kahangturan sila si Ricardo ug Amanda didto sa Templo sa Buenos Aires Argentina, ang ilang mga anak na-sealed ngadto kanila. Ang pagka-sealed isip pamilya, pagkompleto sa ordinansa alang sa daghang nangamatay nga mga paryente, ug pag-pamasyon sa ilang tulo ka anak nakapalipay pag-ayo nila ni Ricardo ug Amanda.

“Usa sa dakong panalangin nga among nadawat isip miyembro sa Simbahan,” miingon si Amanda, “mao nga ang among mga anak nagsunod sa Dios.”

Ang Sinugdanan sa Tanang Butang

Si Marcelino Tossen nagtuo sa Dios, nagbasa sa Biblia, ug ganahang makig-istorya kabahin sa relihiyon, busa sa dihang ang full-time nga mga misyonaryo mituktok sa iyang apartment usa ka adlaw sa Enero 1992, gipasulod niya sila. Kadto nga desisyon nakapausab sa iyang kinabuhi.

“Sila si Elder Zanni ug Elder Halls misunod sa mga impresyon sa Espiritu,” mihinumdom si Marcelino. Sa wala pa matapos ang unang panaghisgutan, ang mga elder

miingon nga siya mabunyagan sa Simbahan, gani misulti sa tukmang petsa nga siya mabunyagan.

“Dili ko magpabunyag,” mitubag si Marcelino “Ganahan ra kong makig-istorya ninyo.”

Ang mga misyonaryo mihatag kaniya og Basahon ni Mormon ug mihangyo nga basahon ang pipila ka bersikulo ug iampo ang ilang mensahe niadtong gabhiona. Iya kining gibuhath apan wala siya’y gibati.

Atol sa sunod nga diskusyon, si Elder Zanni mihangyo kaniya, “Mahimo ba nga mag-ampo ta aron imong mapangutana ang Langitnong Amahan kon ang among gitudlo tinuod?”

Samtang siya nag-ampo, si Marcelino miingon, “nabati nako ang akong kasingkasing miinit. Wala gyud ko makasinati og ingon adto sukad-sukad. Wala gani nako mahuman ang pag-ampo, ug mibarug ko.”

Si Elder Zanni nangutana kang Marcelino kon aduna ba siyay gibati atol sa pag-ampo. Sa dihang si Marcelino mitubag nga wala, ang misyonaryo miingon, “Nabati nako nga kusog kaayo ang Espiritu. Lisud katoohan nga wala nimo mabati.”

Sa dihang iyang giangkong nga iyang nabati, si Marcelino miingon, “ang mge elder mibasa sa Doktrina ug mga Pakigsaad, naghisgut nako nga kon ang Ginoo adunay buot ipahibalo kanato nga eksakto, Iyang ipadala ang Iyang kalinaw o mopainit sa atong kasingkasing [tan-awa sa D&P 6:23; 9:8]. Kadto nga adlaw nakadesisyon ko.”

Sukad niadto, ang Espiritu midasig kaniya ug mipamatuod sa kamatuoran sa daghang espiritwal nga mga kasinatian. “Nabati nako pag-usab ang kainit sa dihang nag-inusara ko sa apartment,” miingon si Marcelino. “Kon ablihan nako ang bintana, makit-an nako ang mga elder sa eskina nagtudlo sa mga tawo kabahin sa Simbahan. Mabati nako kon duol sila, ug giseryuso nako ang ilang gitudlo kanako.”

Si Marcelino mainitong giabi-abi sa dihang misimba siya. Siya nabunyagan niadtong April 22—ang tukmang petsa nga gisulti sa mga misyonaryo tulo na ka bulan nga milabay. Karon, human magserbisyo og siyam ka tuig isip presidente sa Ushuaia district, siya ngaserbisyo isip second counselor sa presidency sa Buenos Aires north mission.

“Kon atong mabasa nga ang Ginoo ‘mopadala sa [iyang] pulong ngadto sa mga kinatumyan sa yuta’ [D&P 112:4], kana ang Ushuaia,” miingon si Presidente Tossen. “Ang Ushuaia *mao* ang kinatumyan sa yuta. Apan alang niadtong nakakaplag sa ebanghelyo dinhi, kini ang sinugdanan sa tanang butang. Dinhi inyong makita ang parola sa kinatumyan sa yuta. Apan dinhi nako nakaplagan ang hugot nga pagtuo ug parola sa Ginoo.” ■

TAN-AWA SA KATAPUSANG PAHINA

Sa dihang nagpamiyembro ko sa Simbahan, naghinam-hinam kaayo ko sa family history work. Mibisita ko sa lokal nga mga archive aron sa pagsiksik diha sa publikong rekord og impormasyon sa akong katigulangan.

Akong nakita nga ang buhat mabunghahon, apan dili sayon sa kanunay. Ang karaang agi sa pagsulat lisud kanunay basahon, ug pipila sa mga libro giagup-op na, nga nakapagrabe sa akong hubak. Apan, padayon gihapon ko sa pagsiksik kutob sa mahimo.

Usa ka adlaw nagsiksik ko kabahin sa akong lolo, nangita sa petsa sa natawhan. Nakakita ko og 1,500 ka pahina nga basahon nga makatabang. Apan unsaon na lang kon wala dinhi akong gipangita? Nagduha-duha ko nga mangita pa ngadto sa mas dako, abugong mga libro.

Nagsugod ko sa pagtan-aw-tan-aw sa sulod sa libro, nanghinaut nga makakita og pamilyar nga ngalan. Sa kalit lang, daw nakadungog ko og tawo nga misulti, “Sa katapusang pahina.” Mitan-aw ko sa palibut, apan ingon og walay tawo nga miistorya kanako. Nagpadayon ko ug nagbasa og pipila pa ka pahina. Dayon nakadungog ko pag-usab sa samang pulong: “Sa katapusang pahina.” Ingon nga nagduha-duha, gitan-aw nako ang katapusang pahina. Nakita nako ang kasagarang isulat didto: Summary sa mga bata nga natawo ug sumada sa tanang pahina. Ingkaso lang, gitan-aw nako ang gisundan niini nga pahina apan wala ra gihapon, busa gibalikan nako ang pahina nga akong gitan-aw kaganina.

Nabaling ang akong atensyon pag-usab sa hinay apan mapugsanong tingog: “Sa katapusang pahina!” Mihukom ko nga balikon ang katapusang pahina ug gibalik og basa ang pamilyar nga teksto sa makadaghan.


Dayon nakamatikod ko og usa ka butang nga wala nako mabantayi: sobra nga pahina nga gipapilit sa luyo sa hapin. Samtang akong gibasa ang gisulat sa pahina, nakita nako ang ngalan sa mga bata nga natawo sa naghinapos ang Disyembre. Didto akong nakita ang ngalan sa akong apohan ug nakasulat didto kon asa ug kanus-a siya natawo

ug nabunyagan. Nahingangha ko apan mapasalamaton nga gigiyahan ko sa impormasyon nga akong gikinahanglan.

Ang family history usahay mahagiton, apan nasayud ko nga ang Dios naggiya ug nagtabang sa atong mga paningkamot. ■

Natalia Shcherbakova, Ukraine, nga gisaysay ngadto ni Pavlyna Ubyiko

Nagsugod ko sa pagtan-aw-tan-aw sa sulod sa libro, nanghinaut nga makakita og pamilyar nga ngalan.



GIPI LI NAKO ANG MAAYONG BAHIN

Samtang nangandam ko sa kasal sa akong anak nga babaye, busy kaayo ko sa mga plano sa kasal nga wala na koy laing gihunahuna gawas sa tsiklist. Usa ka buntag gitan-aw nako ang taas nga listahan sa mga buluhaton. Ubay-ubay nako og nahimo, apan kinahanglan pa nakong maglimpyo og maayo. Dugay na akong nagplano nga limpyohan ang mga kitchen blind, busa gibuhat ko kini.

Sa akong pagsaka sa counter nga may mga trapo, brush, ug para limpyo, nakita nako kon unsa kini ka hugaw. Samtang nagtrabaho ko, naghunahuna ko sa istorya ni Marta ug Maria, ang managsuon nga miabi-abi sa Manluluwas sa ilang balay. Samtang si Marta “nagkalibug-libug sa hilabihang pag-amuma,” si Maria “milingkod sa tiilan ni Jesus, ug nag-patalinghug sa iyang mga pulong.” Si Marta mihangyo ni Jesus nga sultian ang iyang igsoon sa pagtabang sa mga buluhaton, apan ang Manluluwas miingon kaniya “hingpilian ni Maria ang maayong bahin” (tan-awa sa Lucas 10:38–42).

“Karon magpaka-Marta lang ko,” mihunahuna ko. Ang tinuod nagpaka-Marta nako sulod sa pipila ka semana, “nagkalibug-libug” sa balik-balik nga mga buluhaton ug pagpangandam sa kasal.

Naghunahuna na usab ko, ug naghinumdom kanus-a kadtong katapusang panahon nga nalimpyohan og maayo ang mga blinds. Naghunahuna ko sa duha ka babaye nga mitabang nako sa pagpangandam sa pagtipon-tipon sa balay duha na ka tuig ang milabay. Ilang gilimpyuhan pag-ayo ang kusina gikan sa sawog hangtud sa kisame, apil ang mga blinds. Kadto nga panumduman nakapahinumdom



Gidayal nako ang numero sa suod nga higala nga wala nako makaistorya sa daghang katuigan, nagplano sa paghisgut kaniya sa kasal sa akong anak.

nako sa ilang inahan, higala nga dugay na nakong wala ikaistorya.

Nianang higayona gidayal nako ang iyang numero aron sa paghisgut kaniya sa kasal sa akong anak. Wala ko magdahum nga iyang tubagon kay nagtudlo siya sa eskwelahan, apan natawagan nako siya atol sa oras sa pagplano. Kami nagkinataw-anay, naghinilakay, ug nag-istoryahanay. Siya bag-ohay lang nakigdiborsyo ug mibati nga nag-inusara ug sinalikway. Samtang nag-istoryahanay mi, mibati kami nga gibayaw ug ang among kasingkasing gihupay.

Nahingangha ko sa paagi ang Ginoo midasig kanako bisan nagbuhat og balik-balik nga buluhaton sama

sa paglimpyo sa mga blinds. Mas nahingangha ko sa kamatuoran nga Siya nasayud ug naghigugma kanato og maayo aron magpadala og tabang sa panahon nga kinahanglanon nato.

Nianang gabhiona mipahiyum ko samtang gitsikan ang “paglimpyo sa mga blinds sa kusina” sa lista. Bisan tuod nalipay ko nga nahuman ang buluhaton, mas mapasalamaton ko nga nahimong instrumento sa mga kamot sa Ginoo. Iyang gipakita kanako unsaon nga mahimong Maria kinsa mipili sa “maayong bahin” bisan ako sama ni Marta “nagkalibug-libug” sa akong buluhaton. ■

Jeanette Mahaffey, Missouri, USA

ANG SAKTONG KASULATAN SA SAKTONG PANAHOON

Samtang nagserbisyo isip assistant chaplain sa Maricopa County Jail system sa Arizona, USA, mobisita ko ug mopakigbahin og kasulatan ug pag-ampo ngadto sa mga piniriso nga mohangyo og chaplain nga Santos sa Ulahing mga Adlaw. Usa ka higayon usa ka batan-ong babaye ang mi-hangyo niini.

Miadto ko sa iyang dapit sa priso-han, luyo sa pipila ka trinangkahan nga mga pultahan. Ang reception adunay duha ka lamesa sama sa cafeteria nga may lingkuranan sa isigka ka kilid ug usa ka lamesa nga may gwardiya. Gihatag nako sa gwardiya ang request slip, milingkod sa usa sa mga lingkuranan, ug mipaabut sa batan-ong babaye.

Mibarug ko sa iyang pagsulod sa reception area, mitimbaya kaniya, ug misugyot nga manglingkod. Siya subo ug hugaw tan-awon ug kahila-kon. Samtang iyang gihisgutan ang iyang sitwasyon, naghunahuna ko og kasulatan nga ipakigbahin. Naminaw ko og maayo sa iyang mga problema, ug samtang iyang gipadayag ang mga kalisud nga iyang nasinati tungod sa bati nga batasan ug pagpili, naghunahuna ko og magamit nga kasulatan aron pagtabang kaniya: Mosiah 3:19.

Giablihan nako ang Basahon ni Mormon sa Mosiah 3:19, gipasa kaniya, ug gipabasa siya. Ingon og wala siya mahimuot sa pagsugod ug paspas niya kining gibasa, binugalbugal nga tingog nga daw ipahayag nga wala siya maganahi sa pagbasa sa kasulatan. Sa iyang paghuman sa unang hugpong sa mga pulong, “Kay ang kinaiyanhon nga tawo mao ang usa ka kaaway sa Dios,” gipahunong nako aron ipasabut unsa ang “kinaiyanhon nga tawo.” Sa dihang iyang nasabtan ang reference, siya nagpa-dayon sa pagbasa. Hinay-hinay nga nausab ang tuno sa iyang tingog, ug


mihinay-hinay siya sa pagbasa sa pagsugod niya og sabot sa mga pulong.

Sa dihang nagsugod na siya og basa sa daw pangbata nga mga kinaiya sa “usa ka santos,” mas gihinayan pa niya. Makaingon ko nga iyang gisabut ang kahulugan sa matag kinaiya diha sa bersikulo. Sa dihang iyang gibasa ang “manunuton, maaghup, mapainubsanon, mapailubon,” nabati nako ang Espiritu sa among palibut. Samtang iyang gibasa ang “puno sa gugma, mauyunon sa pagdawat,” nakamatikod ko nga may kausaban kaniya. Ang iyang panagway misa-nag ug ang iyang batasan, tuno sa tingog, ug kinatibuk-ang lihok ingon

og natandog sa Espiritu. Nakita nako ang paglaum samtang siya natudloan sa Espiritu sa kahulugan niining mga pulong ug unsaon niya nga mausab sumala sa gihulagway sa kasulatan.

Nag-ampo ko ug dayon mainitong nakiglamano sa batan-ong babaye. Mibiya ko sa priso-han nga taas ang pagkaespirituhanon. Wala pa gyud ko kakita sama ka diha-diha dayon, gamhanan, kusganong epekto sa mga kasulatan. Nasayud ko sa Mosiah 3:19 kay kanunay nakong mabasahan kini diha sa kasulatan, apan karon pa nako masabti ang giladmon sa epekto niini ngadto sa usa ka tawo. ■ Allen Hunsaker, Arizona, USA

Hinay-hinay nga nausab ang tuno sa tingog sa batan-ong babaye samtang siya nagbasa, ug mihinay-hinay siya sa pagbasa sa pagsugod niya og sabot sa mga pulong.



KAMO WALA MAGPUASA

Niadtong 1998 naganahan kaayo ko isip batan-ong inahan. Apan, usa ka adlaw, nalisang ko sa dihang ang akong unom ka bulan nga anak ingon og managhoy kon siya moginhawa ug dili makatulon bisag unsa. Ang doktor nakahiling dayon nga kini bronchiolitis, ang paghubag sa pinakagamay nga agianan sa hangin sa baga tungod sa viral infection. Iyang gireseta nga moinom og tambal ug magpa-physical therapy.

Ang pag-adto sa physical therapist usa ka pagsulay sa akong anak ug kanako. Dili komportable ang akong anak nga palihok-lihokon, ug nabalaka ko nga ang therapy sakit kaniya. Hinoon, mibati ko og kaisug, sa dihang ang therapist mipasabut sa kaayohan sa therapy.

Apan bisan sa pag-inom og tambal ug sa therapy, wala maayo ang kondisyon sa akong anak. Gamay siya og kaunon, ug padayon nga daw naghoy. Ang doktor mi-prescribe og dugang 5 ka sesyon ngadto sa 10 nga amo na nga natambongan uban sa physical therapist.

Atol sa ika-13 nga sesyon, nakabasa ko og artikulo nga gipapilit sa klinika sa doktor nga giulohan og “Ang Bronchiolitis Makamatay.” Samtang nagbasa, nakaamgo ko nga mahimong mamatay ang akong anak. Ingon og gikumot akong kasingkasing. Paghuman sa sesyon, ang therapist miingon nga wala mausab ang kondisyon sa akong anak. Dili ko sigurado giunsa nako pagpauli kay dili ko kakita og klaro tungod sa mga luha.

Gitawagan nako akong bana ug dayon nag-ampo. Misulti ko sa Langitnong Amahan nga kon Iyang kabubut-on nga kuhaon akong anak, Iya kong hatagan og kusog nga akong madala kini.

Human sa pag-ampo naghunahuna

ko unsa pa ang mahimong buhaton dugang sa pag-ampo ug sa panalangin sa priesthood nga nadawat sa among anak. Midalikyat ko og tan-aw sa butanganan og libro ug nakakita og *Liahona* (*L'Étoile* niadtong higayona). Giablihan ko kini bisan asa, nangita og tabang, ug nakakita og artikulo nga giulohan og “Nagpuasa Ko alang sa Akong Gamayng Anak.” Dayon klaro kong nakadungog og tingog, “Wala pa ka nagpuasa alang sa imong gamayng bata.”


Wala pa, busa diha-diha dayon nagpuasa ko alang kaniya. Sa sesyon sa therapy pagkasunod adlaw, nagpuasa pa ko. Human sa paghiling sa akong anak, ang therapist natingala.

“Ginang,” miingon siya nako, “naayo na ang imong anak. Wala ko

kasabut, apan wala na siya magkinahanglan og dugang sesyon.”

Dili ko makapugong sa akong luha sa kalipay. Pag-uli, miluhod ko aron pasalamatang Dios sa Iyang kalooy ug gugma. Gitawagan nako ang akong bana aron sultihan siya sa maayong balita. Dayon gitapos nako ang akong puasa uban sa kalinaw, wala magduhaduha sa pagtabang sa Ginoo.

Naayo ang akong anak, salamat sa hugot nga pagtuo, pag-ampo, mga panalangin sa priesthood, ug pagpuasa. Wala ko magduhaduha nga ang Langitnong Amahan nahigugma kanako ug sa akong anak. Masaligon ko nga Siya mopadayon sa pagtabang kanato sa pagbuntog sa atong kalisud. ■
Ketty Constant, Guadeloupe



Apan bisan sa pag-inom og tambal ug therapy, wala maayo ang kondisyon sa akong anak.



**Ni Bishop
Gérald Caussé**

Unang Magtatambag
sa Presiding Bishopric

Padayon sa Hugot nga Pagtuo

SA MAKALIBUG NGA KALIBUTAN

Natawo ko sa habagatang kasadpan sa France “sa matarung nga ginikanan” (1 Nephi 1:1) kinsa, gikan sa akong pagkabatan-on, mitabang kanako nga makabaton og pagtuo diha ni Jesukristo ug pagpamatuod sa gipahiuli nga ebanghelyo. Sa laing bahin, sa eskwelahan, daghan sa akong mga propesor ang mipadayag og pagduha-duha ug gani kalagot sa bisan unsang relihiyon. Kadaghan ko nakadungog sa mga pagtulun-an ni Korihor niadtong nagdaut sa akong pagtuo.

“Tan-awa, sila mga binuang nga mga tradisyon sa inyong mga amahan. Giunsa ninyo pagkasayud sa ilang pagkatinuod?”

“... Tan-awa, kamo dili masayud sa mga butang nga kamo dili makakita” (Alma 30:14–15).

Sa dihang 17 anyos ko, mitambong ko og mga klase sa philosophy sa high school. Usa ka adlaw ang magtutudlo miingon, “Sigurado ko walay tawo dinhi nga nagtuo nga aduna gyuy Adan!” Dayon gitan-aw niya pag-ayo ang klase sama sa usa ka tigpangusisa, andam nga moatake ni bisan kinsang motuo niini. Nahadlok ko! Apan, ang akong tinguha nga

Sa paglig-on sa atong mga pagpamatuod ug pagprotektar gikan sa sayop, kina-hanglan kanunay natong amumahon ug lig-unon ang atong pagtuo.

magmatinud-anon sa akong pagtuo mas lig-on. Mitan-aw ko sa palibut aron makita nga niadtong 40 ka mga estudyante ako lang usa ang miisa sa kamot. Ang magtutudlo, nakalitan, miusab sa hilisgutan.

May panahon sa kinabuhi sa tanang mga miyembro sa Simbahan nga mosagubang sa pagsulay sa kasensiro ug kalig-on sa ilang pagtuo. Ang pagkamaisugon niining mga pagsulay sa pagtuo makatabang kanato nga magmalig-on sa kalibutan nga nagkalibug. Kini nga kalibug makita sa daghang mga mensahe nga nagpalibut kanato. Sa pagsugod sa Internet, sama pananglit, ang dili mapugngan nga pagdagsang sa nagkasumpaki nga mga opinyon ug impormasyon moabut sa atong kinabuhi. Kini nga mga panagsumpaki mahimong makapalibug.

Unsaon nato pag-ila ang tinuod ug sayop? Unsaon nato nga dili mahisama niadtong “natago gikan sa kamatuoran tungod kay sila wala masayud asa kini pangitaa”? (D&P 123:12).

Anaa ra kini kanato kon kita magpabiling lig-on sa atong pagpamatuod. Kon ako maghunahuna sa nangagi, nakaamgo ko nga ang kalamposan sa akong personal nga panaw nag-agad sa pipila ka simpleng mga baruganan nga nakapabilin nako sa dalan. Kini nga mga baruganan nagtugot kanako nga molambo sa espirituhang paagi bisan pa sa “mga gabon sa kangitngit” (1 Nephi 12:17) ug mga lit-ag nga nagpalibut kanako.

Tinguhaa Kanunay ang Kamatuoran

Niadtong miangkong nga “kamo dili masayud” (Alma 30:15), ang



Ang mga disipulo ni Kristo gigutom ug giuhaw kanunay sa esprituhanong kahibalo. Kini nga personal nga praktis makapahimo kanato sa pagsunod sa ehemplo ni Joseph Smith.

Ginoo mitubag, “Pangayo, ug kamo pagahatagan; pangita, ug kamo makakaplag; pagtuktok ug kamo pagaablihan” (Mateo 7:7). Kini talagsaon nga saad.

Ang mga disipulo ni Kristo gigutom ug giuhaw kanunay sa esprituhanong kahibalo. Kining personal nga praktis makita diha sa pagtuon, pagpamalandong, ug pag-ampo matag adlaw. Kini nagtugot kanato nga mosunod sa ehemplo ni Joseph Smith, kinsa “miabut sa paghukom nga [siya] kinahanglan nga magpabilin sa kangitngit ug sa kalibug, o . . . mangutana sa Dios” (Joseph Smith—Kasaysayan 1:13).

Ang pagtuon sa pulong sa Dios makaprotekta kanato sa impluwensya sa sayop nga mga doktrina. Ang Ginoo miingon, “Kay ngadto kaniya nga modawat Ako mohatag og dugang pa; ug gikan kanila nga moingon, Kami adunay igo na, gikan kanila pagabawion gani bisan kana nga anaa kanila” (2 Nephi 28:30).

Dawata ang Wala Matubag nga mga Pangutana

Sa atong pagsiksik sa kamatuoran, kita matintal nga gustong masabtan

ang tanan diha-diha dayon. Apan, ang salabutan sa Dios dili matugkad nga “dili mahimo nga ang tawo maka-kaplag sa tanan niya nga mga paagi” (Jacob 4:8). Kinahanglan atong dawaton nga sa pagkaron dili matubag ang tanan natong mga pangutana. Sama ni Nephi, kita matinud-anong moila nga ang Dios “nahigugma sa iyang mga anak; bisan pa niana, [kita] wala masayud sa kahulugan sa tanan nga mga butang” (1 Nephi 11:17).

Ang Ginoo, bisan pa man, naghatag nato og kahibalo nga kinahanglanon sa atong kaluwasan ug kahimayaan. Siya nagsaad, “Bisan unsa ang inyong pangayoon sa Amahan diha sa akong ngalan kini ihatag nganha kaninyo, nga mao ang angay alang kaninyo” (D&P 88:64). Kita makadawat niining mga tubag sa malambuong paagi, “pagtulun-an human sa usa ka pagtulun-an, lagda human sa usa ka lagda, diyutay dinhi ug diyutay didto” (2 Nephi 28:30), nag-agad sa atong panginahanglan ug kapasidad sa pagsabut.

Anaa kanato ang pag-ila sa mga pangutana nga mahinungdanon gayud sa atong mahangturong paglambo ug niadtong resulta lamang sa kakuryuso sa hunahuna, panginahanglan og pruwaba, o tinguha sa pagtagbaw sa kaugalingon.

Tinguhaa ang Pagpamatuod sa Espiritu

Matag usa kanato makasinati og mga higayon sa personal nga pagduha-duha. Kini nga mga pagduha-duha dili gayud mahupay pinaagi sa pagsiksik og pagpasabut. Sama pananglit, pipila sa scientific o archaeological nga mga pagkaplag makalig-on sa atong pagpamatuod



Kinahanglan atong buhaton. Kita dili maglaum nga makadawat og personal nga pagpadayag gawas kon molihok sama sa mga disipulo ni Jesukristo.



sa kasulatan, apan ang espirituhanong kahibalo dili mamatud-an sa pangatarungan o pisikal nga ebidensya.

Ang kahibalo sa kamatuoran nakabasi sa pagpamatuod sa Espiritu. Sama sa giingon ni Apostol Pablo, “Walay bisan usa nga makasabut sa mga hunahuna sa Dios gawas [pinaagi] sa Espiritu sa Dios” (1 Mga Taga-Corinto 2:11).

Kita may kasiguroan nga “ang Espiritu mamulong sa kamatuoran ug dili mamakak” (Jacob 4:13). Ang Espiritu adunay mas dakong epekto kanato kaysa atong lawasnon nga mga balatian. Ngadto ni Apostol Pedro, kinsa mideklarar sa iyang pagtuo, si Jesus mitubag, “Dalaygon ikaw, Simon Bar-jona: kay wala kini ipadayag kanimog tawo, kondili gipadayag kini kaniyo sa akong Amahan nga anaa sa langit” (Mateo 16:17). Hinoon, pila ka buok ang kadungan ni Kristo nga wala moila kaniya bisan sila mismo nakakita Niya!

Tinguhaa ang mga Pulong sa mga Propeta ug Apostoles

Bag-ohay lang nagka-istoryahanay mi sa usa ka representante sa laing simbahan. Nagtinguha nga masayran kon kita Kristiyano ba nga simbahan, siya misugyot sa pag-organisar og debati sa mga eksperto sa doktrina sa duha ka relihiyon.

Ang kalig-on ug kamatuoran sa doktrina ni Kristo, hinoon, wala mag-agad sa debate sa mga eksperto apan anaa sa sagradong mga pagpamatuod sa Iyang pinili nga mga disipulo. Si Propeta Joseph Smith mideklarar, “Ang sukaranan nga mga baruganan sa atong relihiyon mao ang pagpamatuod sa mga Apostoles ug sa mga

Propeta, mahitungod ni Jesukristo, nga Siya namatay, gilubong, ug mibangon sa ikatulong adlaw, ug mikayab ngadto sa langit.”¹

Sa daghang mga siglo sa Apostasiya, ang kalibutan wala magkulang sa mga eksperto, apan *nawala* ang mga saksi ni Kristo. Isip resulta, ang rason sa tawo mipuli sa kalig-on sa balaang pagpadayag.

Kon kita magkaproblema, ang una natong buhaton mao ang pagsiksik sa kasulatan ug sa mga pulong sa buhi nga mga propeta. Ang ilang mga sinulat nga kahayag nga dili molingla kanato: “Busa, kami nangita sa mga propeta, ug kami adunay daghan nga mga pagpadayag ug sa espiritu sa pagpanagna; ug ingon nga aduna sa tanan niini nga mga saksi kami nakaangkon og usa ka paglaum, ug ang among hugot nga pagtuo nahimo nga dili matarug” (Jacob 4:6).

Amumaha ang Inyong Pagtuo

Dili kita makadawat og “saksi hangtud human sa pagsulay sa [atong] pagtuo” (Ether 12:6). Ang hugot nga pagtuo adunay gahum sa pagpadayag sa kahibalo sa mahang-turong kamatuoran. Sa paggamit niini kutob sa mahimo, ang kahibalo mahimong hingpit ug perpektong kasiguradoan. Kabahin sa igsoon ni Jared, si Moroni misulat nga “tungod sa kasayuran niini nga tawo siya dili mapugngan gikan sa pagtan-aw sulod sa tabil; . . . ug siya wala na mag-angkon og hugot nga pagtuo, kay siya nasayud, sa walay pagduh-duha” (Ether 3:19).

Sa paglig-on sa atong mga pagpamatuod ug pagprotektar gikan sa sayop, kinahanglan kanunay natong amumahan ug lig-unon ang atong

pagtuo. Sa pagsugod niini, kinahanglan kitang magbaton og putli nga kasingkasing ug magmapainubsanon. Si Jacob mipasidaan sa katawhan ni Nephi kabahin sa garbo “kon sila makinaadmon . . . nagtuo nga sila maalamon, ug . . . dili mopatalinghug ngadto sa tambag sa Dios, kay sila misalikway niini, nagdahum nga sila nasayud sa ilang mga kaugalingon” (2 Nephi 9:28).

Sunod, kinahanglan atong buhaton. Si Apostol Santiago mitudlo nga ang “pagtuo [diay] naglihok duyog . . . sa binuhatan, ug nga ang iyang pagtuo nahingpit pinaagi sa iyang binuhatan” (Santiago 2:22). Kita dili maglaum nga makadawat og personal nga pagpadayag gawas kon molihok sama sa mga disipulo ni Kristo. Ang pagtuman sa atong mga pakigsaad ngadto sa Dios makapahimo nato sa pagdawat sa pagpakig-uban sa Espiritu Santo, kinsa molamdag sa atong salabutan ug mopalambo sa atong espiritu.

Mopamatuod ko sa katinuod niining mga baruganan. Nasayud ko pinaagi sa kasinatian nga kon ato kining buhaton, kita siguradong maprotektahan sa libug nga kalibutan. Kini adunay talagsaong saad: “Ug tungod sa inyong kakugi ug sa inyong hugot nga pagtuo ug sa inyong pailub uban ang pulong sa pag-alima niini, nga kini mogamot diha kaninyo, tan-awa, dili madugay kamo mopu-pu sa bunga niini, diin bililhon kaayo, . . . ug kamo mokaon sa bunga niini gani hangtud kamo mabusog, nga kamo dili na gutumon, ni kamo uhawon” (Alma 32:42). ■

MUBO NGA SULAT

1. *Mga Pagtulun-an sa mga Presidente sa Simbahan: Joseph Smith*, (2007), 58.

“Naadik ako sa pornograpiya. Giguba niini ang akong kinabuhi. Unsay akong mahimo aron mahunong ang pagkaadik?”

Ang pornograpiya usa ka dako og grabe nga problema. Kini makadaut sa imong kalag ug makahugaw sa imong hunahuna. Moguba kini sa imong mga pakigrelasyon. Ang pagtan-aw og pornograpiya makapahunong sa pakig-uban sa Espiritu Santo kanimo.

Ang pagbuntog sa pagkaadik dili sayon, apan yano lamang—desisyuni karon ang dili na pagtan-aw ug paghunahuna og pornograpiya. Pakigsultihi dayon ang inyong bishop o branch president. Ayaw kaulaw sa pagpakigsulti kaniya. Makatabang siya kanimo nga makahinulsol aron ang Pag-ula sa Manluluwas makalimpyo sa imong hunahuna ug espiritu. “Pinaagi niini kamo masayud kon ang usa ka tawo naghinulsol sa iyang mga sala—tan-awa, siya mokumpisal kanila ug mobiya kanila” (D&P 58:43).

Buhata ang tanan aron makalikay sa pornograpiya sa uma-abut. Tingali nagpasabut kana nga dili mogamit sa imong cell phone ug sa mga akses sa Internet, gawas lang kon naa sa publikong mga dapit, nga dunay maayo nga mga filter nga naka-install.

Himoa ang pag-ampo, pagtuon sa kasultan, pagserbisyo, ug uban pang makabayaw nga mga kalihokan nga maoy focus sa imong kinabuhi. Ang Ginoo nagtudlo, “Hunong gikan sa . . . inyong tanan nga maibugon nga mga tinguha” ug “himoa ang hiyas nga modayan-dayan sa inyong hunahuna nga walay paghunong” (D&P 88:121; 121:45). Uban sa tinuoray nga paghinulsol ug sa tabang sa Manluluwas ug sa Iyang pinili nga mga sinugo, ikaw *makahimo* pagbuntog niini nga pagkaadik.

Basaha ang mga Kasulatan



Pag-ampo alang sa kalig-on. Si Enos nag-ampo sa tibuok adlaw, nangamuyo sa Ginoo nga mapasaylo ang iyang mga sala, ug tungod sa iyang hugot nga pagtuo, gibati niya ang hilabihan nga kalinaw ug ang kahamol sa konsensya nawala.

Basaha ang mga kasulatan aron maangkon ang Balaang Espiritu, kon Siya imong kauban, dili ka makahunahuna o mohimo og hugaw nga mga butang. Basaha ang Salmo 24:3–5 (mahitungod sa pagpabilin sa kaugalingon nga limpyo). Ayaw pag-urong: magdula og sports, paglingaw-lingaw, ug ayaw tuguti nga maimpluwensyahan ka sa nagpakaaron-ingnon nga mga higala. Kon moabut ang mga tintasyon,

pagmalig-on ug balibari kini. Hinumdumi nga ang Langitnong Amahan nahibalo sa tanan nimong gihuna-huna ug gibuhat.

Ana G., edad 17, Zulia, Venezuela

Ayaw Gayud Paghunong

Ang pornograpiya miguba sa akong kinabuhi, apan sa katapusan nahunong ra nako kini human sa daghang pag-antus. Ang proseso sa paghinulsol dugay ug lisud, apan pag-ampo sa tinuoray matag adlaw alang sa tabang sa Ginoo atol niini nga pagsulay. Ayaw gayud paghunahuna nga ikaw dili takus alang sa paghinulsol, kay ang Pag-ula alang man sa tanan. Hinumdumi usab nga sa matag higayon nga tintalon ka, naningkamot si Satanas sa pagbunlot kanimo ngadto sa pagpakasala. Apan sa kanunay imo ra kini nga pagpili sa pagnunot ba o pagbaliwala sa tintasyon. Ayaw gayud paghunong sa imong kaugalingon o sa Ginoo, kay dili Siya mohatag og pagsulay kanimo nga dili nimo mapas-an (tan-awa sa 1 Nephi 3:7).

Batan-ong babaye nga taga-Victoria, Australia

Pakigsultihi ang Imong Bishop.

Pakigsultihi dayon ang imong bishop sa pinakadali nga panahon. Lisud ang paghimo nianang una nga lakang, apan kinahanglang makigsulti ka kaniya aron sa paghinulsol. Dili ka niya himoon nga kataw-anan o masuko kanimo. Naghunahuna siya kanimo ug ang pinakamaayo lamang ang iyang gusto alang kanimo. Nag-antus si Jesukristo alang sa imong mga sala aron bation nimo nga gawasnon na usab gikan sa kasaypanan ug kasubo nga gibati nimo sa dugayng panahon (tan-awa sa Alma 5:9). Dili pa kaayo ulahi ang pag-usab. Bation nimo pag-usab ang tinuod nga kalipay. Pag-ampo sa Dios nga hatagan ka og kaisug nga maghinulsol.

Taylor P., edad 18, North Carolina, USA

Ang mga tubag gituyo alang sa pagtabang ug panglantaw, dili isip usa ka opisyal nga mga pamahayag sa doktrina sa Simbahan.

Pagkanta og Himno



Ang pornograpiya dili Iya sa Dios. Ang proseso sa paghinulsol dugay ug sakit, apan posible kini! Kinahanglan nga duna kay tinguha sa pag-usab,

sa pag-ila sa gibug-aton sa sala, ug labaw sa tanan sa pagpangayo og tabang gikan sa Langitnong Amahan. Aron malikayan ang tintasyon, duna koy litrato ni Jesukristo tapad sa akong computer. Anaa Siya kanunay nagbantay kanako! Kon ang mga hulagway o musika sa pornograpiya mosulod sa akong hunahuna, mokanta ko og himno ug sa dili madugay kining dautan nga mga butang makalimtan ra.

Natália Q., edad 18, São Paulo, Brazil

Pag-ampo

Ang gahum sa pag-ampo dili mahulagway; naghatag kini kanato og kusog aron makasagubang sa mga kalisud ug magmadaugon (tan-awa sa D&P 10:5). Kon mangita ka sa Langitnong Amahan pinaagi sa pag-ampo, mohatag Siya kanimo og kusog aron makalingkawas gikan sa tintasyon. Kon magbasa ka sa mga kasulatan matag adlaw, madugangan ang imong kalig-on. Kon ikaw magasalig sa Dios ug dili sa kaugalingon nimong kusog, Siya mopalingkawas kanimo sa mga kadena nga naghigot kanimo. Pinaagi sa Pag-ula ikaw mamaayo.

Gian G., edad 18, Rivera, Uruguay

Ikumpisal

Aduna ko niini nga problema. Naghasol gihapon kini kanako. Una sa tanan, hununga ang pagtan-aw og pornograpiya. Duola ang Langitnong Amahan. Akong gibati nga Siya mipasaylo kanako dihang wala ko magtuo nga mapasaylo diay ko. Ug dayon naghunahuna ko nga wala na koy problema. Dili ko gusto nga dunay tawo nga mahibalo mahitungod niini, maulaw kaayo ko. Apan kinahanglan

kini nimong isulti sa imong bishop. Gisulayan nako nga dili himoon. Apan kanunay nakong nadungog ang mga pulong, “Kon duna kay problema sa pornograpiya, duola ang imong bishop.” Usa ka adlaw, sa interbyu alang sa akong rekomend sa templo, nasulti ko ra kini. Ug nindot kaayo ang akong gibati pagkahuman niini. Gawasnon na ako. Ang kabug-at nawala. Pagkahuman, gisulitahan nako ang akong mga ginikanan. Naguol sila, apan gidawat nila kini. Ayaw kahadlok sa pagtug-an niini.

Batan-ong babaye nga taga-Tennessee, USA

Isulti sa Uban

Nalulong ko sa pornograpiya sa dugay nga panahon. Pinaagi lamang sa suporta sa akong mga ginikanan ug sa tabang sa akong bishop nga sa katapusan nakalingkawas ko. Ang pagkontrolar sa akong paggamit sa internet o ang pipila ka semana nga dili makaambit sa sakramento mao ang gamayng kantidad nga bayaran alang sa kalipay nga mahimong limpyo. Ang propesyonal nga mga magtatambag makatabang usab ug dili ka nila hukman. Sila usab usa ka himan nga gihatag sa Ginoo kanato.

Batan-ong lalaki nga taga-California, USA

SUNOD NGA PANGUTANA

“Unsaon man nako sa pagbarug sa ‘balaang mga dapit’ kon daghan kaayong mga dili balaanon sa akong palibut, sama diha sa eskwelahan?”



UNSAON SA PAGPANALI-POD BATOK SA TINTASYON

Sugdi pinaagi sa pagpalayo sa inyong kaugalingon gikan sa mga tawo, mga materyal, ug mga sitwasyon nga makapasakit kaninyo. . . .

“Hibaloi nga ang mga tawo nga nagapos sa tinuod nga pagkaadik sagad mas nagkinahanglan og tabang kaysa kaugalingong tabang, ug kana tingali naglakip kaninyo. Pangitaa kana nga tabang ug dawata kana. Pakigsulti sa inyong bishop. Sunda ang iyang tambag. . . .

Uban sa mga filter diha sa mga computer ug sa kandado sa mga pagbati, hinumdumi nga ang bugtong matuod nga kontrol sa kinabuhi mao ang kaugalingong pagkontrol. Gamiti og dugang nga kontrol bisan sa ginagmay nga mga higayon nga masugatan ninyo. Kon ang salida sa TV malaw-ay, palonga kini. . . .

“Paugmad ug kon asa ang Espiritu sa Ginoo adto usab kamo. Siguroha nga naglakip kana sa inyong pamilyal o apartment, nga nagpiho gayud sa matang sa art, musika, ug literatura nga inyong gikolekta.”

Elder Jeffrey R. Holland sa Korum sa Napulog Duha ka mga Apostoles, “Walay Luna alang sa Kaaway sa Akong Kalag,” Liahona, Mayo 2010, 45–46.

Isumiter ang inyong tubag sa dili pa ang Septyembre 15, sa liahona.lds.org, pinaagi sa e-mail ngadto sa liahona@ldschurch.org, o ipadala ngadto sa:

Liahona, Questions & Answers 9/12
50 E. North Temple St., Rm. 2420
Salt Lake City, UT 84150-0024, USA

Ang mga tubag tingali i-edit alang sa gitas-on o sa pagklaro.

Ang mosunod nga impormasyon ug pagtugot kinahanglan gayud nga ilakip sa inyong e-mail o sulat: (1) kompleto nga pangalan, (2) petsa sa pagkatawo, (3) ward o branch, (4) stake o district, (5) ang inyong sulat sa pagtugot, ug, kon kamo ubos sa 18 anyos, ang sulat sa pagtugot sa inyong ginikanan (ang e-mail mahimong madawat) aron sa pagmantala sa inyong tubag ug litrato.



Ni Elder
Tad R. Callister
Sa Kapangulohan
sa Seventy

Unsaon Nako sa **PAGKAHIBALO** *Nga Ako* **NAPASAYLO?**

Dihang nagserbisyo ko isip presidente sa misyon, ang mga misyonaryo sagad nga mangutana niining duha ka pangutana: (1) Unsaon nako sa pagkahibalo nga ako napasaylo sa akong mga sala? ug (2) kon ako napasaylo, nganong mobati gihapon ko kahasol sa konsensya?

Dihang gipangutana kining duha ka pangutana, mitubag ko sa pag-ingon, “Kon bation ninyo ang Espiritu—kon kamo nag-ampo, nagbasa sa mga kasulatan, nagtudlo, nagpamatuod, o sa bisan unsang higayon—nan mao kana ang inyong saksi nga kamo napasaylo o, sa laing bahin, ang makalimpyo nga proseso nanghitabo, kay ang Espiritu dili makapuyo sa dili balaan nga tabernakulo” (tan-awa sa Alma 7:21). Sa kasagaran mga sitwasyon ang proseso sa pagkalimpyo dili madali tungod kay ang pag-usab sa atong kasingkasing dili madali, apan sulod niana nga panahon, makapadayon kita uban sa pagsalig nga ang Dios miaprubar sa atong kalamboan sumala sa gipakita pinaagi sa presensya sa Iyang Espiritu.

Mas molisud-lisud ang ubang tawo sa ilang kaugalingon kay sa Ginoo. Dayag lang, kita kinahanglan nga maghinulsol aron mahimong takus sa makalimpyo ug makapasaylo nga mga gahum sa Pag-ula, apan sa higayon nga kita nakahinulsol, walay matawag nga bulingon nga nakahinulsol sa gingharian sa Dios. Walay itom nga marka sa atong tuo nga kiting nga mag-ingon nga “tuig 2008 nga sala” o brown nga lama sa wala nga dunggan nga mag-ingon “tuig 2010 nga kalapasan.” Mipahayag ang Ginoo sa malukpanon nga makalimpyo nga gahum sa Pag-ula dihang miingon Siya nga, “Bisan pa ang inyong mga sala mapula, sila pagapution sama sa nieve” (Isaias 1:18). Mao kana ang milagro sa Pag-ula ni Jesukristo.

Sa pipila ka mga okasyon nagtuo ko nga ang atong mga sala malimpyohan sa dili pa mawala ang atong kahasol sa konsensya. Nganong ingon man niana? Tingali sa kalooy sa Dios, ang panumduman niana nga sala usa ka pasidaan, usa ka espirituhanong “pasidaan sa paghunong” nga mopahibalo kon ang

sama nga mga tintasyon moabut: “Ayaw pag-anha niana nga dalan. Nahibalo ka kon unsa ang kasakit nga ikahatag niini.” Tingali alang niadtong anaa sa proseso sa paghinulsol, nagpasabut kini isip panalipod, dili usa ka silot.

Ang kahasol sa atong konsensya mawala ba gayud? Ang saad sa Ginoo sigurado niana nga bahin. Sa mga matarung, ang Ginoo miingon nga ang panahon moabut nga “wala na ang . . . pagminatay, ni paghilak, *ni kasakit: kay ang unang mga butang nangagi na*” (Pinadayag 21:4; emphasis gidugang).

Wala ko kahibalo kon makalimot ba kita sa atong mga sala, apan ang panahon moabut nga kadtong maghinulsol dili na pagahasulon sa ilang mga sala. Ingon niana ang nahitabo kang Enos, kansang “kasaypanan nakuha sa hingpit” (Enos 1:6), ug ang nakabig nga mga Lamanite, kinsa nakasaksi nga ang Dios “mikuha sa mga kasaypanan gikan sa atong mga kasingkasing” (Alma 24:10), ug kang Alma, kinsa namahayag, “ako *wala na* mahinumdom sa akong mga kasakit” (Alma 36:19; emphasis gidugang).



Mawala ba gayud ang atong kahasol sa konsensya? Ang saad sa Ginoo sigurado alang niana nga bahin. Alang sa mga matarung, ang Ginoo miingon nga ang panahon moabut nga "wala na ang . . . pagminatay, ni paghilak, ni kasakit."

Kon daghan kitag nakat-unan mahitungod sa Pag-ula ug gamiton ang hugot nga pagtuo sa makaayo nga mga gahum ni Kristo, mas takus kita nga mapasaylo ug mopasaylo sa atong kaugalingon.



Walay pagduda tanan sila nahinumdom sa ilang mga sala, apan bisan pa wala na kini maghasol kanila. Ang walay sukod nga mga gahum sa Pag-ula milagruso nga miayo sa matag samad ug mihupay sa matag konsyensya uban “ang kalinaw sa Dios, nga lapaw sa tanang pagpanabut” (Mga Taga-Filipos 4:7).

Maingon og adunay duha ka mga kahimtang nga mopalingkawas kanato gikan sa kahasol sa konsensya ug kasakit. Una mao ang atong dili mapaling nga hugot nga pagtuo kang Jesukristo ug sa Iyang Pag-ula. Dihang gipangutana si Enos kon sa unsang paagi “nawala” ang iyang kasaypanan (tan-awa sa Enos 1:6–7), ang Ginoo mitubag, “Tungod sa imong hugot nga pagtuo ni Kristo” (Enos 1:8). Sa samang paagi, kon daghan kita og nakat-unan mahitungod sa Pag-ula ug gamiton ang hugot nga pagtuo sa makaayo nga mga gahum ni Kristo, mas takus kita nga mapasaylo ug mopasaylo sa atong kaugalingon. Ikaduha mao ang paglambo sa kinaiya nga “wala nay hilig sa pagbuhat og dautan, apan sa pagbuhat og maayo sa kanunay” (Mosiah 5:2). Kon mahitabo kini, wala na kita magtan-aw sa kaugalingon natong “kalibutanon nga kahimtang” (Mosiah 4:2) apan isip espirituhanong mga anak sa Dios. Atong mahibaloan nga lahi kita nga tawo kay sa usa nga nakasala. Si Scrooge, ang bantugan nga karakter sa *A Christmas Carol*, ni Charles Dickens may dakong kausaban sa iyang kinabuhi nga siya matarung nga makapamahayag, “Dili na ako mao ang kanhi nga tawo.”¹

Kon kita naghinulsol, nahimo kitang lahi nga tawo kay sa kaniadto. Ang pagkaamgo sa atong bag-ong pagkatawo, inubanan sa atong hugot nga pagtuo sa makalimpyo nga mga gahum ni Kristo, makatabang kanatong moabut sa punto diin makasulti

kita sama sa giingon ni Alma, “ako wala na mahinumdom sa akong mga kasakit; oo, ako wala na samoka sa panumduman sa akong mga sala” (Alma 36:19). Sa samang paagi, mahupay kita pinaagi sa kamatuoran nga kita sa katapusan hukman sa Dios kon si kinsa na kita, dili kay kon unsa kita kaniadto.

Si Apostol Pablo mihatag og mapuslanon nga tambag natong tanan nga nakasala apan naningkamot nga maghinulsol. Miingon siya nga kinahanglan “kalimtan ko ang nanagpangagi na ug sa nagadasdas ako paingon sa anaa sa unahan” (Mga Taga-Filipos 3:13). Sa laing pagkasulti, kinahanglan nga atong hikalimtan ang mga nangagi ug magpadayon, magasalig sa matubsanon nga gahum sa Dios. Ang ingon niini nga paningkamot sa atong bahin usa ka pagpakita sa atong hugot nga pagtuo. Dugang pa, mitambag si Pablo, “Maliipayon ang tawo nga walay ikahukom batok sa iyang kaugalingon” (Mga Taga-Roma 14:22).

Mintras tanto, hangtud nga ang katapusang lugas sa kahasol sa konsensya mawala, kon mobati kita sa Espiritu sa Ginoo makapadayon kita uban sa kamasaligon nga nalimpyohan kita o ang makalimpyo nga proseso naglihok sa balaanong milagro diha sa atong kinabuhi. Ang saad sigurado—kon maningkamot kita kutob sa atong mahimo sa paghinulsol, malipyoan kita sa atong mga sala ug ang kahasol sa atong konsensya sa katapusan mawala, tungod kay ang Pag-ula sa Manluluwas mikunsad dili lamang ubos sa atong mga sala apan usab sa atong mga kahasol sa konsensya. Dayon maangkon nato ang hingpit nga kalinaw sa kaugalingon ug sa Dios. ■

MUBO NGA SULAT

1. Charles Dickens, *A Christmas Carol in Prose* (1843), 150.

Atong Luna



ANG AKONG PAVORITO NGA KASULATAN

1 Nephi 3:7

Kini nga kasulatan naglig-on sa akong pagtungod kay gipakita ni Nephi nga panahon sa mga pagsulay mituman gihapon siya ug mihimo sa gipabuhat kaniya sa Ginoo. Ug ang Langitnong Amahan mipanalangin kaniya tungod niana.

Kaila T. (sa ibabaw), Philippines

PAGPANGITA OG USA KA PERSONAL NGA PAGPAMATUOD

Natawo ko sa Simbahan, ug gamay ra ang akong pagpamatuod hangtud nga gisugdan nako sa pagbasa ang mga kasulatan uban sa tiunay nga katuyoan. Imbis mobasa lamang sa pulong nga naa sa papel, gisiksik pa gayud nako ang mga kahulugan niini. Gibasa nako ang 3 Nephi 11:3, ug akong gibutang ang akong kaugalingon sa ilang dapit. Kadto nga kasulatan ug ingon man ang nagsunod niini mituhop kanako. Sukad niadto nagsigi na ko og basa sa mga kasulatan ug nag-ampo nga tinuoray, ug mitubo ang akong pagpamatuod.

Ryan R., Washington, USA

KATUNGDANAN NGADTO SA DIOS

Nagtrabaho ko sa pagkompleto sa akong Ganti sa Katungdanan Ngadto sa Dios, bisan didto pa ko nagpuyo sa Venezuela ug sa dihang mibalhin ko kuyog sa akong pamilya ngadto sa China.

Ang programa nga Katungdanan ngadto sa Dios dinasig gayud. Ang usa ka batan-ong laki makakat-on og talagsaong mga butang nga magamit sa tibuok niyang kinabuhi pinaagi sa pagkompleto sa mga tumong diha niana nga programa. Makakat-on siya og espirituhanong mga butang, temporal nga mga butang, pisikal nga mga butang, ug daghan pa.

Tugbang gayud ang paningkamot sa pagpahinungod sa kaugalingon aron makompleto kini nga mga tumong. Nakakat-on ko nga mahimong mas maayo nga tawo, mitubo ang akong pagpamatuod sa ebanghelyo ni Jesu-kristo, ug akong naandam pag-ayo ang akong kaugalingon sa pagdawat sa Melchizedek Priesthood ug magserbisyo og usa ka misyon. Makalipay ang pagkasayud nga mahimo akong maayong ehemplo sa umaabut nakong mga anak.

Jonathan A., China

PERSONAL NGA KAUSWAGAN

Niadto Pebrero 27, 2011, nadawat nako ang Pasidungog sa Pagka-Batan-ong Babaye [Young Womanhood Recognition]. Nalipay ko nga nakompleto nako ang programa sa Personal nga Kauswagan, nga kanunay kong putli ug limpyo, ug makasul-ob ko sa akong medalyon uban sa garbo. Nahibalo ko nga ang organisasyon sa Young Women nagtabang kanamo nga molambo ug maandam ang kaugalingon alang sa kaminyoon sa balaan nga templo. Mapasalamaton ko sa akong Langitnong Amahan tungod niini nga organisasyon. Sa pagkadawat sa akong medalyon, nakompleto nako ang usa sa akong mga tumong, ug nahibalo ko nga makapadayon ko sa paghimo og mas maayo pa sa buluhaton sa Ginoo.

Katherine M., Venezuela

NGANO NGA ADUNAY MGA PAGSULAY?

Sa bisan unsang mga panahon maghunahuna kita nganong may mga problema man ta bisan nagsunod kita sa mga sugo ug nagpakabuhi sa ebanghelyo. Dili gayud nato hikalimtan nga mianhi kita sa yuta aron masulayan. Kon malatasan nato ang mga pagsulay ug makapakita sa Langitnong Amahan nga Siya atong gihigugma pinaagi sa atong mga pagpili, kita Iyang panalanginan aron diha sa atong mga pamilya ang Espiritu sa Ginoo modumala.

Kahellyn V. (sa ubos), Venezuela



Usa ka **SAKRIPISYO** apan **HINGPIT ANG KALIPAY**



Ang akong tinguha nga magserbisyo og usa ka misyon hapit mawala tungod kay nalipay na ko sa akong kinitan.

Ni Edward M. Akosah

Sa sayis anyos pa ko, gikahimat sa akong mama ang mga misyonaryo ug mipasakop sa Simbahan sa Ghana, Africa. Gibiyaan siya sa akong papa nga may lima ka anak, apan ang mga pagtulun-an sa Simbahan nagtabang sa among pamilya nga kanunayng lig-on. Kami mipangga sa matag usa ug dunay kalinaw sa among panimalay. Ganahan kong mosimba kuyog ni mama ug nalingaw sa pagtambong og mga klase sa Primary ug hangtud sa seminary.

Isip usa ka batan-ong lalaki gitawag ko nga ward missionary ug nalingaw sa pag-proselyte kuyog sa mga misyonaryo. Nakita sab nako ang pipila ka mga batan-ong lalaki sa among ward nga nangadto og misyon. Dihang nauli na sila, mga lahi na sila. Mas maalam na sila ug hingkod, sa pisikal ug sa espritwal. Ang

magulang nako nga lalaki nagmisyon usab. Dihang miuli na siya, nakita nako ang daghang kalamboan sa iyang kinaiya. Kanunay kong nangutana sa kaugalingon, “Unsa man ang naa sa misyon nga miusab ug mipalambo pag-ayo niining mga tawhana?” Nadasig ko nga magmisyon.

Pagkahuman nako sa high school, nagtrabaho ko aron makatigom og kwarta alang sa misyon. Sa wala madugay ang akong tinguha nga magmisyon nawala tungod kay nalipay nako sa akong kinitaan. Usa gayud ka sakripisyo ang pagmisyon tungod kay ang akong kinitaan nakatabang sa pagsuporta sa akong pamilya. Sa matag higayon nga sugdan nako sa pagsulat ang mga porma sa akong pagmisyon, maghunahuna ko mahitungod sa kwarta nga akong mabiyaan, ug akong ibutang ang mga porma ug mopadayon sa pagtrabaho.

Dihang ang akong mga higala nanglarga na sa misyon, dili maayo ang akong gibati tungod kay nahibalo ko nga angay gayud usab kong mangandam nga moadto. Tungod niini gisuta nako ang akong kaugalingon. Naghunahuna ko, “ang pagpaluyo sa propeta ug sa akong mga lider dili lamang ang pag-isa sa kamot.

Pagbuhat kini sa unsay ilang gisulti ug pagsunod sa mga sugo sa Langitnong Amahan.”

Karon na ang panahon sa pag-alagad og misyon, mao nga gisumiter nako ang akong mga papeles sa misyon ngadto sa bishop. Ikaduha kadto nga pinakamalipayong adlaw sa akong kinabuhi. Ang pinakamalipayong adlaw mao kadtong gitawag ko sa akong bishop ngadto sa iyang opisina ug mihatag kanako og puti nga envelope nga gisudlan sa tawag sa akong pagmisyon ngadto sa Nigeria Ibadan Mission. Puno sa kalipay ang akong kasingkasing.

Didto sa missionary training center, mas nadugangan ang akong kahibalo sa mga doktrina sa ebanghelyo ug nakakat-on og talagsaong mga butang. Nadawat usab nako ang kaugalingon nakong endowment sa templo. Mapasalamaton kaayo ko tungod sa akong desisyon nga magmisyon, ug wala gayud akoy pagmahay niini. Ako usab mitubo sa espirituhanong paagi sa akong misyon. Nagtuo ko niini kay nakatabang ako sa mga tawo nga makadawat sa sama nga mga panalangin sa ebanghelyo nga nagdala og hilabihang kalipay ngari kanako ug sa akong pamilya. ■

PAGHUNAHUNA SA AKONG KAUGALINGON NGA DIDTO SA TEMPLO

Usa ka ambungan nga lalaki gikan sa trabaho mihangyo nga makig-date nako, apan dili siya miyembro sa Simbahan, ug duna koy tumong nga magminyo sa templo.

Ni Adriane Franca Leao

I sip batan-ong babaye, nangandoy kong mahimo nga bahin sa usa ka mahangturon nga pamilya. 12 anyos ko dihang nabugkos ang akong pamilya sa Templo sa São Paulo Brazil. Hingpit ang akong panumduman nga nagluhod uban sa akong pamilya sa altar sa templo ug gi-bugkos uban sa akong mga igsoon ngadto sa among mga ginikanan alang sa karon ug alang sa tanang kahangturan. Didto nahibalo ko nga kini ang matang sa pamilya nga akong gusto. Gibutangan nako og litrato sa Templo sa São Paulo ang kilid sa akong higdaanan, ug tanawon ko kini matag gabii, nagbag-o sa akong pasali nga makabaton og mahangturon nga pamilya.

Pipila ka tuig ang milabay nagtrabaho ko sa usa ka komersyal nga departamento sa dako nga kompanya. Usa ka adlaw ang among manager mipaila kanako sa usa bag-ong empleyado. Taas siya nga lalaki nga dunay madanihon nga blue nga mga mata, yano nga pahiyom, ug maayo nindot ang pamayhon.

Dili ko makatuo nga sa wala madugay nagsugod siya sa pag-ibid ibid nako. Akong gibati ang tumang kalipay! Sa una namo nga panag-date, na-excited kong mahibalo nga usa diay siya ka drummer sa banda nga nakasinati og mga kalampusan. Nahibaloan sab nako nga manabako siya ug moinom, apan



nangatarungan ko nga, kay dili man siya miyembro sa Simbahan, dili kini sayop alang kaniya.

Nianang gabhiona sa akong pag-abut sa balay, ang akong hunahuna mao lamang kadtong ambungan nga batan-on. Apan sa dihang miluhod ko sa pag-ampo, akong nakita ang litrato sa templo, ug usa ka lahi nga pagbati ang miabut kanako. Gibaliwala ko kini ug natulog.

Sa pagkasunod adlaw, dihang nagkuyog mi, ang kamatuoran nga moinom siya ug manabako naghatag kanako og ngil-ad nga pagbati. Naulaw ko nga molingkod sa usa ka lamesa nga may mga ilimnon, bisan wala ko motandog bisag usa niini. Sa una excited ko ug dayon nasagmuyo dihang misulay siya sa paghalok

kanako. Dihang akong napanima-hoan ang sigarilyo ug bino sa iyang ginhawa, wala siya molampus sa iyang tinguha!

Miluhod ko kilid sa akong higdaanan sa pag-ampo nianang gabhiona, nagtan-aw sa litrato sa templo. Nakita nako nga dili kining matanga sa tawo ang makadala kanako ngadto sa templo alang sa mahangturon nga kaminyoon.

Mihigda ko og natulog, nga malipayong naghunahuna sa akong tumong nga magminyo sa takus nga tawo nga uban niya makaestablisar ko og mahangturon nga pamilya.

Bisan og ang drummer madanihon gihapon, ang iyang pagkaromantiko wala na makadani kanako. Nahibalo ko sa matang sa kaminyoon nga akong gusto.

Paglabay sa usa ka tuig naminyo ko sa Templo sa São Paulo sa usa ka takus nga naghupot sa priesthood nga akong gihigugma. Tugbang gayud ang paghulat og usa ka matitud-anon nga batan-ong lalaki kinsa makadawat uban nako nianang taglaon nga panalangin gikan sa Ginoo. ■

Aron sa pagpalit og kaugalingon ninyong litrato sa templo, bisitaha ang store.lds.org. I-klik ang “Music, Media, ug Art” nga tab ug dayon i-klik ang “Temple Pictures.”



Alang sa Kalig-on sa mga Kabatan-onan: **USA KA ANGKLA NGA ALANG SA KARON**



David L. Beck
Kinatibuk-ang
Presidente sa
Young Men



Elaine S. Dalton
Kinatibuk-ang
Presidente sa
Young Women

Ang Unang Kapangulohan misulat nga ang mga sumbanaan nga naa sa Alang sa Kalig-on sa mga Kabatan-onan “makatabang kaninyo sa importante nga mga pagpili nga inyong gihimo karon ug himoon pa sa uma-abut.”¹ Uban sa pagpagawas sa bag-o nga edisyon sa pamphlet, ang mga magasin sa Simbahan nakagahin og gamayng panahon uban sa kinatibuk-ang presidente sa Young Women nga si Elaine S. Dalton ug sa kinatibuk-ang presidente sa Young Men nga si David L. Beck nga naghisgot mahitungod sa gibag-o nga pamphlet.


Nganong kinahanglan ang bag-ong edisyon sa *Alang sa Kalig-on sa Kabatan-onan* karon?

Brother Beck: Ang mga sumbanaan sa Ginoo wala mausab, apan

ang pagpang-atake sa kaaway batok niana nga mga sumbanaan nagkadaghan ug nagkakusog. Ang *Kalig-on alang sa mga Kabatan-onan* gi-update sa pagtabang sa kabatan-onan nga makaharong niini nga mga pagpang-atake.

Sister Dalton: Ang mga propeta padayon sa tin-aw kaayo nga pagpamulong ngadto sa kabatan-onan, ug gusto namong maanaa dayon ang bag-o nilang mga gipamulong. Ang kabatan-onan kinahanglan nga masiguro nga nagsunod sa propeta, mao nga ang bag-ong mga pagtulun-an giusa dinhi niini nga pamphlet.

Brother Beck: Sigon sa gipahinudom kanato ni Presidente Thomas S. Monson, ang kabatan-onan karon nagtubo sa panahon diin ang gintang tali sa mga sumbanaan sa Ginoo ug sa kalibutan nagkadako.² Nagkakusog



ang mga tintasyon, ug ang sayop nga kinaiya gidawat na sa kadaghanan. Ang dinasig nga tambag dinhi sa bag-ong pamphlet usa ka timailhan sa gugma sa Langitnong Amahan alang sa mga kabatan-onan. Gusto Niya nga ang matag batan-on makatagamtam sa mga panalangin sa pagsunod sa ebanghelyo ug mihatag kanila og mga sumbanan nga makatabang kanila. May importante Siya nga buluhaton alang kanila karon. Ang mga sumbanan nga naa sa *Alang sa Kalig-on sa mga Kabatan-onan* makatabang kanilang makasarang sa paghimo sa Iyang buluhaton.



laing bag-o nga seksyon: “Pisikal ug Emosyonal nga Kahimsog.” Gikinahanglan ninyo ang pisikal nga kahimsog ug pag-atiman sa inyong lawas, apan gikinahanglan usab ninyo ang paghunahuna sa inyong emosyonal nga kalagsik.

Brother Beck: Gidugangan usab og emphasis ang pagsunod sa Espiritu ug pagpakabuhi nga takus nga mosulod sa templo.

Unsaon sa kabatan-onan nga ang Kalig-on sa mga Kabatan-onan mahimong bahin sa ilang kinabuhi?

Sister Dalton: Gusto ko nga tanawon nila ang mga panalangin nga gihisgutan diha sa pamphlet ug hunahunaon kon sa unsang paagi kini nga mga panalangin mogiya kanila sa ilang mga tumong. Nagtuo gayud ako nga giandam niini nga henerasyon ang kalibutan alang sa Ikaduhang Pag-anhi sa Manlu-luwas. Akong awhagon ang mga kabatan-onan sa paghinumdom nga magtinguha silang mobarug uban ang kamasaligon sa Iyang presensya kon Siya mobalik na.

Brother Beck: Ang mga booklet nga *Pagtuman sa Akong Katungdanan ngadto sa Dios* ug *Personal nga Kauswaghan sa Young Women* nagtanyag usab og daghang maayo nga mga ideya. Sama pananglit, diha sa seksyon sa “Pagpuyo nga Takus” sa *Katungdanan ngadto sa Dios*, ang batan-ong mga lalaki gidapit sa pagtuon sa mga sumbanan nga naa sa *Alang sa Kalig-on sa mga Kabatan-onan*, mohimo og plano aron sa pagsunod niini, ug dayon mopakigbahin sa ilang mga kasinatian ngadto sa uban. Sa paghimo niini, naglig-on sila dili lang sa kaugalingon nilang mga pagpamatuod, apan naglig-on usab sila sa uban.

Sister Dalton: Laing makaikag nga buluhaton mao ang paghuman sa

Unsa man ang gi-update niini nga edisyon?

Sister Dalton: “Trabaho ug Pagpaningkamot sa Kaugalingon” ang nadugang. Daghang kabatan-onan ang migahin og daghang panahon sa bag-ong mga teknolohiya—pagpakig-higala pinaagi sa internet, pag-browse sa Internet, video games—nga wala gayud sila makat-on unsaon sa pagtrabaho. Usa kana ka problema tungod kay kon ang usa ka batan-on magmisyon, usahay dili siya andam sa kalisud nianang pisikal ug espiritwal nga paghago. Nahiuyon kaayo kini sa



Alang sa Kalig-on sa mga Kabatan-onan ug linginan ang tanang paghisgut sa Espiritu. Ang pagsunod niini nga mga sumbanan anaa kanila sa kanunay nga pakig-uban sa Espiritu Santo. Ug sa panahon nga ang mga kabatan-onan maghimo og lisud nga mga desisyon sa ilang kinabuhi, gikinahanglan nila kana nga pakig-uban.

Brother Beck: Nakita sab nako ang pamphlet isip mahinungdanong kapanguhaan sa pagpakigbahin sa ebanghelyo; magamit nato kini sa pagtabang sa atong mga higala nga makasabut nganong nagpakabuhi kita nga sama niini. Magamit usab kini sa mga kabatan-onan sa pag-andam og mga leksyon sa family home evening, sa mga pakigpulong sa miting sa sakrament, o mga leksyon sa mga klase sa Simbahan—o bisan gani sa pagpangita og mga tubag sa mga pangutana mahitungod sa mga sumbanan sa Ginoo. Samtang magbuhat ang mga kabatan-onan niini, ang mga doktrina ug mga baruganan nga naa sa *Alang sa Kalig-on sa mga Kabatan-onan* motuhop gayud sa ilang mga kasingkasing ug mamahimong bahin sa ilang pagkatawo.



Unsay inyong isulti niadtong nagtuo nga lisud ang paghupot niini nga mga sumbanan sa kalibutan karon?


Sister Dalton: Moingon ko nga, “Husto ka; lisud kini.” Apan pahinumduman ko sila nga mas lisud kon kamo *dili* maghupot sa mga sumbanan. Ang mga sala nagpalisud sa inyong kinabuhi ug maghatod kaninyo ngadto sa mga butang nga dili ninyo gusto. Moingon ko ang sa pagsunod niini nga mga sumbanan nga naa sa *Alang sa Kalig-on sa mga Kabatan-onan* mao ang yawe sa kalipay, ug ang tanan gustong magmalipayon.

Brother Beck: Walay ikatanyag ang kalibutan nga ikakumpara sa makahupay nga impluwensya sa Espiritu Santo, sa katagbawan nga mahibalo nga ang Langitnong Amahan nahimuot kaninyo, o sa gahum sa mga pakigsaad sa templo. Mao kini ang mga panalangin nga gisaad niadtong mosunod sa mga sumbanan sa Ginoo.

Sister Dalton: Daghan kaayo sa mga batan-ong babaye moingon, “nakahimo ko og ngil-ad nga butang, busa dili na ko makaadto sa simbahan.” Dayon magsugod sila og kahulog ngadto sa ngil-ad pa nga kinaiya. Apan moingon ko, “Kamo *mahimo* nga maghinulsol. Kamo mahimo nga mag-usab, ug karon ang panahon. Karon na ang adlaw. Mao kini ang inyong panahon.”

Unsa ang inyong ikatambag sa mga kabatan-onan kinsa wala kaayoy suporta diha sa panimalay sa pagsunod niini nga mga sumbanan?

Brother Beck: Mituo ko nga ang Ginoo mibutang sa matag usa kanato sa mga dapit diin makahimo kita sa pinakamaayo uban sa espirituhanong mga gasa nga gihatag Niya kanato. Kon ang inyong pamilya dili sama kaninyo og pasalig sa pagsunod sa mga sumbanan sa Ginoo, ayaw pagundang. Padayon lang sa pagpakabuhi



sa pamaagi nga inyong nahibaloan nga angay, tungod kay wala gayud kamo mahibalo kinsa sa inyong pamilya ang naniid kaninyo ug hilom nga nakaangkon og kalig-on gikan sa inyong ehemplo.

Sister Dalton: Usab, hinumdumi kanunay kon si kinsa *kamo*. Giandam kamo nga maanhi sa yuta karon tungod kay duna kamoy ligong pagpamatuod sa Manluluwas. Gipamatud-an ninyo kana didto sa kalibutan sa wala pa sa yuta. Sama sa gisulti ni Brother Beck, ang inyong pagsunod sa mga sumbanan tingali sa katapusan makapanalangin sa inyong pamilya. Ayaw pag-uyon-uyon. Ayaw pagpadala. Samtang sundon nato kini nga mga sumbanan, mahimo kita nga kahayag. Makapasanaag kita sa kahayag sa Manluluwas.

Unsa nga mga panalangin ang moabut sa mga kabatan-onan kon sundon nila ang mga sumbanan?

Brother Beck: Misaad ang Ginoo og daghang talagsaong panalangin niadtong magmatinuoron sa mga sumbanan nga Iyang gipahiluna. Ang uban

moabut dayon: ang pakig-uban sa Espiritu Santo, kalinaw sa tanlag, ug magtubo nga pagtuo ug kamasaligon. Sa matag higayon nga mosunod kita sa sugo, ang atong katakus sa pagsunod motubo.

Sister Dalton: Ang kalibutan nag-ingon, “Sulayi ang tanan. Tungod kay batan-on pa kamo karon, maka-eksperimento kamo.” Ang mahitabo kon sundon ninyo kana nga mensahe susama sa usa ka embodo nga dako sa sinugdanan apan magkapig-ot sa ilawom. Mapugngan ang inyong kabubut-on tungod niana nga mga desisyon. Ang pag-eksperimento mosingput sa pagkaadik. Ang panahon sa kahinam mahimong mosangput



sa pagmabdos nga dili pa minyo o kausaban sa inyong plano sa kinabuhi. Apan kon magsubay kamo sa usa ka higpit nga dalan—balihon ang usa ka embodo—ug mosunod sa mga sumbanan sa Ginoo, ang tibuok kalibutan moabli og dako samtang magsunod kamo sa mga sugo. Imbis magapos sa inyong mga sayop, duna kamoy kagawasan nga magpakabuhi sa matang sa kinabuhi nga maghimo kaninyong malipayon.

Brother Beck: Ang kalibutan

nagkinahanglan og batan-ong mga tawo kinsa makasabut sa bili niini nga mga panalangin ug unsaon nga mahimong angayan niini. Daghan sa inyong mga higala ug mga kaedad ang nangita og mga alternatibo sa mga paagi sa kalibutan, kinsa nagtinguha og tinuod nga mga baruganan nga katukuran sa ilang kinabuhi. Sila nagkinahanglan lamang sa inyong ehemplo ug pagpamatuod.

Gusto ba kamong mopakig-bahin og dugang pa sa mga kabatan-onan?

Sister Dalton: Ang mensahe nga akong ihatag sa mga kabatan-onan mao nga ang paghinulsol dili ngil-ad nga butang, usa kini ka panalangin. Ang Manluluwas mihatag kanato og katakus sa paghinulsol. Ayaw paghulat. Mahimo kitang mag-usab, ug kana makatabang nato sa pagsunod sa mga sumbanan. Ang usa ka mahiyason nga batan-ong lalaki o batan-ong babaye nga gigiyahan sa Espiritu makausab sa kalibutan. Mahimo nga kamo kana.

Brother Beck: Gihigugma namo kamo, ug nagmaya kami sa inyong pagkamaayo. Makahinam ug makadasig alang kanamo nga makasaksi sa inyong kamatinud-anon. Kon bation ninyong nag-inusara, hinumdumi nga naay liboan nga mga kabatan-onan sama ninyo sa tibuok kalibutan kinsa mapasaligon nga mohupot sa mga sumbanan sa Ginoo. Hinumdumi usab nga ang Espiritu Santo mahimo nga kanunay ninyong kauban. Pagpuyo nga takus sa iyang presensya, sunda ang Iyang mga pag-aghat, ug tuguti Siyang mohupay kaninyo kon gikinahanglan ninyo kini. Naghigugma ug misalig kaninyo ang Langitnong Amahan. Daghang mahinungdanong butang ang giandam Niya alang kaninyo. ■

MUBO NGA MGA SULAT

1. *Alang sa Kalig-on sa mga Kabatan-onan* (2011), ii.
2. Thomas S. Monson, “Magmaisugon sa Pagbarug nga Mag-inusara,” *Liahona*, Nob. 2011, 60.

UNSAON MAN NAKO SA PAGPASABUT SA AKONG MGA HIGALA NGA ANG ATONG MGA SUMBANAN DILI INISTRIKTO?

Magamit ninyo ang pagkasusama sa usa ka embodo nga gihisgutan ni Sister Dalton. Ang pagsulay sa mga butang nga gisugyot sa kalibutan mopagamay sa inyong kaugmaon tungod sa negatibong mga sangputanan. Atong balihon ang embodo, diin ang pagsunod sa mga sumbanan ug mga sugo nag-abli og daghang oportunidad alang kanato karon ug sa umaabut.

Ang mga sumbanan makatabang kanato nga:

- Makabaton sa pakig-uban sa Espiritu Santo labi na sa paghimo og importanting mga pagpili.
- Makatagamtam sa kalipay ug kagawasan imbis mag-antus sa mga sangputanan sa pagkaadik o sala.
- Mahimong takus sa mga panalangin sa templo ug kinabuhing dayon, nga mao gayud ang atong tumong.



ANG EHEMPLO SA *Akong Mama*

Ni Erin Barker

Akong gibundak ang plato ngadto sa hugasanan ug mihilak sa kasagmuyo. “Erin, makaadto ka niana nga pool party,” miingon si papa. “Makalingawlingaw ka.”

“Dili ni bahin ana!” Misingka ko samtang nagdaling migawas sa kwarto.

Gisapot ko dili tungod sa party ni Adriane. Nasakit og pulmonya si mama ug ang kinamanghuran nakong igsoon, si Abby. Si papa ug ako migahin sa tibuok semana sa pag-atiman kanila ug naningkamot nga normal ang pagbuhat sa tanan sa panimalay. Kini mao ang pagpangluto, pagpanglimpyo, pagmerkado, pagpanglaba, ug paghatod sa akong duha ka igsoong babaye.

Tanan kini mitabon sa naghasol nako nga mga kabalaka ug kahadlok. Nabalaka ko sa akong pamilya ug gikulbaan nga hapit na ko mobiya aron moeskwela sa kolehiyo. Mao nga wala ko mag-urong ug gipaningkamutang ibaliwala ang akong mga kahadlok. Giplano gani nako nga dili moapil sa party ni Adriane, apan kapoy ko ug ang hunahuna sa usa ka gabii nga walay problema uban sa mga higala ngadto sa pool, nakapagawas sa akong kalagot.

Wala na ko kapugong ug akong gipahimungtan si papa.

Mihilak ko sa makadiyot didto sa akong kwarto. Dayon, gibati nga nasayop, misaka ko og gisusi kon may gikinahanglan ba ang akong mama ug si Abby. Akong nakita si mama nga naghatag og tambal sa gihilantan nakong igsoon. Naglisud sa paginhawa ang akong mama ug naghigda ra sulod sa mga adlaw. Gihangyo siya namo ni papa sa pagbalik og higda. Miingon mi nga kami ra ang moatiman ni Abby. Wala siya maminaw.


“Ok ra ko. Kamong duha pangatulong,” miingon siya. “Si Abby nagkinahanglan nako.”

Naninkamot kong dili makahilak samtang nagtan-aw ko ni mama nga mihupay sa 10-anyos nakong igsoon. Gisusi niya ang iyang kainiton, gitabangan sa pagpahigda, dayon mitupad niya paghigda ug gigakos ang nagkurog niya nga lawas. Nahunong sa pag-agulo ug nahupay si Abby ubos sa proteksyon sa akong mama.

Mas luya ang akong mama kay sa una. Sa katapusan gidala siya sa ospital sulod sa pipila ka adlaw tungod sa pulmonya. Apan taliwala sa iyang pagsulay, gikalimtan niya ang iyang kaugalingon. Kay sa moreklamo sa kaugalingon niyang sakit, nakahupay pa siya sa sakit sa iyang anak.

Giplano nakong magpakamartir nianang gabhiona nga mopundo sa balay aron sa pagtabang. Hinoon, naulaw ko sa akong pagkasapot ug napaubos tungod sa gibuhat sa akong mama. Sa pagtan-aw kaniya, nahibalo kong buhaton niya ang tanan sa pagtabang sa akong mga igsoon ug kanako.

Akong gibati ang iyang gugma nianang gabhiona ug nagtinguhang sundon ang iyang ehemplo. Mihukom ko sa pagpakita ngadto sa akong gipangga nga anaa ako kon ila kong gikinahanglan, bisan nagkinahanglan og personal nga pagsakripisyo. ■





Si Elder Quentin L. Cook sa Korum sa Napulog Duha ka mga Apostoles mipakigbahin og pipila ka mga hunahuna mahitungod niini nga hilisgutan.

Ang Mga Kababayen-an Importante sa Simbahan!

Ang kababayen-an mga anak sa atong Langitnong Amahan, kinsa nahigugma kanila.

Ang Dios mihatag sa mga kababayen-an og balaanong mga kalidad sa kusog, hiyas, ug gugma.

Ang mga asawa ug mga bana patas lang. Ang mga asawa ug bana magtambayayong sa pagkab-ot sa mga panginahanglan sa pamilya.

Ang mga kababayen-an sa Simbahan

karon lig-on ug matinud-anon.

Daghan sa atong nangahimo sa Simbahan nahitabo tungod sa dili hinakog nga pagserbisyo sa kababayen-an.

Ang Santos sa Ulahing Adlaw nga mga kababayen-an talagsaon! ■

Gikan sa "Ang LDS nga mga Kababayen-an Talagsaon!" Liahona, Mayo 2011, 18–21.



Mga Pag-ampo, Mubo nga mga Sulat, ug **Natural nga mga Kalamidad**

Bisan og kining duha ka batang babaye managlahi og pinulongan ug nagpuyo kapin sa 6,000 ka milya ang gilay-on sa usag usa, dunay butang nga komon kanila: sila pareho nga nakakaplag og pamaagi nga magbaton og positibong kinaiya dihang ang natural nga mga kalamidad miigo sa ilang dapit. Tanawa kining tinuod nga mga istorya ni Honoka O. nga taga-Japan ug ni Maggie W. nga taga-Missouri, USA. Atol sa subo ug makalilisang nga mga panahon, unsa ang nakatabang kanilang padayon sa kamatinud-anon ug malaumon?

Ni Marissa Widdison
Mga Magasin sa Simbahan



Honoka

Ang akong ngalan si Honoka, ug nagpuyo ko sa Chiba Prefecture, Japan. Ganahan kong magdula, mag-jumping rope, ug mag-drawing. Ang akong pangandoy mao nga mahimong tighulagway [illustrator] ugma damlag.



Maggie

Hello! Ako si Maggie nga taga-Joplin, Missouri. Usa ka gabii ang akong mama nakakita sa balita nga nagpasidaan nga may bagyo, ug tanan kami nangadto sa ilawom sa balay[basement]. Ang kusog, nagdahunog nga hangin nakahadlok kanako. Nabalaka ko sa akong mga higala ug among mga hayop. Human sa bagyo, nagpasalamat ko nga luwas ang akong pamilya ug ang among balay dili dako og kadaot.



Honoka

Ang paborito nakong istorya sa kasulatan mao ang damgo ni Lehi (tan-awa sa 1 Nephi 8). Sa akong hunahuna ang Primary importante kaayo tungod kay makakat-on ko og daghan mahitungod sa Dios ug ni Jesus. Ganahan ko sa



miting sa sakrament tungod kay akong mabati nga nalimpyo ang akong kaugalingon kon moambit ko sa sakrament, ug kini nakalipay kanako.

Didto ko sa eskwelahan dihang ang kusog nga linog nahitabo. Mao kini ang akong mga nahunahunaan, "Kuyawa ani!" ug "OK ra ba kaha ang akong pamilya."

Nag-ampo ko sa akong kasingkasing nga unta luwas sila ug ang kinabuhi sa mga tawo maluwas. Wala madugay akong nahibaloan nga walay usa sa akong mga higala ang nasakitan. Nianang higayona, akong gibati nga gipanalipdan kami sa Dios. Nahibalo ko nga ang Dios ug si Jesus buhi.



Maggie



Daghan sa ubang mga balay ug mga patigayon nanga-guba tungod sa buhawi nga miigo sa lungsod. Naguol ko alang sa mga tawo nga nawad-an og mga minahal. Ang akong mga ginikanan ug mga magulang mihukom nga motabang og limpyo sa



among lungsod. Naka-pahunahuna kini

kanako sa kasulatan, "Kon kamo anaa sa pag-alagad sa inyong mga isigkatawo kamo anaa lamang sa pag-alagad sa inyong Dios" (Mosiah 2:17).


Gusto sab kong motabang sa pagpanglimpyo, apan miingon si mama nga dili kini luwas alang sa usa ka bata. Dayon akong gibati ang Espiritu Santo nga mipakigbahin og maayong ideya sa paglipay sa mga tawo. Naghimo ko og 20 ka mugbong mga sulat sa pasalamat ngadto sa mga bolunter. Migahin ko og dakong panahon sa paghimgong espesyal sa matag kard aron mobati sa Espiritu ang mga tawo ug mahibalo nga importante kaayo sila sa among lungsod.

Akong nakat-unan nga bisan og dili ka makahimo og piho nga mga butang sa pagserbisyo, makahunahuna ka og ubang mga paagi sa pagserbisyo. Ang Langitnong Amahan mopanalangin kaniyo tungod sa pagserbisyo Kaniya ug sa imong isigkatawo.




“Hinaut nga ang
inyong mga panimalay
**mapuno sa gugma
ug pagtahud**
ug uban sa
**Espiritu
sa Ginoo.**”

Presidente Thomas S. Monson
Gikan sa Abril 2012 nga kinatibuk-ang komperensya



Atong Pahina



Lucas L., edad 9, Argentina

PAGPALAMBO SA PAGTUO NGADTO SA DIOS



Ang booklet nga *Hugot nga Pagtuo sa Dios* nakatabang kanako nga molambo sa pagsunod sa mga sugo sa Langitnong Amahan. Akong giawhag ang tanang bata sa pagkompleto sa booklet ug pagpalambo sa ilang mga talento pinaagi sa pagserbisyo sa Simbahan. Naghimo ko

og tumong ug mipatukar og violin nga nag-duet didto sa simbahan uban sa akong igsoong lalaki. Duna koy igsoong lalaki nga naa sa misyon—talagsaon siya nga ehemplo kanako, ingon man ang tanang sakop sa akong pamilya!

Charlotte de B., edad 10, France



Rebeca B., edad 4, taga-Brazil, ganahan kaayong moadto sa simbahan. Ganahan siya kanunay nga mokanta og “Ako Anak sa Dios” ug sa “Ang Pamilya Magkauban sa Hangtud” atol sa family home evening matag semana, ug naka-hibalo siya sa tanan nga pulong niini.

Sa edad pa lamang nga tulo ka tuig ug pipila ka bulan, kahibalo na siya sa unang tulo ka mga Artikulo sa *Hugot nga Pagtuo*. Gibalaan niya ang Dominggo isip Adlaw sa Ginoo ug siya usa ka panalangin sa iyang pamilya.



Si Jay R., edad 5, taga-Indonesia, nahigugma kaayo sa iyang pamilya. Mitudlo kaniya ang iyang mga ginikanan sa paghigugma sa uban. Daghan siya og higala, ug gusto siya nga mopakigbahin kanila. Gimahal niya ang mga nilalang sa Dios, sama sa mga tanom ug mga hayop. Ganahan gayud siya og mga insekto ug mga kaka, tungod kay maghimo kini og kaugalingon nilang balay. Mapasalamaton siya sa tanang butang nga gilalang sa Ginoo alang kaniya.



Timothy K., edad 3, Ukraine

Isumiter ang inyong drawing, litrato, o kasinatian alang sa Atong Pahina diha sa liahona.lds.org, i-e-mail kini ngadto sa liahona@ldschurch.org nga dunay “Our Page” sa linya sa hilisgutan, o ipadala ngadto sa:

Liahona, Our Page
50 E. North Temple St., Rm. 2420
Salt Lake City, UT 84150-0024, USA

Ang mga isumiter kinahanglan gayud nga maglakip sa tibuok pangalan sa bata, babaye ba o lalaki, ug edad (kinahanglan gayud nga ang edad 3 ngadto sa 11 anyos) uban sa pangalan sa ginikanan, ward o branch, stake o district, ug ang sinulat nga pagtugot sa ginikanan (ang e-mail dawaton) nga gamiton ang litrato sa bata ug ang isumiter. Ang mga isumiter mahimong i-edit alang sa pagklaro o sa gitas-on.

Inyong magamit kini nga leksyon ug kalihokan aron makat-on ug dugang kabahin sa tema sa Primary karong bulana.

Ako Mipili sa **Pagpuno** sa **Akong Kinabuhi** sa mga Butang Nga **Nagdapit sa Espiritu**

Makabasa kita sa Biblia og usa ka talagsaon nga istorya mahitungod nila ni Shadrach, Meshach, ug Abed-nego. Si Haring Nebucodonosor mitambog niining tulo ka managhi-gala ngadto sa kalayo tungod kay midumili sila sa pagsimba sa bula-wan nga imahe nga iyang gihimo. Ang tulo ka mga Israelite miingon sa Hari nga simbahon lamang nila ang ilang Dios. Tungod kay matinud-anon ang batan-ong mga lalaki, giluwat sila sa Dios gikan sa nagdilaab nga kalayo. (Tan-awa sa Daniel 3.) Kini nga istorya mao ang mahitungod sa pagsalig sa Dios ug pagkamatitud-anon ug pagkama-isugon. Mahitungod usab kini sa buotang mga higala kinsa nagtina-bangay sa pagpili sa matarung.

Silang tulo, si Shadrach, Meshach, ug Abed-nego mipili sa pagtuman sa ilang saad sa pagsimba lamang sa Dios. Mipili sila sa pagbaton og hugot nga pagtuo nga ang Dios moluwat kanila. Mipili sila sa dili pagkahadlok sa hari apan sa pagsalig sa Dios. Si Presidente Henry B. Eyring, Unang Magtatambag sa Unang Kapangulohan, miingon, “Tanan kita nagkinahanglan og tinuod nga higala, nga maminaw kanato, mogiya kanato sa dalan, ug mopamatuod sa kamatuoran ngari kanato” (“True Friends,” *Liahona*, Hulyo 2002, 32).

Hinumdumi, ang buotan nga mga higala makahimo og kalainan sa inyong kinabuhi pinaagi sa pagtabang kaninyo sa pagpili sa matarung. Pangita og mga higala sama kang Shadrach, Meshach, ug Abed-nego, ug mamahimong higala sama kanila! ■

Kanta ug Kasulatan

- “Manguha Kong Mahimong Mahisama Kang Jesus,” *Songbook sa mga Bata*, 40–41.
- Mga Artikulo sa Hugot nga Pagtuo 1:13

Ikaw Lang

Aniay pipila ka mga ideya sa pagkahimong buotan nga higala:

- Sa katapusan sa semana, isulat sa inyong journal unsay inyong gihimo nga mahimong buotan nga higala sa uban.
- Paghunahuna og mga paagi nga inyong ikapakita ang inyong gugma alang sa inyong mga higala.
- Isulat kon sa unsang paagi kamo ug inyong mga higala makalig-on sa inyong pagtuo sa Dios.
- Ipakigbahin sa usa ka ginikanan o lider sa Primary unsay inyong gihimo nga mahimong buotan nga higala.

Mitabang ka og batang babaye dihang nasakitan siya sa dulaanan. Abante og usa ka luna.

Midapit ka sa usa ka bag-ong estudyante nga motupad kanimo og lingkod diha sa bus. Abante og usa ka luna.

CTR nga Dula: Pakighigala

Dulaa kini aron makat-on og dugang kon unsaon nga mahimong buotan nga higala. Magkinahanglan ka og liso o butones alang sa matag magdudula ug gagmayng piraso sa papel nga sulatan og “1,” “2,” o “3”. Isulod kini nga mga papel sa sudlanan o envelope.

Sa pagdula, ang usa ka tawo mopili og papel ug iirog og pipila ka luna ang iyang liso o butones kon pila ang numero. Basaha kon unsa ang naa sa luna ug sunda ang mga instruksyon. Ang dula dili mahuman hangtud ang tanan moabut sa katapusan isip buotan nga higala!

Natagak ang tray sa pagkaon sa batang babaye, apan wala nimo siya tabangi sa pagpunit. Atras og usa ka luna.

Mipakigbahin ka sa imong paniudto sa batang lalaki nga walay baon. Abante og usa ka luna.

Mipaapil ka og laing bata sa inyong dula atol sa recess. Abante og usa ka luna.

Mibisita ang imong pamilya sa bag-ong silingan. Abante og usa ka luna.

KATAPUSAN

Mitabang ka sa manghod nimong lalaki sa iyang mga buluhaton. Abante og usa ka luna.

Gikataw-an nimo ang usa ka batang lalaki nga lahi tanawon. Atras og usa ka luna.

Mipakigbahin ka sa ebanghelyo ngadto sa usa ka higala. Abante og usa ka luna.

Wala ka motagad sa usa ka bisita sa Primary. Atras og usa ka luna.

Mihatag ka og kaisug sa uban sa paghimo og husto nga mga pagpili. Abante og usa ka luna.

Gisungog nimo ang imong higala ug nasakitan siya. Atras og usa ka luna.

Pagkat-on sa Pagserbisyo sa Uban

Ni Heidi S. Swinton

Si Thomas Spencer Monson ginganlan og pareho sa iyang apohan si Thomas Condie. Ang batan-ong si Tommy nakakat-on og daghang leksyon gikan sa iyang apohan, nga nagpuyo pipila lamang ka balay ang gilay-on. Ang leksyon nga mahinumduman gayud niya mao ang pagserbisyo sa uban.

Usa ka adlaw dihang si Tommy mga walo ang edad, siya ug ang iyang apohan nanglingkod sa duyan atubangan sa ilang balay. Usa ka gulangon nga tawo gikan sa England ang nagpuyo usab didto nga dalan. Ang iyang ngalan si Robert Dicks, apan kadaghanan sa iyang mga silingan motawag kaniya og “Old Bob.” Biyudo siya og kabus.

Si Iyo Bob milingkod sa duyan uban ni Tommy ug sa iyang apohan. Miingon siya nga ang gamayng balay nga iyang gipuy-an

pagagub-on. Wala siyay pamilya, walay kwarta, ug walay kaadtoan.

Naghunahuna si Tommy kon unsaon sa pagtubag sa iyang apohan

ang looy nga sitwasyon. Mikuot sa bulsa ang iyang apohan ug mikuha sa gamayng panit nga pitaka. Mikuha siya og yawe ug gibutang kini sa kamot ni Iyo Bob. “Mr. Dicks,” lumo siya nga miingon, “mahimo nimong ibalhin ang imong mga butang ngadto sa bakante nakong balay sa tapad. Wala kay bayad, ug mahimo kang mopuyo didto kutob sa imong gusto. Ug hinumdumi, wala nay mopalayas pa nimo.” Miagas ang luha sa mga mata ni Iyo Bob.

Ang mama ni Tommy nagtudlo usab kaniya sa paghigugma ug pagserbisyo sa uban. Matag Dominggo sa dili pa manihapon ang pamilyang Monson, ang mama ni Tommy mag-andam og usa ka plato sa adobo nga baka, patatas, ug sawsawan alang ni Iyo Bob. Usahay lakipan usab kini sa ilado nga ribbon cake sa mama ni Tommy nga may pink, green, ug puti nga ang-ang sa cake ug pinakaging nga





MGA PULONG GIKAN NI PRESIDENTE MONSON

“Mituo ako nga ang gugma ikapakita pinaagi sa imong pagpakabuhi, sa imong pagserbisyo, ug sa imong pagpanalangin sa uban. Kon magserbisyo kita sa uban, nagpakita kita kanila nga sila atong gihigugma, ug gipakita usab nato kang Jesukristo nga kita nahigugma Kaniya” (“Friend to Friend,” *Liahona*, Nob. 1997, 6).

chocolate. Ang trabaho ni Tommy mao ang paghatod sa panihapon ngadto ni Iyo Bob.

Sa una wala kasabut si Tommy nganong dili man una siya maka-kaon sa dili pa ihatod ang plato. Apan wala gayud siya moreklamo. Modagan dayon siya ngadto sa balay ni Iyo Bob, nga magdala sa puno nga plato. Dayon mahinamon siyang maghulat samtang si Iyo Bob hinay nga moduol sa pultahan.

Ang duha mag-ilis dayon og plato—ang limpyo nga plato ni Bob sa miaging Dominggo ug ang plato ni Tommy nga nag-ugdo sa pagkaon. Dayon motanyag si Bob og sinsilyo isip bayad sa kamabination.

Ang tubag ni Tommy mao lang gihapon: “Dili ko makadawat sa kwarta. Silutan ko sa akong mama.”

Ang tigulang mohikap sa buwagaw nga buhok ni Tommy ug moingon, “Dodong, duna kay talagsaong inahan. Ingna siya nga salamat.” Dihang gibalitaan ni Tommy sa iyang mama ang pulong gikan ni Iyo Bob, migimaw ang mga luha sa iyang mga mata.

Ang pagpakita og gugma nga putli, dili hinakog nga paghatag sa uban, pag-una sa uban, ug pagkabuotan nga higala ug buotan nga silingan importante sa panimalay nga Monson. Nahimo kining ilhanan sa kinabuhi ni Presidente Monson. ■

UNSAY PAREHA NINYO NI PRESIDENTE MONSON?

Unsa ang naa nimo nga pareha sa propeta? Sa ubos mao ang lista sa mga butang nga naghulagway ni Presidente Monson samtang bata pa. Markahi ang kahon sunod sa butang nga pareha usab nimo.

- Duna siyag magulang nga babaye.
- Ikaduha siya nga anak sa pamilya.
- Natawo siya sa Adlawng Dominggo.
- Siya ang kinamagulangang lalaki sa iyang pamilya.
- Duna siyag angga (tan-awa sa ubos).
- Duna siyag lima ka igsoon.
- Kasagaran lutuan siya og pamahaw sa iyang papa.
- Nakaangkon siya og pagpamatuod sa ebanghelyo sa batan-on pa siya.
- Ganahan siya og homemade nga ice cream.
- Duna siyag library card.
- Ganahan siyang makigdula sa iyang mga ig-agaw.
- Ganahan siyang makig-uban sa iyang lolo.
- Nagpuyo siya duol sa mga riles sa train.
- Suguon siya sa iyang inahan.
- Nabunyagan siya sa otso anyos siya.
- Ganahan siyang mangisda.



MGA NGALAN UG MGA ANGGA

Itugma ang matag ngalan ni Presidente Monson sa mga sitwasyon diin kini gigamit.

SITWASYON	NGALAN O ANGGA
1. Unsay tawag kaniya sa mga tawo diha sa simbahan ug sa eskwelahan sa batan-on pa siya.	a. Dad
2. Unsay tawag kaniya sa mga miyembro sa Simbahan karon.	b. Mahadlukon nga si Willy
3. Unsay tawag kaniya sa iyang mga apo.	c. Tom o Tommy
4. Unsay tawag kaniya sa iyang mga anak.	d. Thomas Spencer Monson
5. Ang angga nga gihatag kaniya sa iyang mama tungod kay ganahan siyang kanunay nga may gibuhat kay sa mopahulay.	e. Presidente Monson
6. Ang tibuok niyang ngalan, nga gigamit dihang gibunyagan siya.	f. Lolo

Duna ka bay angga nga naghulagway og butang nga espesyal alang nimo?

Mga tubag: 1. c; 2. e; 3. f; 4. a; 5. b; 6. d.

ANG PANIMALAY ni Leute

Ni Adam C. Olson

Mga Magasin sa Simbahan

Matag gabii ang pamilya ni Leute magpundok sa ilang tradisyonal nga Samoan *fale*, usa ka porma og oval nga payag nga tag-as og haligi. May gitas-on kini nga mga 15 ka pye (4.6 ka metros) ug 10 ka pye (3 ka metros) ang gilapdon, walay bongbong, bisan usahay mobutang sila og tabil aron mapribado.

Si Leute, edad 10, ug ang sakop sa iyang pamilya nagliyok nga nanglingkod sa salog ug nagtuon sa kasulatan. Nanganta sila og mga himno ug naghigot og mga butang kabahin sa pamilya sa dili pa matulog.

Kining higayun nga magpundok silang tanan matag gabii gitawag og *sā*, buot pasabut “sagrado.” Panahon kini nga ang kadaghanan sa pamilya sa Samoa managpundok.

Ang mga propeta nagtudlo nga ang atong mga panimalay kinahanglan nga sagrado sama sa templo. Bisan unsa ang atong panimalay, dunay mga butang nga atong mahimo aron madapit ang Espiritu Santo sa atong panimalay ug himoon kining matahum, makalipay nga dapit sa kalinaw ug pagkat-on. ■

Human mabukhad ang iyang higdaanan ug mataod ang moskitero, gihimo ni Leute ang personal niyang pag-ampo.


Sa kasagaran ang pamilya magpundok ngadto sa fale sa mga apohan ni Leute alang sa family home evening.

PAGHULAGWAY PINAAGI NI STEVEN KEELE; GILITRATOHAN NI ADAM C. OLSON



Ang pamilya nagpundok sa ilang fale [hawan] alang sa pag-ampo sa pamilya, pagtuon sa kasulatan, ug panaghisgot sa pamilya hapit kada gabii.

Kon gusto ni Leute nga magtuon sa mga kasulatan nga siya ra, kasagaran siyang molingkod sa gawas ilawom sa usa ka kahoy.



Ang pamilya nag-display og litrato sa Manluluwas apil ang ubang art gikan sa Liahona aron sila mahinumdom Kaniya.


Ang pamilya mohipos sa ilang mga kasulatan, mga manwal, ug mga isyu sa Liahona diha sa lamesa.

Ang pagpangaon maoy importante nga mga panahon sa pamilya. Ang pamilya magluto sa gawas o mogamit og giinit nga mga bato ilawom sa yuta nga gitawag og umu kuka.

Pagserbisyo sa Langitnong Amahan

Ni Jane McBride Choate

Gibase sa tinuod nga istorya



5.

Dihang mihilak si Erin, gihatagan siya ni Kevin og teddy bear.



6.

Nahibalo kong malipayon ang Langitnong Amahan sa imong pagserbisyo Kaniya karon.



Apan wala ko moadto sa templo.

7.

Oo, apan imong gitabangan ang imong mga igsoon nga maandam. Ug imo kong gitabangan sa pagbantay ni Erin.



8.

Kon motabang ka og laing mga tawo, nagserbisyo ka sa Langitnong Amahan.



Makalingaw nga Pagserbisyo

Tan-awa og maayo ug imong makita nga dili tanan niini nga litrato sa pagserbisyo magkaparehas. Makit-an ba nimo ang duha nga parehas?



Buhata ang Imong Katungdanan

Si Presidente Thomas S. Monson nagtudlo nga importante ang paghimo sa atong katungdanan. Makit-an ba ninyo ang lima ka kalainan tali niining duha ka litrato? Asa nga bata ang naghimo sa iyang katungdanan?



Mga Balita sa Simbahan

Bisitahi ang news.lds.org alang sa dugang nga mga balita ug mga panghitabo sa Simbahan.

Bag-ong mga Lider sa Area Gi-assign

Ang Unang Kapangulohan mipahibalo sa mosunod nga mga kausaban sa mga assignment sa pagpangulo sa area nga magsugod sa Agosto 1, 2012. Ang tanang mga sakop sa mga Area Presidency mga sakop sa Una o Ikaduha nga mga Korum sa Seventy. ■

Kapangulohan sa Seventy



Ronald A. Rasband
Motabang sa Tanang Area



Walter F. González
1. North America Southeast



L. Whitney Clayton
2. Utah North
3. Utah Siyudad sa Salt Lake
4. Utah South



Donald L. Hallstrom
5. North America Northeast




Tad R. Callister
6. North America Southwest



Richard J. Maynes
7. North America Northwest
8. North America West



Craig C. Christensen
9. Idaho
10. North America Central



11. Mexico



Benjamín De Hoyos
Unang Magtatambag



Daniel L. Johnson
Presidente



José L. Alonso
Ikaduhang Magtatambag

12. Central America



Carlos H. Amado
Unang Magtatambag



James B. Martino
Presidente



Robert C. Gay
Ikaduhang Magtatambag

13. Caribbean



J. Devn Comish
Unang Magtatambag



Wilford W. Andersen
Presidente



Claudio D. Zivic
Ikaduhang Magtatambag

14. South America Northwest



Juan A. Uceda
Unang Magtatambag



Rafael E. Pino
Presidente



W. Christopher Waddell
Ikaduhang Magtatambag

15. Brazil



Carlos A. Godoy
Unang Magtatambag



Claudio R. M. Costa
Presidente



Jairo Mazzagardi
Ikaduhang Magtatambag

16. South America South



Jorge F. Zeballos
Unang Magtatambag



Mervyn B. Arnold
Presidente



Francisco J. Viñas
Ikaduhang Magtatambag

17. Middle East/Africa North




Bruce D. Porter



Bruce A. Carlson

Gidumala gikan sa Mga Punoang Buhatan sa Simbahan

18. Europe



Patrick Kearon **Unang Magtatambag**
José A. Teixeira **Presidente**
Kent F. Richards **Ikaduhang Magtatambag**

19. Europe East



Randall K. Bennett **Unang Magtatambag**
Larry R. Lawrence **Presidente**
Per G. Malm **Ikaduhang Magtatambag**

20. Asia




Gerrit W. Gong **Unang Magtatambag**
Kent D. Watson **Presidente**
Larry Y. Wilson **Ikaduhang Magtatambag**

21. Asia North



Kazuhiko Yamashita **Unang Magtatambag**
Michael T. Ringwood **Presidente**
Koichi Aoyagi **Ikaduhang Magtatambag**



22. Africa West



Joseph W. Sitati **Unang Magtatambag**
John B. Dickson **Presidente**
LeGrand R. Curtis Jr. **Ikaduhang Magtatambag**

23. Africa Southeast




Ulisses Soares **Unang Magtatambag**
Dale G. Renlund **Presidente**
Carl B. Cook **Ikaduhang Magtatambag**

24. Philippines



Brent H. Nielson **Unang Magtatambag**
Michael John U. Teh **Presidente**
Ian S. Ardern **Ikaduhang Magtatambag**

25. Pacific



Kevin W. Pearson **Unang Magtatambag**
James J. Hamula **Presidente**
F. Michael Watson **Ikaduhang Magtatambag**

Liahona Karon Gihubad sa Yanong Ininsek

Ang mga nagsulti og Ininsek makadawat na karon sa *Liahona* sa yanong Ininsek.

Unom ka *Liahona* nga mga isyu—ang duha ka isyu sa komperensya (Mayo ug Nobyembre) ug upat ka regular nga mga isyu (Enero, Abril, Hulyo, ug Oktubre)—pagahimoon sa yanong Ininsek kada tuig. Ang mga isyu sa Enero ug Abril 2012 gimantala sa internet lamang; ang isyu sa Mayo mao ang una nga naimprinta.

Alang sa impormasyon mahitungod sa pagkuha og indibidwal nga mga isyu sa magasin o sa pag-subscribe, palihug kontaka ang Distribution Services o tan-awa ang store.lds.org.

Ang mga Magasin sa Simbahan Mihatag og Gibug-aton sa mga Sumbanan sa Alang sa Kalig-on sa mga Kabatan-onan

Sugod niini nga bulan, ang magasin sa Simbahan magpakita og serye nga mga artikulo nga naghatag og gibug-aton sa mga sumbanan nga naglatid sa bag-ong gi-update nga *Alang sa Kalig-on sa mga Kabatan-onan* nga booklet. Ang serye makita diha sa *New Era* ug sa mga pahina sa kabatan-onan diha sa *Liahona* sulod sa daghang mga bulan (gawas sa mga isyu sa komperensya); ang kada artikulo mopunting sa nagkalanlaing sumbanan ug ipasulat sa usa sa mga sakop sa kinatibukang kapangulohan sa Young Men o Young Women o sa usa ka sakop sa Seventy.

Usa ka pahina nga artikulo alang sa mga hamtong mahitungod kon unsaon sa mga



Ang mga tigsulti og Ininsek sa lainlaing dapit sa kalibutan makabasa na karon sa Liahona sa yanong Ininsek.

ginikanan pagtudlo ang sumbanan niana nga bulan ngadto sa ilang mga anak ilakip diha sa *Liahona* ug sa *Ensign*, ug, sa mga higayon nga ang mga hilisgutan sa *Alang sa Kalig-on sa mga Kabatan-onan* nagtukma sa mga hilisgutan sa Akong mga Sumbanan sa Ebanghelyo alang sa mga bata sa Primary, adunay artikulo usab alang sa mga bata diha sa *Liahona* ug *Friend*.

Karon Aduna nay FamilySearch Indexing App

Ang FamilySearch Indexing app alang sa tiggamit og iPhone ug iPad karon makatabang sa mga indibidwal sa pagpatunhay ug sa pagpakigbahin sa bililhong mga rekord sa genealogy

gikan sa tibuok kalibutan pinaagi sa mobile nga mga kagamitan.

Ang app, nga gipagula sa susamang panahon nga ang 1940 United States Census nahimong magamit alang sa pag-index, mahimong i-download gikan sa Apple App Store (iOS nga mga kagamitan) o Google Play (Android nga bersyon).

Anaa sa Iningles ug sa Kinatsila, ang app nagtugot sa mga tiggamit sa pagtan-aw sa image snippets [gagmay nga impormasyon]—og ngalan, lugar, o ubang magamit nga pirasong impormasyon—gikan sa sinulat sa kamot nga makasaysayanong mga dokumento sama sa mga sertipiko sa pagkatawo, mga sertipiko sa kaminyoon, o mga rekord sa census. Ang mga indibidwal mo-transcribe [index] lamang unsay ilang nakita, ug ang FamilySearch indexing system modugang sa data ngadto sa koleksyon sa walay bayad nga mga rekord sa genealogy nga anaa sa familysearch.org. ■

Ang bag-ong FamilySearch Indexing app makapahimo na karon sa mas daghang mga indibidwal sa paghatag ngadto sa family history research sa ginagmay o dinaghan nga kontribusyon.



Siya Nagpadayon sa Pagpadayag sa Iyang mga Tinago

Sa dihang ako mga 13 anyos, mi-puyo ako uban sa akong apohan nga babaye. Usa ka adlaw akong nakit-an ang biniyaan nga mga magasin ug misugod sa pagbasa niini. Naglangkob kini og mga istorya gikan sa mga tawo sa tibuok kalibutan, nag-asoy sa mga milagro nga nahitabo sa ilang mga kinabuhi. Kini nga mga magasin mao ang *Liahona*; ang akong iyaan, kinsa miyembro sa Simbahan, mibilin niini nga mga magasin sa balay sa akong apohang babaye.

Ang mga istorya nakapadani kanako, ug gibati ko ang talagsaong butang nga nagsulti kanako nga kini tinuod. Usa ka tuig ang milabay ako nabunyagan, ug sukad niana ako adunay akong kaugalingong subskripsyon. Ang magasin nahimong giya ug panalangin. Alang kanako kini pruweba nga ang Dios nahigugma kanato ug nagpadayon sa pagpadayag sa iyang mga tinago ngadto sa iyang mga sulugoon ang mga propeta (tan-awa sa Amos 3:7).

Lucilino Mendonça, Cape Verde

Temporal ug Espiritwal nga Tabang

Gusto kong magbasa sa *Liahona* magasin—kini nagtabang kanako sa temporal ug espiritwal nga paagi. Kini naglig-on sa akong pagtuo, nagpalambo sa akong mga talento ug mga abilidad, ug naglimpyo sa akong hunahuna pinaagi sa makadasig nga tambag sa mga miyembro sa Simbahan ug sa atong buhi nga mga propeta.

Derek Balolong, Philippines

Palihug ipadala ang inyong ika-sulti o mga sugyot ngadto sa liahona@ldschurch.org. Ang mga gisumiter mahimo nga i-edit alang sa gitas-on o sa pagklaro. ■

Kini nga isyu naglangkob og mga artikulo ug mga kalihokan nga mahimong magamit alang sa family home evening. Ang mosunod mao ang pipila ka mga ehemplo.



“Natural nga mga Kalamidad—Dili Kita Kinahanglang Mahadlok,” pahina 30: Basaha og una ang artikulo ug sa mainampuong paagi pamalandong unsa ang mabuhat sa inyong pamilya nga mas maandam og maayo alang sa natural nga mga kalamidad sa inyong dapit. Dayon, sama sa gisugyot ni Elder Ellis, gamita ang family home evening sa pagpatuman sa inyong plano. Mahimo kamong modesisyon sa pagpundok sa mga emergency pack, pagdugang sa inyong pundo sa pagkaon sa panimalay, o sa paghisgot kon unsaon nga maandam sa espiritwal nga paagi. Hatagi og gibug-aton ang makapadasig nga mensahe ni Elder Ellis nga “kon kita andam, kita makasugakod sa bisan unsang unos.”

“Padayon sa Hugot nga Pagtuo sa Makalibug nga Kalibutan,” pahina 42: Hunahunaa ang pagpakigbahin sa kasinatian ni Bishop Caussé diha sa klasehanan nga makita sa sinugdanan sa artikulo. Dayon pangutan-a ang mga sakop sa pamilya unsa kaha ang ilang buhaton

niana nga sitwas-yon. Mahimong inyong ribyuhon ang mga baruganan nga gisunod ni Bishop Caussé sa pagpabilin nga lig-on sa iyang pagpamatuod.

“Unsaon Nako sa Pagkahibalo nga Ako Napasaylo?” pahina 46: Sugdi pinaagi sa pagpangutana sa mga sakop sa pamilya, “Human kamo naghinulsol, unsaon ninyo pagkahibalo nga kamo napasaylo?” Dayon inyong mabasa ang tubag ni Elder Callister diha sa ikaduhang paragraph sa artikulo. Pakigbahin og dugang mga seksyon sa artikulo nga angay sa inyong pamilya.

“Pagkat-on sa Pagserbisyo sa Uban,” pahina 66: Basaha ang istorya mahitungod sa pagkabata ni Presidente Monson ngadto sa inyong pamilya. Dayon mahimong inyong buhaton ang tukma nga mga kalihokan uban sa bisan kinsang bata sa pamilya. Taposa pinaagi sa inyong pagpamatuod nga si Thomas S. Monson mao ang buhing propeta. ■

Usa ka Hingpit nga Hulagway sa Family Home Evening

Kanunay akong nangandoy nga makahimo og mga family home evening sama sa akong nakita sa mga hulagway diha sa Simbahan. Apan human ang akong bana ug ako makasagop og maanyag nga gamay nga batang babaye, dili siya gustong moapil. Busa kami nakaamgo nga kinahanglan namong maghimo og mga kausaban sa among mga family home evening aron maapil siya.

Unsa ka mapasalamaton ako alang sa mga ideya sa family home evening nga gimantala diha sa *Liahona*. Karon ang among anak nga babaye mao ang unang gusto nga maghimo og family home evening ug nangandoy nga among himoon kada adlaw.

Usa sa among paborito nga mga leksyon mao ang mahitungod sa unsaon nga ang Espiritu Santo makagiya kanato. Among gisugo ang among anak nga babaye sa pagsulod sa iyang lawak. Human sa among pag-ihap og tulo, makabalik siya sa sala ug mosulay sa pagpangita og hulagway sa Manluluwas. Kon siya maduol niini, miingon kami nga siya init, ug kon siya malayo, miingon kami nga siya bugnaw. Nalipay kaayo siya sa dihang nakit-an niya ang hulagway. Nindot kaayong tan-awon siya nga nakasabut sa importansya sa pagkamasulundon ug sa pagsunod sa Espiritu aron maduol sa atong Manluluwas.

Among gitapos pinaagi sa pagbasa sa Doktrina ug Mga Pakigsaad 11:12. Pinaagi sa pagtugyan sa atong “pagsalig diha niana nga Espiritu nga nagtultol sa pagbuhat og maayo,” among nakita nga ang family home evening usa ka panalangin. ■

Moema Lima Salles Broedel, Brazil

PAGTUBAG SA MGA PANGUTANA MAHITUNGOD SA ATONG RELIHIYON

Ni Michael Otterson

Managing Director, Church Public Affairs Department

Pipila lamang ka adlaw nga ako namiyembro sa Ang Simbahan ni Jesukristo sa mga Santos sa Ulahing mga Adlaw sa dihang usa ka yanong panag-inistoryahay sa pundok sa mga higala mihisgot sa akong bag-ohay nga pagkakabig.

Ang uban nahibulong, gani nalipay. Ang pipila nagpakabaliwala. Usa ka batan-ong babaye nga akong ka-edad yano ug hugot nga midumili sa pagtuo nga ako usa ka Kristiyano.

Kini ang akong unang kasinatian sa pagpaninguha sa pagpasabut sa akong mga pagtuo niadtong wala motuo niini. Nahinumduman nako nga mibati og hilabihan nga kahigawad samtang naninguha ako pagpasabut og maayo sa hilabihan ka sirado nga hunahuna nga walay bisan unsang eksplasyon makapugos niini sa pagpasabut.

Samtang nagtubo ang Simbahan kini mosagubang og nagkadugang nga pagtuki, sama sa bisan unsa nga dagkong tinuohan, ug kana modala ngadto sa daghan pa nga pag-inatubangay o online nga mga panag-inistoryahay tali sa atong mga miyembro ug sa ilang mga pamilya, mga higala, ug mga kauban kinsa dili sama sa atong tinuohan.

Ang paghatag og pagtagad sa pipila ka mga baruganan makatabang sa mga miyembro pagtubag sa mga pangutana o mga komentaryo nga may labaw nga pagsalig.

Pagsunod sa Inyong Relihiyon

Usa sa dakong mga kaayohan nga maangkon sa matinud-anong mga miyembro sa Simbahan mao nga ang atong tinuohan nag-awhag kanato sa “pagsunod sa atong relihiyon.” Adunay katarungan sa pagkatinuod nga moabut samtang ang mga higala ug mga kauban makakita sa relasyon tali sa unsay gisulti ug gibuhat sa usa ka tawo.

Kon ang kinabuhi sa usa ka Santos sa Ulahing mga Adlaw mao ang iyang labing maayo nga wali, nan ang atong panag-inistoryahay kinahanglan usab nga dayag, tinuod, ug nagdala og kinaiya sa kalooy, bisan og ang mga tawo mangutana og dili angay nga mga pangutana o magpakita og tuno sa pagbiay-biay. Ang atong mga pag-angkon nga mga sumusunod ni Jesukristo labing makakumbinsir kon ang atong mga lihok nahiuon sa atong mga gituohan. Kon kita nagtubag og mga pangutana o bisan mga pagsaway, adunay mga panahon nga kita nagkinahanglan og kalig-on. Nagkinahanglan usab kita og maayong buot.

Kaniadtong 2007 sa usa ka pagsaulog sa gradwasyon alang sa mga gradwado sa BYU–Hawaii, si Elder M. Russell Ballard sa Korum sa Napulog Duha ka mga Apostoles miingon. “Kon kamo mosunod sa mga baruganan sa ebanghelyo [kay sa] magtuon lamang niini, kana nga talagsaong kombinasyon sa kahibalo motugot kaninyo nga mobati og kasayon ug maandam sa pagtudlo unsa ang

inyong nahibaloan nga tinuod—sa bisan unsa nga sitwasyon.”

Pag-andam sa Sitwasyon

Kon kita motubag og mga pangutana o mga komentaryo mahitungod sa atong relihiyon, importante nga mag-andam og pipila ka mga sitwasyon sa sinugdan.

Kay sa tubagon lamang ang mga nagsunod-sunod nga nagkalainlaing mga pangutana, kini makatabang sa paghatag una og 30 ka segundo sa pag-andam og pundasyon. Kana ingon ka yano sama sa pagpasabut nga atong gihuptan si Jesukristo isip atong Manluluwas ug gidawat ang mga pagtulun-an sa Biblia mahitungod sa Iyang pagkatawo, kinabuhi, pangalagad, Paglansang sa Krus ug Pagkabanhaw. Nagtuo usab kita nga ang Kristiyanong kalibutan mibiya gikan sa kamatuoran nga gitudlo ni Jesus diha sa Biblia ug nga ang Simbahan nga Iyang gitukod gikinahanglan nga ipahiuli.

Ang pagpahiluna sa pundasyon nga mga pagtuo sa Simbahan niini nga paagi naghatag og punto sa pakisayran kon ang panaghisgot motipas ngadto sa laing mga doktrina sa ebanghelyo.

Pagsumpay sa mga Impormasyon

Samtang ang mga miyembro maminaw sa mga pangutana, sila makaila sa baruganan sa ebanghelyo taliwala sa pangutana ug makasumpay sa



Ang pagpakigbahin og personal nga mga kasinatian mas epektibo nga paagi sa pagtubag sa mga pangutana kay sa pagsulti sa gimemorya nga mga tubag.

tubag ngadto sa Manluluwas.

Sama pananglit, nganong magpadala kita og mga misyonaryo ngadto sa Kristiyanong mga nasud? Tungod kay sa Iyang panahon mipadala si Jesus sa Iyang mga mensahero og tinagurha “sa tibuok kalibutan.” Ug atong gibuhay ang sama karon. Nganong kita naglikay sa pagpuyo-puyo nga wala pa ang kaminyoon? Tungod kay si Jesus ug ang Iyang mga Apostoles mitudlo sa kabalaan sa kaminyoon ug sa tanan nga nga may kalabutan niini.

Kita wala magkinahanglan og makuti, pasulabi nga kalibutanong mga argumento kon ang mga baruganan nga atong gipanguha nga sundon nagagikan sa Anak sa Dios.

Pakigbahin og Personal nga mga Kasinatian

Ang pagtubag sa mga pangutana sa atong mga higala dili mahitungod sa pagsulti sa gisag-ulo nga mga tubag. Ang pakigbahin og tinuod, personal nga mga kasinatian makadapit sa Espiritu nga pagpamatuod ug pagdala sa mensahe ngadto sa kasingkasing sa naminaw.

Usa sa labing dako nga mga babag sa pagpakigbahin sa atong tinuohan mao ang kahadlok nga kita walay tubag. Pipila sa mga tawo sa ubang mga simbahan mga eksperto sa ilang kaugalingon nga kasaysayan o doktrina, ug ang mga gitun-an nagpakita nga ang mga Santos sa Ulahing mga Adlaw hilabihan ka na-edukar sa ilang

MGA KAPANGUHAAN SA INTERNET [ONLINE RESOURCES]

Ang Simbahan naghimo og kapanguhaan diha sa internet nga makatabang sa mga miyembro sa pagpakigbahin niadtong kinsa adunay mga pangutana.

Mormon.org
Mormon.org/Jesus Christ
Mormonnewsroom.lds.org
LDS.org
Liahona.LDS.org



Kon motubag og mga pangutana sa amigo, ipakita kon si kinsa ka. Kini sa kasagaran mao ang rason nga sila nangutana nimo.

kaugalingon nga tinuohan kon itandi.

Kon may tawo nga mangutana mahitungod sa kasaysayan o doktrina sa Simbahan nga kita wala mahibalo, mahimo ra nga moingon, “Wala ako mahibalo.” Apan kitang tanan makahimo sa pagpakigbahin og personal nga mga kasinatian sa pagpasabut kon unsa ang atong gibati mahitungod sa atong tinuohan.

Kon atong iasoy ang atong kaugalingon nga mga kasinatian mahitungod sa pag-ampo o pagpuasa o sa pagpakigsulti sa epektibo nga paagi sa atong mga pamilya, kadto nga mga kasinatian dili masukna. Kini atoa, ug walay usa nga makasabut niini og mas maayo kay kanato.

Pagpakabana sa Inyong Tigpaminaw

Ang pipila ka mga tawo dili moduol og miyembro nga may pangutana tungod kay sila nahadlok nga mapugos sa pagpaminaw og tunga sa oras nga lecture. Kon sila mangutana ug yano nga pangutana, pagpakabana sa ilang

interes, kasayon, ug gitag-on sa pagsabut. Ang pagpakita sa atong pagpakabana sa sinugdang makabutang niadtong kinsa nangusisa diha sa kasayon.

Sabta nga ang sama nga pakigsinultihay dili moepekto alang sa tanan tungod sa nagkalainlaing mga kaagi—relihiyoso, sekular, ug uban pa.

Pakigbahin sa Unsay Atong Gituohan

Ang mga miyembro sa Simbahan adunay dili katupngan nga oportunidad nga mahimong pwera alang sa kaayohan sa pagtabang og patin-aw sa mga sayop nga mga pagtuo mahitungod sa unsa nga kita dili mao ug sa pagdugang og pasabut sa uban kinsa kita ug unsay atong gituohan.

Samtang ang mga tawo nagkadaghan og nahibaloan mahitungod sa mga pagtuo sa Santos sa Ulahing mga Adlaw, mahimo nga sila makakita og tataw nga mga kalainan ug gani makakaplag og pipila ka wala damha nga pagkaparehas nga makatukod og mas maayong mga relasyon. ■

Makatabang nga mga Sugyot

Pagtinguha sa Labing Maayo

Kini makahadlok kon ang usa ka tawo mangutana og lisud nga mga pangutana mahitungod sa atong tinuohan. Hinoon, sa kadaghanang bahin, ang mga tawo maukiton lamang. Ayaw pagpanagang.

Paminaw og Maayo

Si Elder David A. Bednar sa Korum sa Napulog Duha ka mga Apostoles nagtudlo nga ang gasa sa pag-ila molihok sa labing maayo kon kita maminaw. Sa pagsabut gyud sa pangutana ug sa tuyo, pangutana og katin-awan nga mga pangutana ug pangandam sa pagpaminaw og maayo samtang kamo nagsulti.

Pagtahud sa Kagawasan sa Pagpili

Ang tanan nga mga tawo adunay hinatag sa Dios nga moral nga kagawasan sa pagpili. Busa kita mahimo nga modapit og gani moawhag—apan kinahanglan dili gayud mangapura o mamugos.

Paglikay sa Lisud nga Pulong sa Simbahan

Likayi ang lisud nga pulong sa Santos sa Ulahing mga Adlaw nga maingon og dili pamilyar, sama sa “ward,” “family home evening,” o “Pulong sa Kaalam.” Kon kamo mogamit niini nga mga pulong, ipasabut kini nga dili maghulat nga pangutan-on.


Paggamit sa Tibuok Ngalan sa Simbahan

Bisan kanus-a nga posible, gamita ang tibuok ngalan sa Simbahan sa dili mominos og kausa, ug sa pagsugod sa panag-inistoryahay. Adunay gahum diha sa ngalan sa Simbahan, busa ipasabut kini. Kini naghulagway og maayo kon kinsa kita.

Niining tuiga daghan nga isyu sa *Liahona* adunay set sa mga tawo sa kasulatan sa Basahon ni Mormon. Aron sa paghimo niini nga lig-on ug sayon gamiton, guntinga kini ug ipapilit o i-tape kini sa baga nga papel, sako nga papel, o mga stick. Tipigi ang matag set sulod sa envelope o bag, kauban sa ngalan nga nagpahibalo kon asa makit-an ang istorya sa kasulatan nga naghigot kabahin sa mga tawo.



Samuel



Samuel ang Lamanite
Helaman 13–14, 16



“Samtang kita magpadayon sa atong matag adlaw nga kinabuhi,” nagtudlo si Presidente Thomas S. Monson, “kita makakita og daghan mga oportunidad nga mosunod sa ehemplo sa Manluluwas. Kon ang atong kasingkasing nahisubay sa Iyang mga pagtulun-an, kita makadiskobre sa kaduol gayud sa Iyang balaanong tabang. Kini sama nga kita anaa sa buhat sa Ginoo.” Si Presidente Monson mismo ehemplo sa nagtinguha og balaanong tabang sa iyang pagpakabuhi ug nagtubag sa panawagan nga moserbisyo. Tan-awa sa “Thomas S. Monson: Pagtubag sa Tawag sa Katungdanan,” pahina 14.